


उत्तराध्ययन सूत्रम्

णमो समणस्स भगवओ महावीरस्स

॥ भगवत् सुधर्मस्वामी प्रणीतम् ॥

॥ सिरि-उत्तरज्झयण-सुत्तं ॥

(श्रीमदुत्तराध्ययनसूत्रम्)



—: प्रकाशक :—

॥ जामनगर वास्तव्य पंडित हीरालाल हंसराजेन स्वकीय
श्रीजैनभास्करोदय मुद्रणालये मुद्रितम् ॥

संवत् १९९४

मूल्य १-४-०

सने १९३८

॥ णमोऽस्तु णं तस्स समणस्स भगवओ महावीरस्स ॥

श्री जैन

॥ सिद्धान्त-स्वाध्यायमाला ॥

॥ सिरि-उत्तरज्झयण-सुत्तं ॥

विणयसुयं पढमं अज्झयणं

संजोगा विप्पमुक्कस्स, अणगारस्स भिक्खुणो । विणयं पाउकरिस्सामि, आणुपुर्व्वि सुणेह मे ॥ १ ॥
आणानिहेसकरे, गुरुणमुववायकारए । इंगियागारसंपन्ने, से विणीए त्ति बुच्चई ॥ २ ॥
आणाऽनिहेसकरे, गुरुणमणुववायकारए । पडिणीए असंबुद्धे, अविणीए त्ति बुच्चई ॥ ३ ॥
जहा सुणी पूइकणी, निकसिज्जई सव्वसो । एवं दुरस्सीलपडिणीए, मुहरी निकसिज्जई ॥ ४ ॥
कणकुण्डगं चइत्ताणं, विट्ठं भुंजइ सूरये । एवं सीलं चइत्ताणं, दुस्सीले रमई मिए ॥ ५ ॥
सुणिया भावं साणस्स, सूररस्स नरस्स य । विणए ठवेज्ज अप्पाणमिच्छन्तो हियमप्पणो ॥ ६ ॥
तम्हा विणयमेसिज्जा, सीलं पडिलमेज्जए । बुद्धपुत्तं नियागट्ठी, न निकसिज्जइ कण्हुई ॥ ७ ॥
निसन्ते सियाऽमुहरी, बुद्धाणं अन्तिए सया । अट्ठजुत्ताणि सिक्खिज्जा, निरट्ठाणि उ वज्जए ॥ ८ ॥
अणुसासिओ न कुप्पिज्जा, खंतिं सेविज्ज पण्डिए । खुट्ठेहिं सह संसग्गिं, हासं कीडं च वज्जए ॥ ९ ॥
मा य चण्डालियं कासी, बहुयं मा य आलवे । कालेण य अहिज्जित्ता, तओ झाइज्ज एगगो ॥ १० ॥
आहच्च चण्डालियं कट्ठ, न निणहविज्ज कयाइ वि । कडं कडे त्ति भासेज्जा, अकडं नो कडे त्ति य ॥ ११ ॥
मा गलियस्सेव कसं, वयणमिच्छे पुणो पुणो । कसं व दट्ठुमाइण्णे, पावगं परिवज्जए ॥ १२ ॥

अणासवा थूलवया कुसीला, मिउंपि चण्डं पकरिन्ति सीसा ।

चित्ताणुया लहु दक्खोववेया, पसायए ते हु दुरासयंपि ॥

॥ १३ ॥

नापुट्ठो वागरे किंचि, पुट्ठो वा नालियं वए । कोहं असच्चं कुवेज्जा, धारेज्जा पियमप्पियं ॥ १४ ॥
अप्पा चेव दमेयव्वो, अप्पा हु खलु दुद्धमो । अप्पा दन्तो सुही होइ, अस्सि लोए परत्थ य ॥ १५ ॥
वरं मे अप्पा दन्तो, संजमेण तवेण य । माहं परेहि दम्मंतो, बंधणेहिं वहेहि य ॥ १६ ॥
पडिणीयं च बुद्धाणं, वाया अदुव कम्मुणा । आवी वा जइ वा रहस्से, नेव कुज्जा कयाइ वि ॥ १७ ॥
न पक्खओ न पुरओ, नेव किच्चाण पिट्ठओ । न जुंजे ऊरुणा ऊरुं, सयणे नो पडिस्सुणे ॥ १८ ॥
नेव पल्हत्थियं कुज्जा, पक्खपिण्डं च संजए । पाए पसारिए वावि, न चिट्ठं गुरुणन्तिए ॥ १९ ॥
आयरिएहिं वाहित्तो, तुसिणीओ न कयाइवि । पसायपेही नियागट्ठी, उवचिट्ठे गुरुं सया ॥ २० ॥

आलवन्ते लवन्ते वा, न निसीएज्ज कयाइ वि । चइऊणमासणं धीरो, जओ जत्तं पडिस्सुणे ॥ २१ ॥
 आसणगओ न पुच्छेज्जा, नेव सेज्जागओ कया । आगम्मुककुडुओ सन्तो, पुच्छिज्जा पंजलीउडो ॥ २२ ॥
 एवं विणयजुत्तस्स, सुत्तं अत्थं च तदुभयं । पुच्छमाणस्स सीसस्स, वागरिज्ज जहासुयं ॥ २३ ॥
 मुसं परिहरे भिक्खू, न य ओहारिणिं वए । भासादोसं परिहरे, मायं च वज्जए सया ॥ २४ ॥
 न लवेज्ज पुट्ठो सावज्जं, न निरट्ठं न मम्मयं । अप्पणट्ठा परट्ठा वा, उभयस्सन्तरेण वा ॥ २५ ॥
 समरेसु अगारेसु, सन्धीसु य महापहे । एगो एगत्थिए सद्धिं, नेव चिट्ठे न संलवे ॥ २६ ॥
 जं मे बुद्धाऽणुसासन्ति, सीएण फरुसेण वा । मम लाहो त्ति पेहाए, पयओ तं पडिस्सुणे ॥ २७ ॥
 अणुसासणमोवायं, दुक्कडस्स य चोयणं । हियं तं मण्णई पण्णो, वेसं होइ असाहुणो ॥ २८ ॥
 हियं विगयभया बुद्धा, फरुसंपि अणुसासणं । वेसं तं होइ मूढाणं, खन्तिसोहिकरं पयं ॥ २९ ॥
 आसणे उवचिट्ठेज्जा, अणुच्चे अकुए थिरे । अप्पुट्ठाई निरुट्ठाई, निसीएज्जप्पकुक्कुए ॥ ३० ॥
 कालेण निक्खमे भिक्खू, कालेण य पडिक्कमे । अकालं च विवज्जित्ता, काले कालं समायरे ॥ ३१ ॥
 परिवाडीए न चिट्ठेज्जा, भिक्खू दत्तेसणं चरे । पडिरुवेण एसित्ता, मियं कालेण भक्खए ॥ ३२ ॥
 नाइदूरमणासन्ने, नाऽन्नेसिं चक्खुफासओ । एगो चिट्ठेज भत्तट्ठा, लंघित्ता तं नाऽइक्कमे ॥ ३३ ॥
 नाइउच्चे न नीए वा, नासन्ने नाइदूरओ । फासुयं परकडं पिण्डं, पडिगाहेज्ज संजए ॥ ३४ ॥
 अप्पपाणेऽप्पबीयम्मि, पडिछन्नम्मि संवुडे । समयं संजए भुंजे, जयं अपरिसाडियं ॥ ३५ ॥
 सुकडित्ति सुपक्कित्ति, सुच्छिन्न सुहडे मडे । सुणिट्ठिए सुलद्धित्ति, सावज्जं वज्जए मुणी ॥ ३६ ॥
 रमए पण्डिए सासं, हयं भइं व वाहए । बालं सम्मइ सासंतो, गलियस्सं व वाहए ॥ ३७ ॥
 खड्डुया मे चवेडा मे, अक्कोसा य वहा य मे । कल्लाणमणुसासन्तो, पावदिट्ठित्ति मन्नई ॥ ३८ ॥
 पुत्तो मे भाय नाइ त्ति, साहू कल्लाण मन्नई । पावदिट्ठि उ अप्पाणं, सासं दासु त्ति मन्नई ॥ ३९ ॥
 न कोवए आयरियं, अप्पाणंपि न कोवए । बुद्धोवघाई न सिया, न सिया तोत्तगवेसए ॥ ४० ॥
 आयरियं कुवियं नच्चा, पत्तिएण पसायए । विज्जवेज्ज पंजलीउडो, वएज्ज न पुणोत्ति य ॥ ४१ ॥
 धम्मज्जियं च ववहारं, बुद्धेहायरियं सया । तमायरन्तो ववहारं, गरहं नाभिगच्छई ॥ ४२ ॥
 मणोगयं वक्कयं, जाणित्तायरियस्स उ । तं परिगिज्ज वायाए, कम्ममुणा उववायए ॥ ४३ ॥
 वित्ते अचोइए निच्चं, खिप्पं हवइ सुचोइए । जहोवइट्ठं सुकयं, किच्चाइं कुव्वई सया ॥ ४४ ॥
 नच्चा नमइ मेहावी, लोए किच्ची से जायए । हवई किच्चाणं सरणं, भूयाणं जगई जहा ॥ ४५ ॥
 पुज्जा जस्स पसीयन्ति, संवुद्धा पुव्वसंथुया । पसन्ना लाभइस्संति, विउलं अट्ठियं सुयं ॥ ४६ ॥

स पुज्जसत्थे सुविणीयसंसए, मणोरुई चिट्ठइ कम्मसंपया ।

तवोसमायारिसमाहिसंवुडे, महज्जुई पंच वयाइं पालिया ॥

॥ ४७ ॥

स देवगंधव्वमणुस्सपूइए, चइत्तु देहं मलपंकपुव्वयं ।

सिद्धे वा हवइ सासए, देवे वा अप्परए महिद्धीए ॥

॥ ४८ ॥

त्ति बेमि ॥ इअ विणयसुयं नाम पढमं अज्झयणं समत्तं ॥

॥ अहं दुइअं परिसहज्झयणं ॥

सुयं मे आउसं-तेणं भगवया एवमक्खायं । इह खलु बावीसं परीसहा समणेणं भगवया महा-
वीरेणं कासवेणं पवेइया । जे भिक्खू सोच्चा नच्चा जिच्चा अभिभूय भिक्खायरियाए परिव्वयन्तो
पुट्ठो नो निण्हवेज्जा ॥ कयरे ते खलु बावीसं परीसहा समणेणं भगवया महावीरेणं कासवेणं पवे-
इया, जे भिक्खू सोच्चा नच्चा जिच्चा अभिभूय भिक्खायरियाए परिव्वयन्तो पुट्ठो नो निण्हवेज्जा ? ॥
इमे ते खलु बावीसं परीसहा समणेणं भगवया महावीरेणं कासवेणं पवेइया, जे भिक्खू सोच्चा नच्चा
जिच्चा अभिभूय भिक्खायरियाए परिव्वयन्तो पुट्ठो नो निण्हवेज्जा; तंजहा-दिगिंछापरीसहे १ पिवा-
सापरीसहे २ सीयपरीसहे ३ उसिणपरीसहे ४ दंसमसयपरीसहे ५ अचेलपरीसहे ६ अरइपरीसहे ७
इत्थीपरीसहे ८ चरियापरीसहे ९ निसीहियापरीसहे १० सेज्जापरीसहे ११ अक्कोसपरीसहे १२ वह-
परीसहे १३ जायणापरीसहे १४ अलाभपरीसहे १५ रोगपरीसहे १६ तणफासपरीसहे १७ जल्लप-
रीसहे १८ सक्कारपुरक्कारपरीसहे १९ पन्नापरीसहे २० अन्नाणपरीसहे २१ दंसणपरीसहे २२ ॥

परीसहाणं पविभत्ती, कासवेणं पवेइया । तं मे उदाहरिस्सामि, आणुपुव्वि सुणेह मे ॥ १ ॥
दिगिंछापारिगए देहे, तवस्सी भिक्खू थामवं । न छिंदे न छिंदावए, न पए न पयावए ॥ २ ॥
कालीपव्वंगसकासे, किसे धमणिसंतए । मायन्ने असणपाणस्स, अदीणमणसो चरे ॥ ३ ॥
तओ पुट्ठो पिवासाए, दोगुच्छी लज्जसंजए । सीओदगं न सेविज्जा, वियडस्सेसणं चरे ॥ ४ ॥
छिन्नावाएसु पंथेसु, आउरे सुपिवासिए । परिसुक्खमुहाऽदीणे, तं तितिकखे परीसहं ॥ ५ ॥
चरंतं विरयं ल्हं, सीयं फुसइ एगया । नाइवेलं मुणी गच्छे, सोच्चाणं जिणसासणं ॥ ६ ॥
न मे निवारणं अत्थि, छवित्ताणं न विज्जई । अहं तु अग्गिं सेवामि, इइ भिक्खू न चिंतए ॥ ७ ॥
उसिणं परियावेणं, परिदाहेण तज्जिए । धिंसु वा परियावेणं, सायं नो परिदेवए ॥ ८ ॥
उण्हाहितत्ते मेहावी, सिणाणं नो वि पत्थए । गायं नो परिसिंचेज्जा, न वीएज्जा य अप्पयं ॥ ९ ॥
पुट्ठो य दंसमसएहिं, समरे व महामुणी । नागो संगामसीसे वा, सरो अभिहणे परं ॥ १० ॥
न संतसे न वारेज्जा, मणं पि न पओसए । उवेहे न हणे पाणे, भुंजंते मंससोणियं ॥ ११ ॥
परिजुण्णेहि वत्थेहिं, होक्खामि त्ति अचेलए । अदुवा सचेले होक्खामि, इइ भिक्खू न चिंतए ॥ १२ ॥
एगयाऽचेलए होइ, सचेले आवि एगया । एयं धम्मं हियं नच्चा, नाणी नो परिदेवए ॥ १३ ॥
मामाणुगामं रीयंतं, अणगारं अकिंचणं । अरई अणुप्पवेसेज्जा, तं तितिकखे परीसहं ॥ १४ ॥
अरइं पिट्ठओ किच्चा, विरए आयरक्खिए । धम्मारामे निरारम्भे, उवसन्ते मुणी चरे ॥ १५ ॥
सङ्को एस मणूसाणं, जाओ लोगम्मि इत्थिओ । जस्स एया परिन्नाया, सुकडं तस्स सामणं ॥ १६ ॥
एयमादाय मेहावी, पङ्कभूया उ इत्थिओ । नो ताहिं विणिहम्मज्जा, चरेज्जत्तगवेसए ॥ १७ ॥
एग एव चरे लाढे, अभिभूय परीसहे । गामे वा नगरे वावि, निगमे वा रायहाणिए ॥ १८ ॥
असमाणे चरं भिक्खू, नेव कुज्जा परिग्गहं । असंसत्ते गिहत्थेहिं, अणिएओ परिव्वए ॥ १९ ॥
सुसाणे सुन्नगारे वा, रुक्खमूले व एगओ । अकुक्कुओ निसीएज्जा, न य वित्तासए परं ॥ २० ॥

तत्थ से चिट्ठमाणस्स, उवसग्गाभिधारए । संकाभीओ न गच्छेज्जा, उट्ठित्ता अन्नमासणं ॥ २१ ॥
 उच्चावयाहिं सेज्जाहिं, तवस्सी भिक्खू थामवं । नाइवेलं विहम्मेज्जा, पावदिट्ठी विहम्मई ॥ २२ ॥
 पइरिक्कुवस्सयं लब्धुं, कल्लाणमदुवा पावयं । किमेगराइं करिस्सइ, एवं तत्थऽहियासए ॥ २३ ॥
 अक्कोसेज्जा परे भिक्खुं, न तेसिं पडिसंजले । सरिसो होइ बालाणं, तम्हा भिक्खू न संजले ॥ २४ ॥
 सोच्चाणं फरुसा भासा, दारुणा गामकण्टगा । तुसिणीओ उवेहेज्जा, न ताओ मणसीकरे ॥ २५ ॥
 हओ न संजले भिक्खू, मणंपि न पओसए । तितिक्खं परमं नच्चा, भिक्खू धम्मं समायरे ॥ २६ ॥
 समणं संजयं दंतं, हणिज्जा कोइ कत्थई । नत्थि जीवस्स नासुत्ति, एवं पेहेज्ज संजए ॥ २७ ॥
 दुकरं खलु भो निच्चं, अणगारस्स भिक्खुणो । सव्वं से जाइयं होइ, नत्थि किंचि अजाइयं ॥ २८ ॥
 गोयरग्गपविट्ठस्स, पाणी नो सुप्पसारए । सुओ अगारवासुत्ति, इइ भिक्खू न चिंतए ॥ २९ ॥
 परेसु घासमेसेज्जा, भोयणे परिणिट्ठिए । लद्धे पिण्डे अलद्धे वा, नाणुतप्पेज्ज पंडिए ॥ ३० ॥
 अज्जेवाहं न लब्भामि, अवि लामो सुए सिया । जो एवं पडिसंचिक्खे, अलामो तं न तज्जए ॥ ३१ ॥
 नच्चा उप्पइयं दुक्खं, वेयणाए दुहट्ठिए । अदीणो थावए पन्नं, पुट्ठो तत्थऽहियासए ॥ ३२ ॥
 तेइच्छं नाभिन्देज्जा संचिक्खत्तगवेसए । एवं खु तस्स सामणं, जं न कुज्जा न कारवे ॥ ३३ ॥
 अचेलगस्स ल्हस्स, संजयस्स तवस्सिणो । तणेसु सयमाणस्स, हुज्जा गायविराहणा ॥ ३४ ॥
 आयवस्स निवाएण, अउला हवइ वेयणा । एवं नच्चा न सेवंति, तंतुजं तणतज्जिया ॥ ३५ ॥
 किलिन्नगाए मेहावी, पंकेण व रएण वा । धिसु वा परियावेण, सायं नो परिदेवए ॥ ३६ ॥
 वेएज्ज निज्जरापेही, आरियं धम्मणुत्तरं । जाव सरीरमेउत्ति, जल्लं काएण धारए ॥ ३७ ॥
 अभिवायणमब्भुट्ठाणं, सामी कुज्जा निमंतणं । जे ताइं पडिसेवन्ति, न तेसिं पीहए मुणी ॥ ३८ ॥
 अणुक्कसाई अप्पिच्छे, अनाएसी अलोलुए । रसेसु नाणुगिज्जेज्जा, नाणुतप्पेज्ज पन्नवं ॥ ३९ ॥
 से नूणं मए पुव्वं, कम्माऽणाणफला कडा । जेणाहं नाभिजाणामि, पुट्ठो केणइ कणहुई ॥ ४० ॥
 अह पच्छा उइज्जन्ति, कम्माऽणाणफला कडा । एवमस्मासि अप्पाणं, नच्चा कम्मविवागयं ॥ ४१ ॥
 निरट्ठगम्मि विरओ, मेहुणाओ सुसंवुडो । जो सक्खं नाभिजाणामि, धम्मं कल्लाणपावगं ॥ ४२ ॥
 तवोवहाणमादाय, पडिमं पडिवज्जओ । एवं पि विहरओ मे, लुउमं न नियइई ॥ ४३ ॥
 नत्थि नूणं परे लोए, इड्ढी वावि तवस्सिणो । अदुवा वंचिओमिति, इइ भिक्खू न चिंतए ॥ ४४ ॥
 अभू जिणा अत्थि जिणा, अदुवावि भविस्सई । सुसं ते एवमाहंसु, इइ भिक्खू न चिंतए ॥ ४५ ॥
 एए परीसहा सव्वे, कासवेण निवेइया । जे भिक्खू न विहम्मेज्जा, पुट्ठो केणइ कणहुई ॥ ४६ ॥

त्ति वेमि ॥ इअ दुइअं परिसहज्जयणं समत्तं ॥ २ ॥

॥ अह तइअं चाउरंगिज्जं अज्झयणं ॥

चत्तारि परमंगाणि दुल्लहाणीह जन्तुणो । माणुसत्तं सुई सद्धा, संजमम्मि य वीरियं ॥ १ ॥
 समावन्ना ण संसारे, नाणागोत्तासु जाइसु । कम्मा नाणाविहा कट्ठु, पुढो विस्संभिया पया ॥ २ ॥
 एगया देवलोएसु, नरएसु वि एगया । एगया आसुरं कायं, अहाकम्मेहिं गच्छई ॥ ३ ॥
 एगया खत्तिओ होइ, तओ चण्डालवोक्सो । तओकीडपयगो य, तओ कुन्धुपिवालिया ॥ ४ ॥
 एवमावट्टजोणीसु, पाणिणो कम्मकिव्विसा । न निविज्जन्ति संसारे, सव्वट्ठेसु व खत्तिया ॥ ५ ॥
 कम्मसंगेहिं सम्मूढा, दुक्खिया बहुवेयणा । अमाणुसासु जोणीसु, विणिहम्मन्ति पाणिणो ॥ ६ ॥
 कम्माणं तु पहाणाए, आणुपुव्वी कयाइ उ । जीवा सोहिमणुप्पत्ता, आययंति मणुस्सयं ॥ ७ ॥
 माणुस्सं विग्गहं लद्धुं, सुई धम्मस्स दुल्लहा । जं सोच्चा पडिवज्जन्ति, तवं खंतिमहिंसयं ॥ ८ ॥
 आहच्च सवणं लद्धुं, सद्धा परमदुल्लहा । सोच्चा नेआउयं मग्गं, बहवे परिभस्सई ॥ ९ ॥
 सुइं च लद्धुं सद्धं च, वीरियं पुण दुल्लहं । बहवे रोयमाणावि, नो य णं पडिवज्जए ॥ १० ॥
 माणुसत्तंमि आयाओ, जो धम्मं सुच्च सद्धहे । तवस्सी वीरियं लद्धुं, संबुडे निधुणे रयं ॥ ११ ॥
 सोही उज्जय भूयस्स, धम्मो सुद्धस्स चिद्धई । निव्वाणं परमं जाइ, वयसित्तिव्व पावए ॥ १२ ॥
 विगिंच कम्मणो हेउं, जसं संचिणु खंतिए । सरीरं पाढवं हिच्चा, उद्धं पक्कमए दिसं ॥ १३ ॥
 विसालसेहिं सीलेहिं, जक्खा उत्तरउत्तरा । महासुक्का व दिप्पंता, मन्नंता अपुणच्चयं ॥ १४ ॥
 अप्पिया देवकामाणं, कामरूवविउव्विणो । उद्धं कप्पेसु चिट्ठंति, पुव्वावाससया बहु ॥ १५ ॥
 तत्थ ठिच्चा जहाठाणं, जक्खा आउक्खये चुया । उव्वेति माणुसं जोणिं, से दसंगेभिजायए ॥ १६ ॥
 खित्तं वत्थुं हिरण्णं च, पसवो दासपोरुसं । चत्तारि कामखंधाणि । तत्थ से उव्वज्जइ ॥ १७ ॥
 मित्तवं नाइवं होइ, उच्चागोए य वण्णवं । अप्पायंके महापन्ने, अभिजाए जसो बले ॥ १८ ॥
 भुच्चा माणुस्सए भोए, अप्पडिरूवे अहाउयं । पुव्वं विसुद्धसद्धम्मे, केवलं बोहिबुज्झिया ॥ १९ ॥
 चउरंगं दुल्लहं नच्चा, संजमं पडिवज्झिया । तवसा धुयकम्मं से, सिद्धे हवइ सासए ॥ २० ॥

त्ति वेमि ॥ इअ तृतीयं परिज्झयणं समत्तं ॥

॥ अह चतुर्थ असंखयं अज्झयणं ॥

असंखयं जीविय मा पमायए, जरोवणीयस्स हु नत्थि ताणं ।
 एवं वियाणाहि जणे पमत्ते कन्नु विहिंसा अजिया गिहंति ॥ १ ॥
 जे पावकम्मेहिं धणं मणूसा, समाययंती अमइं गहाय ।
 पहाय ते पासपयट्ठिए नरे, वेराणुबद्धा नरयं उव्विति ॥ २ ॥
 तेणे जहा संधिमुहे गहीए, सकम्मणा किच्चइ पावकारी ।
 एवं पया पेच्च इहं चलोए, कडाण कम्माण न मुक्खु अत्थि ॥ ३ ॥

संसारमावन्न परस्स अट्ठा, साहारणं जं च करेइ कम्मं ।
 कम्मस्स ते तस्स उवेयकाले, न बंधवा बंधवयं उर्विति ॥ ४ ॥
 वित्तेण ताणं न लभे पमत्ते, इमंमि लोए अदुवा परत्थ ।
 दीवप्पणट्ठेव अणंतमोहे, नेयाउयं दट्ठुमदट्ठुमेव ॥ ५ ॥
 सुत्तेसुआवी पडिबुद्धजीवी, न वीसंसे पंडिय आसुपण्णे ।
 घोरा महत्ता अबलं सरीरं, भारंडपक्खीव चरप्पमत्तो ॥ ६ ॥
 चरे पयाइ परिसंकमाणो, जं किंचि पासं इह मन्नमाणो ।
 लाभंतरे जीवियवूहइत्ता, पच्छा परिन्नाय मलावधंसी ॥ ७ ॥
 छंदंनिरोहेण उवेइ मोक्खं, आसे जहा सिक्खियवम्मधारी ।
 पुव्वाइं वासाइं चरप्पमत्तो, तम्हा मुणी खिप्पमुवेइ मुक्खं ॥ ८ ॥
 स पुव्वमेवं न लभेज्ज पच्छा, एसोवमा सासयवाइयाणं ।
 विसीदई सिट्ठिले आउयम्मि, कालोवणीए सरीरस्स भेए ॥ ९ ॥
 खिप्पं न सकेइ विवेगमेउं, तम्हा समुट्ठाय पहाय कामे ।
 समिच्च लोयं समया महेसी, आयाणुरक्खी चरमप्पमत्ते ॥ १० ॥
 मुहुं मुहुं मोहगुणे जयन्तं, अणेगरूवा समणं चरन्तं ।
 फासा फुसन्ती असमंजसं च, न तेसि भिक्खू मणसा पउस्से ॥ ११ ॥
 मन्दा य फासाबहुलोहणिज्जा, तहप्पगारेसु मणं न कुज्जा ।
 रक्खिज्ज कोहं विणएज्ज माणं, मायं न सेवेज्ज पयहेज्ज लोहं ॥ १२ ॥
 जेऽसंखया तुच्छपरप्पवाई, ते पिज्जदोसाणुगया परब्भा ।
 एए अहम्मे त्ति दुगुंछमाणो, कंखे गुणे जाव सरीरभेउ ॥ १३ ॥
 त्ति वेमि ॥ इअ असंखयं चउत्थं अज्झयणं समत्तं ॥

॥ अह अकाममरणिज्जं पञ्चम अज्झयण ॥

अण्णवंसि महोहंसि, एगे तिण्णे दुरुत्तरं । तत्थ एगे महापन्ने, इमं पण्हमुदाहरे ॥ १ ॥
 सन्तिमे य दुवे ठाणा, अक्खाया मरणन्तिया । अकाममरणं चेव, सकाममरणं तहा ॥ २ ॥
 बालाणं तु अकामं तु, मरणं असइं भवे । पण्डियाणं सकामं तु, उक्कोसेण सइं भवे ॥ ३ ॥
 तत्थिमं पढमं ठाणं, महावीरुण देसियं । कामगिद्धे जहा बाले, भिसं कूराइं कुव्वई ॥ ४ ॥
 जे गिद्धे कामभोगेसु, एगे कूडाय गच्छई । न मे दिट्ठे परे लोए, चक्खुदिट्ठा इमा रई ॥ ५ ॥
 हत्थागया इमे कामा, कालिया जे अणागया । को जाणइ परे लोए, अत्थि वा नत्थि वा पुणो ॥ ६ ॥
 जणेण सद्धिं होक्खामि, इइ बाले पगब्भई । कामभोगाणुराणं, केसं संपडिवज्जई ॥ ७ ॥
 तओ से दण्डं समारभई, तसेसु थावरेसु य । अट्ठाए य अणट्ठाए, भूयगामं विहिंसई ॥ ८ ॥
 हिंसे बाले मुसावाई, माइल्ले पिसुणे सटे । भुंजमाणे सुरं मंसं, सेयमेयं ति मन्नई ॥ ९ ॥

कायसा वयसा मत्ते, वित्ते गिद्धे य इत्थिसु। दुइओ मलं संचिणइ, सिंसुणागु व्व मट्टियं ॥ १० ॥
 तओ पुट्ठो आयंकेणं, गिलाणो परितप्पई। पमीओ परलोगस्स, कम्माणुप्पेहि अप्पणो ॥ ११ ॥
 सुया मे नरए ठाणा, असीलाणं च जा गई। बालाणं कुरकम्माणं, पंगाढा जत्थ वेयणा ॥ १२ ॥
 तत्थोववाइयं ठाणं, जहा मेयमणुस्सुयं। आहाकम्मेहिं गच्छन्तो, सो पच्छा परितप्पई ॥ १३ ॥
 जहा सागडिओ जाणं, समं हिच्चा महापहं। विसमं मगं ओइण्णो, अक्खे भग्गम्मि सोयई ॥ १४ ॥
 एवं धम्मं विउक्कम्मं, अहम्मं पडिवज्जिया। बाले मच्चुप्पुहं पत्ते, अक्खे भग्गे व सोयई ॥ १५ ॥
 तओ स मरणन्तम्मि, बाले संतसई भया। अकाममरणं मरई, धुत्ते व कलिणा जिए ॥ १६ ॥
 एयं अकाममरणं, बालाणं तु पवेइयं। एत्तो सकाममरणं, पण्डियाणं सुणेह मे ॥ १७ ॥
 मरणं पि सपुण्णाणं, जहा मेयमणुस्सुयं। विप्पसण्णमणाघायं, संजयाण वुसीमओ ॥ १८ ॥
 न इमं सव्वेसु भिक्खूसु, न इमं सव्वेसु गाविसु। नाणासीला अगारत्था, विसमसीला य भिक्खूणो ॥ १९ ॥
 सन्ति एगेहिं भिक्खूहिं, गारत्था संजमुत्तरा। गारत्थेहि य सव्वेहिं, साहवो संजमुत्तरा ॥ २० ॥
 चीराजिणं नगिणिणं, जडी संघाडिमुण्डिणं। एयाणि वि न तायन्ति, दुस्सीलं परियागयं ॥ २१ ॥
 पिंडोल एव्व दुस्सीले, नरगाओ न मुच्चई। भिक्खाए वा गिहत्थे वा, सुव्वए कम्मई दिवं ॥ २२ ॥
 अगारिसामाइयंगाणि, सड्डी काएण फासए। पोसहं दुइओ पक्खं, एगरायं न हावए ॥ २३ ॥
 एवं सिक्खासमावन्ने, गिहिवासे वि सुव्वए। मुच्चई छविपव्वाओ, गच्छे जक्खसलोगयं ॥ २४ ॥
 अह जे संवुडे भिक्खू, दोण्हं अन्नयरे सिया। सव्व दुक्खपहीणे वा, देवे वावि महिड्ढीए ॥ २५ ॥
 उत्तराई विमोहाई, जुईमन्ताणुपुव्वसो। समाइण्णाई जक्खेहिं, आवासाई असंसिणो ॥ २६ ॥
 दीहाउया इड्ढीमन्ता, समिद्धा कामरुविणो। अहुणोववन्नसंकासा, भुज्जो अच्चिमलिप्पभा ॥ २७ ॥
 ताणि ठाणाणि गच्छन्ति, सिक्खित्ता संजमं तवं।

भिक्खागे वा गिहत्थे वा, जे सन्ति पडिनिव्वुडा ॥ २८ ॥

तेसिं सोच्चा सपुज्जाणं, संजयाण वुसीमओ। न संतंसन्ति मरणंते, सीलवन्ता बहुस्सुया ॥ २९ ॥
 तुलिया विसेसमादाय, दयाधम्मस्स खन्तिए। विप्पसीएज्ज मेहावी, तहाभूएण अप्पणा ॥ ३० ॥
 तओ काले अभिप्पेए, सड्ढी तालिसमन्तिए। विणएज्ज लोमहरिसं, मेयं देहस्स कंखए ॥ ३१ ॥
 अह कालम्मि संपत्ते, आघायाय समुस्सयं। सकाममरणं मरई, तिण्हमन्नयरं मुणी ॥ ३२ ॥

त्ति वेमि ॥ इअ अकाममरणिज्जं पंचमं अज्झयणं समत्तं ॥ ५ ॥

॥ अह खुड्डागनियंट्टिज्जं छट्ठं अज्झयणं ॥

जावन्तविज्जापुरिसा, सव्वे ते दुक्खसंभवा। लुप्पन्ति बहुसो मूढा, संसारम्मि अणन्तए ॥ १ ॥
 समिक्ख पण्डए तम्हा, पासजाई पहे बहू। अप्पणा सच्चमेसेज्जा, मेत्तिं भूएसु कप्पए ॥ २ ॥
 माया पियान्डुसा भाया, भज्जा पुत्ता य ओरसा। नालं ते मम ताणाए, लुप्पंतस्स सकम्मुणा ॥ ३ ॥
 एयमट्ठं सपेहाए, पासे समियदंसणे। छिन्द गेद्धिं सिणेहं च, न कंखे पुव्वसंयुयं ॥ ४ ॥
 गवांसं मणिकुण्डलं, पसवो दासपोरुसं। सव्वमेयं चइत्ताणं कामरुवी भविस्ससि ॥ ५ ॥

अज्झत्थं सव्वओ सव्वं, दिस्स पाणे पियायए । न हणे पाणिणो पाणे, भयवेराओ उवरए ॥ ६ ॥
 आदाणं नरयं दिस्स, नायएज्ज तणामवि । दोगुज्जी अप्पणो पाए, दिन्नं भुंजेज्ज भोयणं ॥ ७ ॥
 इहमेगे उ मन्नन्ति, अपच्चक्खाय पावगं । आयरियं विदित्ताणं, सव्वदुक्खाण मुच्चए ॥ ८ ॥
 भणंता अकरेन्ता य, बन्धमोक्खपइण्णिणो । वायाविरियमेत्तेण, समासासेन्ति अप्पयं ॥ ९ ॥
 न चित्तातायए भासा, कुओ विज्जाणुसासणं । विसन्ना पावकम्मेहिं, बाला पंडियमाणिणो ॥ १० ॥
 जे केइ सरीरे सत्ता, वण्णे रुवे य सव्वसो । मणसा कायवक्केणं, सव्वे ते दुक्खसम्भवा ॥ ११ ॥
 आवन्ना दीहमद्धानं, संसारम्मि अणन्तए । तम्हा सव्वदिसं पस्सं, अप्पमत्तो परिव्वए ॥ १२ ॥
 बहिया उदढमादाय, नावकंखे कयाइ वि । पुव्वकम्मक्खयट्ठाए, इमं देहं समुद्वरे ॥ १३ ॥
 विविच्च मम्मणो हेउं, कालकंखी परिव्वए । मायं पिंडस्स पाणस्स, कडं लद्धूण भक्खए ॥ १४ ॥
 सन्निहिं च न कुव्वेज्जा, लेवमायए संजए । पक्खीपत्तं समादाय, निखेक्खो परिव्वए ॥ १५ ॥
 एसणासमिओ लज्जू, गामे अणियओ चरे । अप्पमत्तो पप्पत्तेहिं, पिण्डवायं गवेसए ॥ १६ ॥
 एवं से उदाहु अणुत्तरनाणी अणुत्तरदंसी अणुत्तरनाणदंसणधरे अरहा नायपुत्ते भगवं वेसालिए वियालिए

इअ खुड्ढागनियंठिज्जं छट्ठं अज्झयणं समत्तं ॥ ६ ॥

॥ अह एलयं सत्तमं अज्झयणं ॥

जहाएसं समुदिस्स, कोइ पोसेज्ज एलयं । ओयणं जवसं देज्जा, पोसेज्जावि सयङ्गणे ॥ १ ॥
 तओ से पुट्टे परिव्वूढे, जायमेए महोदरे । पीणिए विउले देहे, आएसं परिक्खए ॥ २ ॥
 जाव न एइ आएसे, ताव जीवइ सो दुही । अह पतम्मि आएसे, सीसं छेत्तूण भुज्जई ॥ ३ ॥
 जहा से खलु उरब्भे, आएसाए समीहिए । एवं बाले अहम्मिड्डे, ईहई नरयाउयं ॥ ४ ॥
 हिंसे बाले मुसावाई, अद्धानंसि विलोकए । अन्नदत्तहरे तेणे, माई कं नु हरे सटे ॥ ५ ॥
 इत्थीविसयगिद्धे य, महारंभपरिग्गहे । भुंजमाणे सुरं मंसं, परिव्वूढे परंदमे ॥ ६ ॥
 अयककरभोई य, तुंडिल्ले चियलोहिए । आउयं नरए कंखे, जहाए व एलए ॥ ७ ॥
 आसणं सयणं जाणं, वित्तं कामे य भुंजिया । दुस्साहडं धणं हिच्चा, बहुं संचिणिया रयं ॥ ८ ॥
 तओ कम्मगुरू जंतू, पच्चुप्पन्नपरायणे । अए व्व आगयाएसे, मरणंतम्मि सोयई ॥ ९ ॥
 तओ आउपरिक्खीणे, चुया देहा विहिंसगा । आसुरीयं दिसं बाला, मच्छन्ति अवसा तमं ॥ १० ॥
 जहा कागिणिए हेउं, सहस्सं हारए नरो । अपच्छं अम्बगं भोच्चा, राया रज्जं तु हारए ॥ ११ ॥
 एवं माणुस्सगा कामा, देवकामाण अन्तिए । सहस्सगुणिया भुज्जो, आउं कामा य दिव्विया ॥ १२ ॥
 अणेगवासानउया, जा सा पन्नवओ ठिई । जाणि जीयन्ति दुम्मेहा, ऊणवाससयाउए ॥ १३ ॥
 जहा य तिन्निवाणिया, मूलं घेत्तूण निग्गया । एगोऽत्थ लहई लाभं एगो मूलेण आगओ ॥ १४ ॥
 एगो मूलं पि हारित्ता, आगओ तत्थ वाणिओ । ववहारे उवमा एसा, एवं धम्मे वियाणह ॥ १५ ॥
 माणुसत्तं भवे मूलं, लाभो देवगई भवे । मूलच्छेएण जीवाणं नरगतिरिक्खत्तणं धुवं ॥ १६ ॥
 दुहओ गई बालस्स, आवई वहमूलिया । देवत्तं माणुसत्तं च, जं जिए लोलयासटे ॥ १७ ॥

तओ जिए सइं होइ, दुविहं दोग्गइं गए । दुल्लहा तस्स उम्मग्गा, अद्दाए सुइरादवि ॥ १८ ॥
 एवं जियं सपेहाए, तुल्लिया बालं च पण्डियं । मूलियं ते पवेसन्ति, माणुसिं जोणिमेन्ति जे ॥ १९ ॥
 वेमायाहिं सिक्खाहिं, जे नरा गिहिसुव्वया । उवेन्ति माणुसं जोणिं, कम्मसच्चा हु पाणिणो ॥ २० ॥
 जेसिं तु विउला सिक्खा, मूलियं ते अइच्छिया । सीलवन्ता सवीसेसा, अदीणा जन्ति देवयं ॥ २१ ॥
 एवमद्दीणवं भिक्खुं, आगारिं च वियाणिया । कहण्णु जिच्चमेलिक्खं, जिच्चमाणे न संविदे ॥ २२ ॥
 जहा कुसग्गे उदगं, समुद्देण समं मिणे । एवं माणुस्सगा कामा, देवकामाण अंतिए ॥ २३ ॥
 कुसग्गमेत्ता इमे कामा, सन्निरुद्धम्मि आउए । कस्स हेउं पुराकाउं, जोगक्खेमं न संविदे ॥ २४ ॥
 इह कामाणियदुस्स, अत्तट्ठे अवरज्झई । सोच्चा नेयाउयं मग्गं, जं भुज्जो परिभस्सई ॥ २५ ॥
 इह कामाणियदुस्स, अत्तट्ठे नावरज्झई । पूइदेहनिरोहेणं, भवे देवि त्ति मे सुयं ॥ २६ ॥
 इइढी जुई जस्सो वण्णो, आउं सुहमणुत्तरं । भुज्जो जत्थ मणुस्सेसु, तत्थ से उववज्झई ॥ २७ ॥
 बालस्स पस्स बालत्तं, अहम्मं पडिवज्जिया । चिच्चा धम्मं अहम्मिट्ठे, नए उववज्झई ॥ २८ ॥
 धीरस्स पस्स धीरत्तं सच्चधमाणवत्तिणो । चिच्चा अधम्मं धम्मिट्ठे, देवेसु उववज्झई ॥ २९ ॥
 तुलियाण बालभावं, अबालं चेव पंडिए । चइऊण बालभावं, अबालं सेवई सुणि ॥ ३० ॥
 त्ति बेमि ॥ इअ एलय-ज्झयणं समत्तं ॥ ७ ॥

॥ अह काविलियं अट्टमं अज्झयणं ॥

अधुवे असासयम्मि, संसारम्मि दुक्खपउराए ।
 किं नाम होज्ज तं कम्मयं, जेणाहं दोग्गइं न गच्छेज्जा ॥ १ ॥
 विजहित्तु पुव्वसज्जेयं, न सिणेहं कहिंचि कुव्वेज्जा ।
 असिणेहसिणेहकरेहिं, दोसपओसेहि मुच्चए भिक्खू ॥ २ ॥
 तो नाणदंसणसमग्गो, हियनिस्सेसाय सव्वजीवाणं ।
 तेसिं विमोक्खणट्ठाए, भासई सुणिवरो विगयमोहो ॥ ३ ॥
 सव्वं गंथं कलहं च, विप्पजहे तहाविहं भिक्खू ।
 सव्वेसु कामजाएसु, पासमाणो न लिप्पई ताई ॥ ४ ॥
 भोगामिसदोसविसत्ते, हियनिस्सेयसबुद्धिवोच्चत्थे ।
 बाले य मन्दिए मूढे, बज्झई मच्छिया व खेलम्मि ॥ ५ ॥
 दुप्परिचया इमे कामा, नो सुजहा अधीरपुरीसेहिं ।
 अह सन्ति सुव्वया साहू, जे तरन्ति अतरं वणिया वा ॥ ६ ॥
 समणासु एगे वयमाणा, पाणवहं मिया अयाणन्ता ।
 मन्दा निरयं गच्छन्ति, बाला पावियाहिं दिट्ठीहिं ॥ ७ ॥
 न हु पाणवहं अणुजाणे, मुच्चेज्ज कयाइ सव्वदुक्खाणं ।
 एवारिएहिं अक्खायं, जेहिं इमो साधुधम्मो पत्तत्तो ॥ ८ ॥

पाणे य नाइवाएज्जा, से समीइ त्ति बुच्चई ताई ।
 तओ से पावयं कम्मं, निज्जाइ उदगं व थलाओ ॥ ९ ॥
 जमनिस्सिएहिं भूएहिं, तसनामेहिं थावरेहिं च ।
 नो तेसिमारमे दंडं, मणसा वायसा कायसा चेव ॥ १० ॥
 सुद्धेसणाओ नच्चाणं, तत्थ ठवेज्ज भिक्खू अप्पाणं ।
 जायाए घासमेसेज्जा, रसगिद्धे न सिया भिक्खाए ॥ ११ ॥
 पन्ताणि चेव सेवेज्जा, सीयपिंडं पुराणकुम्मासं ।
 अदु वक्कसं पुलागं वा, जवणट्ठाए निवेसए संघुं ॥ १२ ॥
 जे लक्खणं च सुविणं, अङ्गविज्जं च जे पउज्जन्ति ।
 न हु ते समणा वृच्चन्ति, एवं आयरिएहिं अक्खायं ॥ १३ ॥
 इहजीवियं अणियमेत्ता, पभट्ठा समाहिजोएहिं ।
 ते कामभोगरसगिद्धा, उववज्जन्ति आसुरे काए ॥ १४ ॥
 तत्तो वि य उव्वट्ठित्ता, संसारं बहु अणुपरियडन्ति ।
 बहुकम्मलेवलित्ताणं, बोही होइ सुदुल्लहा तेसिं ॥ १५ ॥
 कसिणंपि जो इमं लोयं, पडिपुण्णं दलेज्ज इक्कस्स ।
 तेणावि से न संतुस्से, इइ दुप्परए इमे आया ॥ १६ ॥
 जहा लाहो तहा लोहो, लाहा लोहो पवड्ढई ।
 दोमासकयं कज्जं, कोडीए वि न निट्ठियं ॥ १७ ॥
 नो रक्खसीसु गिज्जेज्जा, गंडवच्छासु ऽणोगचित्तासु ।
 जाओ पुरिसं पलोभित्ता, खेल्लन्ति जहा व दासेहिं ॥ १८ ॥
 नारीसु नोवगिज्जेज्जा, इत्थी विप्पजहे अणागारे ।
 धम्मं च पेसलं नच्चा, तत्थ ठवेज्ज भिक्खू अप्पाणं ॥ १९ ॥
 इअ एस धम्मे अक्खाए, कविलेणं च विमुद्धपन्नेणं ।
 तरिहन्ति जे उ काहन्ति, तेहिं आराहिया दुवे लोग ॥ २० ॥
 त्ति बेमि ॥ इअ काविलीयं अट्ठमं अज्झयणं समत्तं ॥ ८ ॥

॥ अह न नमिपठवज्जा अज्झयणं ॥

चइऊण देवलोगाओ, उववन्नो माणुसम्मि लोगम्मि । उवसन्तमोहणिज्जो, सरई पोरणिं जाइं ॥ १ ॥
 जाइं सरित्तु भयवं, सहसंबुद्धो अणुत्तरे धम्मे । पुत्तं ठवेत्तु रज्जे, अभिणिक्खमई नमी राया ॥ २ ॥
 से देवलोगसरिसे, अन्तेउरवग्गओ वरे भोए । भुजित्तु नमी राया, बुद्धो भोगे परिच्चयई ॥ ३ ॥
 मिहिलं सपुरजणवयं, बलमारोहं च परियणं सव्वं । चिच्चा अभिनिखन्तो, एगन्तमहिड्ढीओ भयवं ॥ ४ ॥
 कोलाहलगसभूयं, आसी मिहिलाए पव्वयन्तम्मि । तइया रायरिसिम्मि, नमिम्मि अभिणिक्खमंतम्मि ॥ ५ ॥

अब्भुट्टियं रायरिसिं, पव्वज्जाठाणमुत्तमं । सक्को माहणरूवेण, इमं वयणमब्भवी ॥ ६ ॥
 किण्णु भो अज्ज मिहिला, कोलाहलगसंकुला । सुव्वन्ति दारुणा सद्दा, पासाएमु गिहेसु य ॥ ७ ॥
 एयमट्ठं निसामित्ता, हेऊकारणचोइओ । तओ नमी रायरिसी, देविन्दो इणमब्भवी ॥ ८ ॥
 मिहिलाए चेइए वच्छे, सीयच्छाए मणोरमे । पत्तपुप्फफलोवेए, बहूणं बहुगुणे सया ॥ ९ ॥
 वाएण हीरमाणम्मि, चेइयम्मि मणोरमे । दुहिया असरणा अत्ता, एए कन्दन्ति भो खगा ॥ १० ॥
 एयमट्ठं निसामित्ता, हेऊकारणचोइओ । तओ नमिं रायरिसिं, देविन्दो इणमब्भवी ॥ ११ ॥
 एस अग्गी य वाऊ य, एवं डज्झइ मन्दिरं । भयवं अन्तेउरं तेणं, कीस णं नावपेक्खह ॥ १२ ॥
 एयमट्ठं निसामित्ता, हेऊकारणचोइओ । तओ नमी रायरिसी, देविन्दो इणमब्भवी ॥ १३ ॥
 सुहं वसामो जीवामो, जेसि मो नत्थि किंचण । मिहिलाए डज्झइमाणीए, न मे डज्झइ किंचण ॥ १४ ॥
 चत्तपुत्तकलत्तस्स, निव्वावारस्स भिक्खूणो । पियं न विज्जई किंचि, अप्पियं पि न विज्जई ॥ १५ ॥
 बहं खु मुणिणो भदं, अणगारस्स भिक्खूणो । सव्वओ विप्पमुक्कस्स, एगन्तमणुपसओ ॥ १६ ॥
 एयमट्ठं निसामित्ता, हेऊकारणचोइओ । तओ नमी रायरिसी, देविन्दो इणमब्भवी ॥ १७ ॥
 पागारं कारइत्ताणं, गोपुरट्ठालगाणि च । उस्सूलगसयग्घीओ, तओ गच्छसि खत्तिया ॥ १८ ॥
 एयमट्ठं निसामित्ता, हेऊकारणचोइओ । तओ नमी रायरिसी, देविन्दो इणमब्भवी ॥ १९ ॥
 सद्धं नगरं किच्चा, तवसंवरमग्गलं । खन्ति निउणपागारं, तीगुत्तं दुप्पधंसयं ॥ २० ॥
 धणुं परक्कमं किच्चा, जीवं च इरियं सया । धिइं च केयणं किच्चा, सच्चेण पल्लिमन्थए ॥ २१ ॥
 तवनारायजुत्तेण, मित्तूणं कम्मकंचुयं । मुणी विजयसंगामो, भावाओ परिमुच्चए ॥ २२ ॥
 एयमट्ठं निसामित्ता, हेऊकारणचोइओ । तओ नमिं रायरिसिं, देविन्दो इणमब्भवी ॥ २३ ॥
 पासाए कारइत्ताणं, बद्धमाणगिहाणि य । बालग्गपोइयाओ य, तओ गच्छसि खत्तिया ॥ २४ ॥
 एयमट्ठं निसामित्ता, हेऊकारणचोइओ । तओ नमी रायरिसी, देविन्दो इणमब्भवी ॥ २५ ॥
 संसयं खलु सो कुणई, जो मग्गे कुणई घरं । जत्थेव गन्तुमिच्छेज्जा, तत्थ कुव्वेज्ज सासयं ॥ २६ ॥
 एयमट्ठं निसामित्ता, हेऊकारणचोइओ । तओ नमिं रायरिसिं, देविन्दो इणमब्भवी ॥ २७ ॥
 आमोसे लोमहारे य, गंठिमेए य तक्करे । नगरस्स खेमं काऊणं, तओ गच्छसि खत्तिया ॥ २८ ॥
 एयमट्ठं निसामित्ता, हेऊकारणचोइओ । तओ नमी रायरिसी, देविन्दो इणमब्भवी ॥ २९ ॥
 असइं तु मणुस्सेहिं, मिच्छा दंडो पजुज्झइ । अकारिणोऽत्थ वज्झन्ति, मुच्चई कारओ जणो ॥ ३० ॥
 एयमट्ठं निसामित्ता, हेऊकारणचोइओ । तओ नमिं रायरिसिं, देविन्दो इणमब्भवी ॥ ३१ ॥
 जे केइ पत्थिवा तुज्झं, नानमन्ति नराहिवा । वसे ते ठावइत्ताणं, तओ गच्छसि खत्तिया ॥ ३२ ॥
 एयमट्ठं निसामित्ता, हेऊकारणचोइओ । तओ नमी रायरिसी, देविन्दो इणमब्भवी ॥ ३३ ॥
 जो सहस्सं सहस्साणं, संगामे दुज्जए जिणे । एगं जिणेज्ज अप्पाणं, एस से परमो जओ ॥ ३४ ॥
 अप्पणामेव जुज्झाहि, किं ते जुज्जेण बज्झओ । अप्पणामेवमप्पाणं, जइत्ता सुहमेहए ॥ ३५ ॥
 पंचिन्दियाणि कोहं, माणं मायं तहेव लोहं च । दुज्जयं चेव अप्पाणं, सव्वं अप्पे जिए जियं ॥ ३६ ॥
 एयमट्ठं निसामित्ता, हेऊकारणचोइओ । तओ नमिं रायरिसिं, देविन्दो इणमब्भवी ॥ ३७ ॥
 जइत्ता विउले जन्ने, भोइत्ता समणमाहणे । दत्ता भोच्चा य जिट्ठा य, तओ गच्छसि खत्तिया ॥ ३८ ॥

एयमट्ठं निसामित्ता, हेऊकारणचोइओ । तओ नमी रायरिसी, देविन्दो इणमब्बवी ॥ ३९ ॥
 जो सहस्सं सहस्साणं, मासे मासे गवं दए । तस्स वि संजमो सेओ, अदिन्तस्स वि किंचण ॥ ४० ॥
 एयमट्ठं निसामित्ता, हेऊकारणचोइओ । तओ नमिं रायरिसिं, देविन्दो इणमब्बवी ॥ ४१ ॥
 घोरासमं चइत्ताणं, अन्नं पत्थेसि आसमं । इहेव पोसहरओ, भवाहिवा मणुयाहिवा ॥ ४२ ॥
 एयमट्ठं निसामित्ता, हेऊकारणचोइओ । तओ नमी रायरिसिं, देविन्दो इणमब्बवी ॥ ४३ ॥
 मासे मासे तु जो बालो, कुसग्गेण तु भुंजए । न सो सक्खायधम्मस्स, कलं अग्घइ सोलसिं ॥ ४४ ॥
 एयमट्ठं निसामित्ता, हेऊकारणचोइओ, तओ नमिं रायरिसिं, देविन्दो इणमब्बवी ॥ ४५ ॥
 हिरणं सुवणं मणिमुत्तं, कंसं दूसं च वाहणं । कोसं वड्ढावइत्ताणं, तओ गच्छसि स्वत्तिया ॥ ४६ ॥
 एयमट्ठं निसामित्ता, हेऊकारणचोइओ । तओ नमी रायरिसिं, देविन्दो इणमब्बवी ॥ ४७ ॥

सुवण्णरूपस्स उ पव्वया भवे, सिया हु केलाससमा असंखया ।

नरस्स लुद्धस्स न तेहिं किंचि, इच्छा उ आगाससमा अणन्तिया ॥ ४८ ॥
 पुढवी साली जवा चेव, हिरणं पसुभिस्सह । पडिपुणं नालमेगस्स, इइ विज्जा तवं चरे ॥ ४९ ॥
 एयमट्ठं निसामित्ता, हेऊकारणचोइओ । तओ नमिं रायरिसिं, देविन्दो इणमब्बवी ॥ ५० ॥
 अच्छेरयमब्भुए, भोए चयसि पत्थिवा । असन्ते कामे पत्थेसि, सकप्पेण विहम्मसि ॥ ५१ ॥
 एयमट्ठं निसामित्ता, हेऊकारणचोइओ । तओ नमी रायरिसी, देविन्दो इणमब्बवी ॥ ५२ ॥
 सल्लं कामा विसं कामा, कामा आसोविसोवमा । कामे पत्थेमाणा, अकामा जन्ति दोग्गइ ॥ ५३ ॥
 अहे वयन्ति कोहेणं, माणेणं अहमा गई । माया गई पडिग्घाओ, लोभाओ दुहओ भयं ॥ ५४ ॥
 अवउज्झिऊण माहणरूवं, विउव्विऊण इन्दत्तं । बन्दइ अभित्थुणन्तो, इमाहि महुराहिं वग्गूहिं ॥ ५५ ॥
 अहो ते निज्जिओ कोहो, अहो माणो पराजिओ । अहो निरक्किया माया, अहो लोभो वसीकओ ॥ ५६ ॥
 अहो ते अज्जवं साहु, अहो ते साहु महवं । अहो ते उत्तमा खन्ती, अहो ते मुत्ति उत्तमा ॥ ५७ ॥
 इहं सि उत्तमो भन्ते, पच्छा होहिसि उत्तमो । लोपुत्तमुत्तमं ठाणं, सिद्धिं गच्छसि नीरओ ॥ ५८ ॥
 एवं अभित्थुणन्तो, रायरिसिं उत्तमाए सद्दाए । पयाहिणं करेन्तो, पुणो पुणो बन्दई सक्को ॥ ५९ ॥
 तो वन्दिऊण पाए, चक्ककुसलक्खणे मुणिवरस्स । आगासेणुप्पइओ, ललियचलकुंडलतिरीडी ॥ ६० ॥
 नमी नमेइ अप्पाणं, सक्खं सक्केण चोइओ । चइऊण गेहं च वेदेही, सामण्णे पज्जुवट्ठिओ ॥ ६१ ॥
 एवं करेन्ति संबुद्धा, पंडिया पवियक्खणा । विणियट्ठन्ति भोगेसु, जहा से नमी रायरिसि ॥ ६२ ॥

त्ति बेमि ॥ इअ नमिपव्वज्जा समत्ता ॥

॥ अह दुमपत्तयं दसमं अज्झयणं ॥

दुमपत्तए पंडुयए जहा, निवडइ राइगणाण अच्चए ।
 एवं मणुयाण जीवियं, समयं गोयम मा पमायए ॥ १ ॥
 कुसग्गे जह ओसबिन्दुए, थोवं चिट्ठइ लम्बमाणए ।
 एवं मणुयाण जीवियं, समयं गोयम मा पमायए ॥ २ ॥
 इइ इत्तरियम्मि आउए, जीवियए बहुपच्चवायए ।
 विहुणाहि रयं पुरे कडं, समयं गोयम मा पमायए ॥ ३ ॥
 दुल्लहे खलु माणुसे भवे, चिरकाले वि सव्वपाणिणं ।
 गाढा य विवाग कम्मुणो, समयं गोयम मा पमायए ॥ ४ ॥
 पुढविक्कायमइगओ, उक्कोसं जीवो उ संवसे ।
 कालं संखाईयं, समयं गोयम मा पमायए ॥ ५ ॥
 आउक्कायमइगओ, उक्कोसं जीवो उ संवसे ।
 कालं संखाईयं, समयं गोयम मा पमायए ॥ ६ ॥
 तेउकायमइगओ, उक्कोसं जीवो य संवसे ।
 कालं संखाईयं समयं गोयम मा पमायए ॥ ७ ॥
 वाउक्कायमइगओ, उक्कोसं जीवो य संवसे ।
 कालं संखाईयं, समयं गोयम मा पमायए ॥ ८ ॥
 वणस्सइकायमइगओ, उक्कोसं जीवो उ संवसे ।
 कालमणन्तदुरन्तयं समयं गोयम मा पमायए ॥ ९ ॥
 बेइन्दिक्कायमइगओ, उक्कोसं जीवो उ संवसे ।
 कालं संखिज्जसन्नियं, समयं गोयम मा पमायए ॥ १० ॥
 तेइन्दिक्कायमइगओ, उक्कोसं जीवो उ संवसे ।
 कालं संखिज्जसन्नियं, समयं गोयम मा पमायए ॥ ११ ॥
 चउरिन्दिक्कायमइगओ, उक्कोसं जीवो उ संवसे ।
 कालं संखिज्जसन्नियं, समयं गोयम मा पमायए ॥ १२ ॥
 पंचिन्दिक्कायमइगओ, उक्कोसं जीवो उ संवसे ।
 सत्तट्ठभवगहणे, समयं गोयम मा पमायए ॥ १३ ॥
 देवे नेरइए यमइगओ, उक्कोसं जीवो उ संवसे ।
 इक्केक्कभवगहणे, समयं गोयम मा पमायए ॥ १४ ॥
 एवं भवसंसारे, संसरइ सुहासुहेहि कम्मेहिं ।
 जीवो पमायबहुलो, समयं गोयम मा पमायए ॥ १५ ॥

लद्धूण वि माणुसत्तणं, आरिअत्तं पुणरावि दुल्लहं ।
 विगलिन्दियया हु दीसई, समयं गोयम मा पमायए ॥ १६ ॥
 लद्धूण वि आयरित्तणं, अहीणपंचेन्दियया हु दुल्लहा ।
 विगलिन्दियया हु दीसई, समयं गोयम मा पमायए ॥ १७ ॥
 अहीणपंचेन्दियत्तं पि से लहे, उत्तमधम्मसुई हु दुल्लहा ।
 कुत्तिथिनिवेसए जणे, समयं गोयम मा पमायए ॥ १८ ॥
 लद्धूण वि उत्तमं सुई, सद्दहणा पुणरावि दुल्लहा ।
 मिच्छत्तनिवेसए जणे, समयं गोयम मा पमायए ॥ १९ ॥
 धम्मं पि हु सद्दहन्तया, दुल्लहया काएण फासया ।
 इह कामगुणेहि मुच्छिया, समयं गोयम मा पमायए ॥ २० ॥
 परिजूरइ ते सरीरयं, केसा पण्डुरया हवन्ति ते ।
 से सोयबले य हायई, समयं गोयम मा पमायए ॥ २१ ॥
 परिजूरइ ते सरीरयं, केसा पण्डुरया हवन्ति ते ।
 से चक्खुबले य हायई, समयं गोयम मा पमायए ॥ २२ ॥
 परिजूरइ ते सरीरयं, केसा पण्डुरया हवन्ति ते ।
 से घाणबले य हायई, समयं गोयम मा पमायए ॥ २३ ॥
 परिजूरइ ते सरीरयं, केसा पण्डुरया हवन्ति ते ।
 से जिब्भबले य हायई, समयं गोयम मा पमायए ॥ २४ ॥
 परिजूरइ ते सरीरयं, केसा पण्डुरया हवन्ति ते ।
 से फासबले य हायई, समयं गोयम मा पमायए ॥ २५ ॥
 परिजूरइ ते सरीरयं, केसा पण्डुरया हवन्ति ते ।
 से सव्वबले य हायई, समयं गोयम मा पमायए ॥ २६ ॥
 अरई गण्डं विसइया, आयंका विविहा फुसन्ति ते ।
 विहडइ विद्धंसइ ते सरीरयं, समयं गोयम मा पमायए ॥ २७ ॥
 वोच्छिन्द सिणेहमप्पणो, कुमुयं सारइयं व पाणियं ।
 से सव्वसिणेहवज्जिए, समयं गोयम मा पमायए ॥ २८ ॥
 चिच्चाण धणं च भारियं, पव्वइओ हि सिअणगारियं ।
 मा वन्तं पुणो वि आइए, समयं गोयम मा पमायए ॥ २९ ॥
 अवउज्झिय मित्तबन्धवं, विउलं चेव धणोहसंचयं ।
 मा तं विउयं गवेसए, समयं गोयम मा पमायए ॥ ३० ॥
 न हु जिणे अज्ज दिस्सई, बहुमए दिस्सइ मग्गदेसिए ।
 संपइ नेयाउए पहे, समयं गोयम मा पमायए ॥ ३१ ॥
 अवसोहिय कण्टगा पहं, ओइण्णो सि पहं महालयं ।

गच्छसि मगं विसोहिया, समयं गोयम मा पमायए ॥ ३२ ॥
 अबले जह भारवाहए, मा मग्गे विसमे वगाहिया ।
 पच्छा पच्छाणुतावए, समयं गोयम मा पमायए ॥ ३३ ॥
 तिण्णो हु सि अण्णवं महं, किं पुण चिट्ठसि तीरमागओ ।
 अभितुर पारं गमित्तए, समयं गोयम मा पमायए ॥ ३४ ॥
 अकलेवरसेणिं उस्सिया, सिद्धिं गोयम लोयं गच्छसि ।
 खेमं च सिवं अणुत्तरं, समयं गोयम मा पमायए ॥ ३५ ॥
 बुद्धे परिनिबुद्धे चरे, गामगए नगरे व संजए ।
 सन्तीमगं च वूहए, समयं गोयम मा पमायए ॥ ३६ ॥
 बुद्धस्स निसम्म भासियं, सुकहियमट्ठपओवसोहियं ।
 रागं दोसं च छिन्दिया, सिद्धिगइं गए गोयमे ॥ ३७ ॥
 त्ति वेमि ॥ इअ दुमपत्तयं समत्तं ॥ १० ॥

॥ अह बहुस्सुयपुज्जं एगारसं अज्झयणं ॥

संजोगा विप्पमुक्कस्म, अणगारस्स भिक्खुणो । आयारं पाउकरिस्सामि, आणुपुत्विं सुणेह मे ॥ १ ॥
 जे यावि होइ निन्विजे, थद्धे लुद्धे अणिग्गहे अभिक्खणं उल्लयई, अविणीए अबहुस्सुए ॥ २ ॥
 अह पंचहिं ठाणेहिं, जेहिं सिक्खा न लब्भई । थम्भा कोहा पमाएणं, रोगेणालस्सएण य ॥ ३ ॥
 अह अट्ठहिं ठाणेहिं, सिक्खासीलि त्ति बुच्चई । अहस्सिरे सया दन्ते, न य मम्ममुदाहरे ॥ ४ ॥
 नासीले न विसीले, न सिया अइलोलुए । अकोहणे सच्चरए, सिक्खासीलि त्ति बुच्चई ॥ ५ ॥
 अह चोइसहिं ठाणेहिं, वट्ठमाणे उ संजए । अविणीए बुच्चई सो उ, निव्वाणं च न गच्छइ ॥ ६ ॥
 अभिक्खणं कोही हवइ, पबन्धं च पकुव्वई । मेत्तिज्जमाणो वमइ, सुयं लद्धूणमज्जई ॥ ७ ॥
 अवि पावपरिक्खेवी, अवि मित्तेसु कुप्पई । सुप्पियस्सावि मित्तस्स, रहे भासइ पावयं ॥ ८ ॥
 पइण्णवाई दुहिले, थद्धे लुद्धे अणिग्गहे । असंविभागी अवियत्ते, अविणीए त्ति बुच्चई ॥ ९ ॥
 अह पन्नरसहिं ठाणेहिं, सुविणीए त्ति बुच्चई । नीयावत्ती अचवले, अमाई अकुऊहले ॥ १० ॥
 अप्पं च अहिक्खिवई, पबन्धं च न कुव्वई । मेत्तिज्जमाणो भयई, सुयं लद्धुं न मज्जई ॥ ११ ॥
 न य पावपरिक्खेवी, न य मित्तेसु कुप्पई । अप्पियस्सावि मित्तस्स, रहे कल्लाण भासई ॥ १२ ॥
 कलहडमरबज्जिए बुद्धे अभिजाइए । हिरिमं पडिसंलीणे, सुविणीए त्ति बुच्चई ॥ १३ ॥
 वसे गुरुकुले निच्चं, जोगवं उवहाणवं । पियंकरे पियंवाई, से सिक्खं लद्धुमरिहई ॥ १४ ॥
 जहा संखम्मि पयं, निहियं दुहओ वि विरायइ । एवं बहुस्सुए भिक्खू, धम्मो किती तहा सुयं ॥ १५ ॥
 जहा से कम्बोयाणं, आइण्णे कन्थए सिया । आसे जवेणं पवरे, एवं हवइ बहुस्सुए ॥ १६ ॥
 जहाइण्णसमारूढे, सूरु दट्ठपरकमे । उभओ नन्दिघोसेणं, एवं हवइ बहुस्सुए ॥ १७ ॥
 जहा करेणुपरिकिण्णे, कुंजरे सट्ठिहायणे । बलवन्ते अप्पडिहए, एवं हवइ बहुस्सुए ॥ १८ ॥

जहा से तिकखसिंगे, जायखन्धे विरायई । वसई जूहाहिवई, एवं हवइ बहुस्सुए ॥ १९ ॥
 जहा से तिकखदाढे, उदग्गे दुप्पहंसए । सीहे मियाण पवरे, एवं हवइ बहुस्सुए ॥ २० ॥
 जहा से वासुदेवे, संखचकगयाधरे । अप्पडिहयबले जोहे, एवं हवइ बहुस्सुए ॥ २१ ॥
 जहा से चाउरन्ते, चक्कवट्टीमहिड्डिए । चोदसरयणाहिवई, एवं हवइ बहुस्सुए ॥ २२ ॥
 जहा से सहारसक्खे, वज्जपाणी पुरन्दरे । सक्के देवाहिवई, एवं हवइ बहुस्सुए ॥ २३ ॥
 जहा से तिमिरविट्ठंसे, उच्चिट्ठन्ते दिवायरे । जलन्ते इव तेएण, एवं हवइ बहुस्सुए ॥ २४ ॥
 जहा से उडुवई चन्दे, नक्खत्तपरिवारिए । पडिपुण्णे पुण्णमासीए, एवं हवइ बहुस्सुए ॥ २५ ॥
 जहा से समाइयाणं, कोट्टागारे सुरक्खिए । नाणाधन्नपडिपुण्णे, एवं हवइ बहुस्सुए ॥ २६ ॥
 जहा सा दुमाण पवरा, जम्बू नाम सुदंसणा । अणाटियस्स देवस्स, एवं हवइ बहुस्सुए ॥ २७ ॥
 जहा सा नईण पवरा, सलिला सागरंगमा । सीया नीलवन्तपवहा, एवं हवइ बहुस्सुए ॥ २८ ॥
 जहा से नगाण पवरे, सुमहं मन्दरे गिरी । नाणोमहिपज्जलिए, एवं हवइ बहुस्सुए ॥ २९ ॥
 जहा से सयंभुरमणे, उदही अक्खओदए । नाणारयणपडिपुण्णे, एवं हवइ बहुस्सुए ॥ ३० ॥

समुद्दगम्भीरसमा दुरासया, अचक्किया केणइ दुप्पहंसया ।

सुयस्स पुण्णा विउलस्स ताइणो, खवित्तु कम्मं गइमुत्तमं गया ॥ ३१ ॥

तम्हा सुयमहिट्ठिज्जा, उत्तमद्दगवेसए । जेणप्पाणं परं चेव, सिद्धिं संपाउणेज्जासि ॥ ३२ ॥

त्ति वेमि ॥ इअ बहुस्सुयपुज्जं समत्तं ॥ ११ ॥

॥ अह हरिएसिज्जं बारहं अज्झयणं ॥

सोवागकुलसंभूओ, गुणुत्तरधरो मुणी, हरिएसबलो नाम, आसि भिक्खू जिइन्दिओ ॥ १ ॥
 इरिएसणभासाए, उच्चारसमिईसु य । जओ आयाणनिकखेवे, संजओ सुसमाहिओ ॥ २ ॥
 मणगुत्तो वयगुत्तो, कायगुत्तो जिइन्दिओ । भिक्खट्ठा बम्भइज्जम्मि, जन्नवाडे उवट्ठिओ ॥ ३ ॥
 तं पासिऊणं एज्जन्तं, तवेण परिसोसियं । पन्तोवहिउवगरणं, उवहसन्ति अणारिया ॥ ४ ॥
 जाईमयपडिथट्ठा, हिंसगा अजिइन्दिया । अबम्भचारिणो बाला, इमं वयणमव्ववी ॥ ५ ॥

कयरे आगछइ दित्तरूवे, काले विगराले फोकनासे ।

ओमचेलए पंसुपिसायभूए, संकरदूसं परिवरिय कण्ठे ॥ ६ ॥

को रे तुमं इय अदंसणिज्जे, काए व आसाइहमागओसि ।

ओमचेलया पंसुपिसायभूया, गच्छक्खलाहिं किमिहिं ठिओ सि ॥ ७ ॥

जक्खे तहिं तिन्दुरुक्खवासी, अणुकम्पओ तस्स महामुणिस्स ।

पच्छायइत्ता नियगं सरीरं, इमाइं वयणाइमुदाहरित्था ॥ ८ ॥

समणो अहं संजओ, बम्भयारी, विरओ धणपयणपरिग्गहाओ ।

परप्पवित्तस्स उ भिक्खकाले, अन्नस्स अट्ठा इहमागओमि ॥ ९ ॥

वियरिज्जइ खज्जइ भुज्जइ, अन्नं पभूयं भवयाणमेयं ।

जाणेह मे जायणजीविणु नि, सेसावसेसं लभऊ एवस्सी ॥ १० ॥
 उवक्खडं भोयण माहणाणं, अत्तद्धियं सिद्धमिहेगपक्खं ।
 न ऊ वयं एरिसमन्नपाणं, दाहामु तुज्झं किमिहं ठिओ सि ॥ ११ ॥
 थलेसु वीयाइ ववन्ति कासगा, तदेव निन्ने सु य आससाए ।
 एयाए सद्दाए दलाह मज्झं, आराहए पुण्णमिणं खु खित्तं ॥ १२ ॥
 खेत्ताणि अम्हं विइयाणि लोए, जहिं पकिण्णा विरुहन्ति पुण्णा ।
 जे माहणा जाइविज्जोववेया, ताइं तु खेत्ताइ सुपेसलाइ ॥ १३ ॥
 कोहो य माणो य वहो य जेसिं, मोसं अदत्तं च परिग्गहं च ।
 ते माहणा जाइविज्जाबिहूणा, ताइं तु खेत्ताइ सुपावयाइ ॥ १४ ॥
 तुम्भेत्थ भो मारधरा गिराणं, अट्ठं न जाणेह अहिज्ज वेए ।
 उच्चावयाइं मुणिणो चरन्ति, ताइं तु खेत्ताइ सुपेसलाइ ॥ १५ ॥
 अज्झावयाणं पण्डिकूलमासी, पभाससे किं तु सगासि अम्हं ।
 अवि एयं विणस्सउ अन्नपाणं, न य णं दाहामु तुमं नियण्ठा ॥ १६ ॥
 समिईहि मज्झं सुसमाहियस्स, गुत्तीहि गुत्तम्स जिइन्दियस्स ।
 जइ मे न दाहित्थ अहेसणिज्जं, किमज्ज जन्नाण लहित्थ लाहं ॥ १७ ॥
 के एत्थ खत्ता उवजोइया वा, अज्झावया वा सह खण्डिएहिं ।
 एयं दण्डेण फलपण इन्ता, कण्ठम्मि घेत्तूण खलेज्ज जोणं ॥ १८ ॥
 अज्झावयाणं वयणं सुणेत्ता, उद्धाइया तत्थ बहूकुमारा ।
 दण्डेहि विचेहि कसेहि चेव, समागया तं इसि तालयन्ति ॥ १९ ॥
 रन्नो तहिं कोसलियस्स धूया, भदत्ति नामेण अणिन्दियंगी ।
 तं पासिया संजय हम्ममाणं, कुद्धे कुमारे परिनिव्ववेइ ॥ २० ॥
 देवाभिओगेण निओइएणं, दिन्ना मु रन्ना मणसा न भाया ।
 नरिन्ददेविन्दभिवन्दिएणं, जेणम्मि वन्ता इसिणा स एसो ॥ २१ ॥
 एसो हु सो उम्मतवो महप्पा, जितिन्दिओ संजओ बम्भयारी ।
 जो मे तथा नेच्छइ दिज्जमाणिं, पिउणा सयं कोसलिएण रन्ना ॥ २२ ॥
 महाजसो एम महाणुभागो, घोस्वओ घोपरइमो य ।
 मा एयं हीलेह अहीलणिज्जं, मा सव्वे तेएण भे निहहेज्जा ॥ २३ ॥
 एयाइं तीसे वयणाइ सोच्चा, पत्तीइ भद्दाइ सुहासियाइं ।
 इसिस्स वेयावडियट्ठयाए, जक्खा कुमारे विणिवारयन्ति ॥ २४ ॥
 ते घोररूवा ठिय अन्तलिक्खेऽसुरा तहिं तं जण तालयन्ति ।
 ते भिन्नदेहे रुहिरं वमन्ते, पासित्तु भद्दा इणमाहु भुज्जो ॥ २५ ॥
 गिरिं नहेहिं खणह, अयं मन्तेहिं खायह ।
 जायतेय पाएहि हणह, जे भिक्खुं अवमन्नह ॥ २६ ॥

आसीविसो उगगतवो महेसी, घोरव्वओ परकमो य ।
 अगणिं व पक्खन्द पयंगसेणा, जे भिक्खुयं भत्तकाले वदेह ॥ २७ ॥
 सीसेण एयं सरणं उवेह, समागया सव्वजणेण तुब्भे ।
 जइ इच्छह जीवियं वा धणं वा, लोगंपि एसो कुविओ डहेज्जा ॥ २८ ॥
 अवहेडिय पिट्टिसउत्तमंगे, पसारिया बाहु अकमचेट्टे ।
 निज्जेरियच्छे रुहिरं वमन्ते, उद्धंमुहे निग्गयजीहनेत्ते ॥ २९ ॥
 ते पासिया खण्डियकट्ठभूए, विमणो विसण्णो अह माहणो सो ।
 इसिं पसाएइ सभारियाओ, हीलं च निन्दं च खमाह भन्ते ॥ ३० ॥
 बालेहि मूढेहि अयाणएहिं, जं हीलिया तस्स खमाह भन्ते ।
 महप्पसाया इसिणो हवन्ति, न हु मुणी कोवपरा हवन्ति ॥ ३१ ॥
 पुण्वि च इण्हि च अणागयं च, मणप्पदोसो न मे अत्थि कोइ ।
 जक्खा हु वेयावडियं करेन्ति, तम्हा हु एए निहया कुमारा ॥ ३२ ॥
 अत्थं च धम्मं च वियाणमाणा, तुब्भं न वि कुप्पह भूइपन्ना ।
 तुब्भं तु पाए सरणं उवेमो, समागया सव्वजणेण अम्हे ॥ ३३ ॥
 अच्चेसु ते महाभाग, न ते किंचि न अच्चिमो ।
 भुंजाहि सालिमं कूरं, नाणावंजणसंजुयं ॥ ३४ ॥
 इमं च मे अत्थि पभूयमन्नं, तं भुंजस्स अम्ह अणुगहट्ठा ।
 बाढं ति पडिच्छइ भत्तपाणं, मासस्स ऊ पारणए महप्पा ॥ ३५ ॥
 तहियं गन्धोदयपुप्फवासं, दिव्वा तर्हि वसुहारा य वुट्ठा ।
 पहयाओ दुन्दुहीओ सुरेहिं, आगासे जहो दाणं च घुट्ठं ॥ ३६ ॥
 सक्खं खु दीसइ तवोविसेसो, न दीसई जाइविसेस कोई ।
 सोवागपुत्तं, हरिएससाहुं, जस्सेरिसा इड्ढि महाणुभागा ॥ ३७ ॥
 किं माहणा जोइसमारभन्ता, उदएण सोहिं बहिया विमग्गह ।
 जं मग्गहा बाहिरियं विसोहिं, न तं सुइट्ठं कुसला वयन्ति ॥ ३८ ॥
 कुसं च जूवं तणकट्ठमीणिं, सायं च पायं उदगं फुसन्ता ।
 पाणाइ भूयाइ विहेडयन्ता, भुज्जो वि मन्दा पगरेह पावं ॥ ३९ ॥
 कहं च रे भिक्खु वयं जयामो, पावाइ कम्माइ पुणोल्लयामो ।
 अक्खाहि णे संजय जक्खपूइया, कहं सुजट्ठं कुसला वयन्ति ॥ ४० ॥
 छज्जीवकाए असमारभन्ता, मोसं अदत्तं च असेवमाणा ।
 परिग्गहं इत्थिओ माणमायं, एयं परिन्नाय चरन्ति दन्ता ॥ ४१ ॥
 सुसंबुडा पंचहिं संवरेहिं, इह जीवियं अणवकंसमाणा ।
 वोसट्ठकाइ सुइचत्तदेहा, महाजयं जयइ जन्नसिट्ठं ॥ ४२ ॥
 के ते जोई के व ते जोइठाणे, का ते सुया किं व ते कारिसंगं ।

एहा य ते कयरा सन्ति भिक्खू, कयरेण होमेण हुणासि जोई ॥ ४३ ॥
 तवो जोई जीवो जोइठाणं, जोगा सुया सरीरं कारिसंगं ।
 कम्मेहा संजमजोगसन्ती, होमं हुणामि इसिणं पसत्थं ॥ ४४ ॥
 के ते हरए के य ते सन्तितित्थे, कहिं सिणाओ व रयं जहासि ।
 आइक्ख णे संजय जक्खपूइया, इच्छामो नाउं भवओ सगासे ॥ ४५ ॥
 धम्मे हरए बम्मे सन्तितित्थे, अणाविले अत्तपसन्नछेसे ।
 जहिं सिणाओ विमलो विसुद्धो, सुसीइभूओ पजहामि दोसं ॥ ४६ ॥
 एयं सिणाणं कुसलेहि दिट्ठं, महासिणाणं इसिणं पसत्थं ।
 जहि सिणाया विमला विसुद्धा, महारिसी उत्तमं ठाणं पत्त ॥ ४७ ॥

त्ति बेमि ॥ इअ हरिएसिज्जं समत्तं ॥ १२ ॥

॥ अह चित्तसम्भूइज्जं तेरहमं अज्झयणं ॥

जाईपराजइओ खलु, कासि नियाणं तु हत्थिणपुरम्मि। जुलणीए बम्भदत्तो, उववन्नो पउग्गुमाओ ॥ १ ॥
 कम्पिह्हे सम्भूओ, चित्तो पुण जाओ पुरमतालम्मि। सेट्टिकुलम्मि विसाले, धम्मं सोऊण पव्वइओ ॥ २ ॥
 कम्पिह्ळम्मि य नयरे, समागया दो वि चित्तसम्भूया। सुहदुक्खफलविवागं, कहेन्ति ते एकंमेक्कस्स ॥ ३ ॥
 चक्कवट्ठी महिड्ढीओ, बम्भदत्तो महायसो। भायरं बहुमाणेणं, इमं वयणमवब्बी ॥ ४ ॥
 आसीमुं भायरो दोवि, अन्नमन्नवसाणुगा। अन्नमन्नमणूरत्ता, अन्नमन्नहिएसिणो ॥ ५ ॥
 दासा दसण्णे आसीमु, मिया कालिंजरे नगे। हंसा मयंगतीरे, सोवागा कासिभूमिए ॥ ६ ॥
 देवा य देवलोगम्मि, आसि अम्हे महिड्ढीया। इमा नो छट्ठिया जाई, अन्नमन्नेण जा विणा ॥ ७ ॥
 कम्मा नियाणपयडा, तुमे राय विचिन्तिया। तेसिं फलविवागेण, विप्पओगमुवागया ॥ ८ ॥
 सच्चसोयप्पेगडा, कम्मा मए पुंरा कंडा। ते अज्ज परिभुंजामो, किं तु चित्तेवि से तहा ॥ ९ ॥

सव्वं सुच्चिष्णं सफलं नराणं, कडाण कम्माण न मोक्ख अत्थि ।

अत्थेहि कामेहि य उत्तमेहिं, आया ममं पुण्णफलोववेए ॥ १० ॥

जाणाहि संभूय महाणुभागं, महिड्ढीयं पुण्णफलोववेयं ।

चित्तं पि जाणाहि तहेव रायं, इड्ढी जुई तस्स वियप्भूया ॥ ११ ॥

महत्थरूवा वयणप्पभूया, गाहाणुगीया नरसंघमज्जे ।

जं भिक्खुणो सीलगुणोववेया, इहं जयन्ते सुमणो मि जाओ ॥ १२ ॥

उच्चोयए महु कक्के य बम्मे, पवेइया आवसहा य रम्मा ।

इमं गिहं चित्त धंणप्भूयं, पंसाहि पंचालगुणोववेयं ॥ १३ ॥

नट्ठेहि गीएहि य वाइएहिं, नारीजणाहिं परियारयन्तो ।

भुंजाहि भोगाइ इमाइ भिक्खू, मम रोयई पध्वज्ज हु दुख ॥ १४ ॥

तं पुव्वनेहेण कयाणुरागं, नराहिवं कामगुणेषु गिद्धं ।
 धम्मस्सिओ तस्स हियाणुपेही, चित्तो इम वयणमुदाहरित्था ॥ १५ ॥
 सव्वं बिलवियं गीयं, सव्वं नट्टं विडम्बियं ।
 सव्वे आभरणा भारा, सव्वे कामा दुहावहा ॥ १६ ॥
 बालाभिरामेषु दुहावहेसु, न तं सुहं कामगुणेषु रायं ।
 विरत्तकामाण तवोहणाणं, जं भिक्खुणे सीलगुणे रयाणं ॥ १७ ॥
 नरिंद जाई अहमा नराणं, सोवागजाई दुहओ गयाणं ।
 जहिं वयं सव्वजणस्स, वेस्सां, वसी य सोवागनिवेसणेषु ॥ १८ ॥
 तीसे य जाईइ उ पावियाए, वुच्छां सोवागनिवेसणेषु ।
 सव्वस्स लोगस्स दुगंछणिज्जा, इहं तु कम्माइ पुरे कडाइं ॥ १९ ॥
 सो दाणि सिं राय महाणुभागो, महिड्ढी पुण्णफलोववेओ ।
 चइत्तु भोगाइ असासयाइं, आदाणहेउं अभिणिक्खमाहि ॥ २० ॥
 इह जीविए राय असासयम्मि, धणियं तु पुण्णाइ अकुव्वमाणो ।
 से सोयई मच्चुमुहोवणीए, धम्मं अंकाऊण परंसि लोए ॥ २१ ॥
 जहेह सीहो व मियं गहाय, मच्चू नरं नेइ हु अन्तकाले ।
 न तस्स माया व पियाव भाया, कालम्मि तम्मंसहरा भवन्ति ॥ २२ ॥
 न तस्स दुक्खं विभयन्ति, नाइओ, न मित्तवग्गा न सुया न बंधवा ।
 एक्को सयं पच्चणुहोइ दुक्खं, कत्तारमेव अणुजाइ कम्मं ॥ २३ ॥
 चेच्चा दुपयं च चउप्पयं च, खेतं गिहं धणधन्नं च सव्वं ।
 सकम्मबीओ अवसो पयाइ, परं भवं सुंदर पावगं वा ॥ २४ ॥
 तं एकं तुच्छसरीरगं से, चिईगयं दहिय उ पावगेणं ।
 भज्जा य पुत्तावि य नायओ य, दायरमन्नं अणुसंकमन्ति ॥ २५ ॥
 उवणिज्जई जीवियमप्पमायं, वण्णं जरा हरइ नरस्स राय ।
 पंचालराया वयणं सुणाहि, मा कासि कम्माइ महालयाइं ॥ २६ ॥
 अहं पि जाणामि जहेह साहू, जं मे तुमं साहमि वक्कमेयं ।
 भोगा इमे संगकरा हवन्ति, जे दुज्जया अज्जो अम्हारिसेहिं ॥ २७ ॥
 हत्थिणपुरम्मि चित्ता, दट्ठूणं नरवइं महिड्ढीयं ।
 कामभोगेषु गिद्धेणं, नियाणमसुहं कडं ॥ २८ ॥
 तस्स मे अपडिक्कन्तस्स, इमं एयारिसं फलं ।
 जाणमाणो वि जं धम्मं, कामभोगेषु मुच्छिओ ॥ २९ ॥
 नागो जहा पंकजलावसन्नो, दट्ठु थलं नाभिसमेइ तीरं ।
 एवं वयं कामगुणेषु गिद्धा, न भिक्खुणो मग्गमणुव्वयामो ॥ ३० ॥
 अचेइ कालो तरन्ति राइओ, न यावि भोगा पुरिसाण निच्चा ।

उविच्च भोगापुरिसं चयन्ति, दुमं जहा खीणफलं व पक्खी ॥ ३१ ॥
जइ तं सि भोगे चइउं असत्तो, अज्जाइ कम्माइ करेहि रायं ।
धम्मो ठिओ सव्वपयाणुकम्पी, तो होहिसि देवो इओ विउवी ॥ ३२ ॥
न तुज्झ भोगे चइऊण बुद्धी, गिद्धो सि आरम्भपरिगहेसु ।
मोहं कओ एत्तिउ विप्पलावु, गच्छामि रायं आनन्तिओ सि ॥ ३३ ॥
पंचालराया वि य बम्भट्त्तो, साहुस्स तस्स वयणं अफाउं ।
अणुत्तरे भुंजिय कामभोगे, अणुत्तरे सो नरए पविट्ठो ॥ ३४ ॥
चित्तो वि कामेहि विरत्तकामो, अदग्गचारित्ततवो महेसी ।
अणुत्तरं संजमं पालइत्ता, अणुत्तरं सिद्धिगहं गओ ॥ ३५ ॥
त्ति वेमि ॥ इअ चित्तसम्भूइज्जं समत्तं ॥

॥ अह उसुयारिज्जं चोदहमं अज्झयणं ॥

देवा भवित्ताण पुरे भवम्मी, केई च्चुया एगविमाणवासी ।
पुरे पुराणे उसुयारनामे, खाए समिद्धे सुरलोगरम्मो ॥ १ ॥
सकम्मसेसेण पुराकएणं, कुलेसुदग्गेसु य ते पसूया ।
निव्विण्णसंसारभया जहाय, जिणिंदमग्गं सरणं पवन्ना ॥ २ ॥
पुमत्तमागम्म कुमार दो वी, पुरोहिओ तस्स जसा य पत्ती ।
विसालकित्ती य तहोसुयारो, रायत्थ देवी कमलावई य ॥ ३ ॥
जाईजरामच्चुभयाभिभूया, वहिंविहाराभिनिविट्ठचित्ता ।
संसारचक्कस्स विमोक्खणट्ठा, ददंढुण ते कामगुणे विरत्ता ॥ ४ ॥
पियपुत्तगा दोन्नि वि माहणस्स, सकम्मसीलस्स पुरोहियस्स ।
सरित्तु पोराणिय तत्थ जाई, तहा भुचिण्णं तवसंजमं च ॥ ५ ॥
ते कामभोगेसु असज्जमाणा, आणुस्सएसुं जे यावि दिच्चा ।
मोक्खाभिकंखी अभिजायसद्धा, तायं उवागम्म इमं उदाहु ॥ ६ ॥
असासयं ददंढु इमं विहारं, बहुअन्तरायं न य हीयमाउं ।
तम्हा गिहिंसि न रइं लहामो, आमन्तयामो चरिस्सासु मोणं ॥ ७ ॥
अह तायगो तत्थ मुणीण तेसिं, तवस्स वाघायकरं वयासी ।
इमं वयं वेयविओ वयन्ति, जहा न होई असुयाण लोगो ॥ ८ ॥
अहिज्ज वेए परिविस्स विप्पे, पुत्ते परिट्ठप्प गिहंसि जाया ।
भोच्चाण भोए सह इत्थियाहिं, आरण्णगा होह मुणो पसत्था ॥ ९ ॥
सोयग्गिणा आयगुणिन्धणेणं, मोहाणिला पज्जलणाहिणं ।
संतच्चभावं परितप्पमाणं, लालप्पमाणं बहुहा बहुं च ॥ १० ॥

पुरोहिंयं तं कमसोऽणुणितं, निमंतयन्तं च सुए धणेणं ।
 जहकमं कामगुणेहि चेव, कुमारगा ते पसंमिक्ख वक्कं ॥ ११ ॥
 वेया अहीया न भवन्ति ताणं, भुत्ता दिया निन्ति तमं तमेणं ।
 जाया य पुत्ता न हवन्ति ताणं, को णाम ते अणुमन्नेज्ज एयं ॥ १२ ॥
 खणमेत्तसोक्खा बहुकालदुक्खा, पगामदुक्खा अणिगामसोक्खा ।
 संसारमोक्खस्स विपक्खभूया, खाणी अणत्थाण उ कामभोगा ॥ १३ ॥
 परिक्खयन्ते अणियत्तकामे, अहो य राओ परितप्पमाणे ।
 अन्नप्पमत्ते धणमेसमाणे, पप्पोति मच्चुं पुरिसे जरं च ॥ १४ ॥
 इमं च मे अत्थि इमं च नत्थि, इमं च मे किच्च इमं अकिच्चं ।
 तं एवमेयं लालप्पमाणं, हरा हरंति त्ति क्हं पमाण ॥ १५ ॥
 धणं पभूयं सह इत्थियाहिं, सयणा तहा कायगुणा पगामा ।
 तवं कए तप्पइ जस्स लोगो, तं सव साहीणमिमेव तुभं ॥ १६ ॥
 धणेण किं धम्मघुराहिगारे, सयणेण वा कामगुणेहि चेव ।
 समणा भविस्सामु गुणोहधारी, कहिंविहारा अभिगम्म भिक्खं ॥ १७ ॥
 जहा य अग्गी अरणी असन्तो, खीरे घयं तेल्लमहा तिलेसु ।
 एमेव ताया सरीरंसि सत्ता, संमुच्छइ नासइ नावचिद्धे ॥ १८ ॥
 नो इन्दियग्गेज्ज त्तमुत्तभावा, अमुत्तभावा वि य होइ निच्चो ।
 अज्झत्थहेउं निययस्स बन्धो, संसारहेउं च वयन्ति बन्धं ॥ १९ ॥
 जहा वयं धम्मं अजाणमाणा, पावं पुरा कम्ममकासि मोहा ।
 ओलभमाणा परिरक्खयन्ता, तं नेव भुज्जो वि समायरामो ॥ २० ॥
 अब्भाहयम्मि लोगम्मि, सव्वओ परिवारिए ।
 अमोहाहिं पडन्तीहिं, गिहंसि न रइं लमे ॥ २१ ॥
 केण अब्भाहओ लोगो, केण वा परिवारिओ ।
 का वा अमोहा वुत्ता, जाया चिन्तावरो हुमे ॥ २२ ॥
 मच्चुणाऽब्भाहओ लोगो, जराए परिवारिओ ।
 अमोहा रयणी वुत्ता, एवं ताय विजाणह ॥ २३ ॥
 जा जा वच्चइ रयणी, न सा पडिनियत्तई ।
 अहम्मं कुणमाणस्स, अफला जन्ति राइओ ॥ २४ ॥
 जा जा वच्चइ रयणी, न सा पडिनियत्तई ।
 धम्मं च कुणमाणस्स, संफला जन्ति राइओ ॥ २५ ॥
 एगओ संवसित्ताणं, दुहओ सम्मत्तसंजुया ।
 पच्छा जाया गमिस्सामो, भिक्खमाणा कुले कुले ॥ २६ ॥
 जस्सत्थि मच्चुणा सक्खं, जस्स चत्थि पलायणं ।

णो जाणे न मरिस्सामि, सो हु कंखे सुए सिया ॥ २७ ॥

अजेव धम्मं पडिवज्जयामो, जहिं पवन्ना न पुणब्भवामो ।

अणागयं नेव य अत्थि किंची, सद्धाखमंणे विणइत्तु रागं ॥ २८ ॥

पहीणपुत्तस्स हु नत्थि वासो, वासिड्ढि भिक्खायरियाइ कालो ।

साहाहि रुक्खो लहई समाहिं, छिन्नाहि साहाहि तमेव ठाणुं ॥ २९ ॥

पंखाविहूणो व्व जहेव पक्खी, भिच्चविहूणो व्व रणे नरिन्दो ।

विबन्नसारो वणिओ व्व पोए, पहीणपुत्तो मि तहीं अहंपि ॥ ३० ॥

सुसंमिया कामगुणे इमे ते, संपिण्डिया अगगरसप्पभूया ।

भुंजामु ता कामगुणे पगामं, पच्छा गमिस्सामु पहाणमगं ॥ ३१ ॥

सुत्ता रसा भोइ जहाइ णे वओ, न जीवियट्ठा पजहामि भोए ।

लाभं अलाभं च सुहं च दुक्खं, संचिक्खमाणो चरिस्सामि मोणं ॥ ३२ ॥

मा हू तुमं सौयरियाग सम्भरे, जुणो व हंसो पडिसोत्तगामी ।

भुंजाहि भोगाइ मए समाणं, दुक्खं खु भिक्खायरियाविहारो ॥ ३३ ॥

जहा य भोई तणुयं भुयंगो, निम्मोयणिं हिच्च पलेइ सुत्तो ।

एमेए जाया पयइन्ति भोए, ते हं कहं नाणुगमिस्समेक्को ॥ ३४ ॥

छिन्दित्तु जालं अबलं व रोहिया, मच्छा जहा कामगुणे पहाय ।

धोरेयसीला तवसा उदारा, धीरा हु भिक्खाचरियं चरन्ति ॥ ३५ ॥

नहेव कुंचा सयइकमन्ता, तयाणि जालाणि दलित्तु हंसा ।

पलेन्ति पुत्ता य षई य मज्झं, ते हं कहं नाणुगमिस्समेक्का ॥ ३६ ॥

पुरोहियं तं समुयं सदारं, सोच्चाऽभिनिक्खम्म पहाय भोए ।

कुडुम्बसारं विउलुत्तमं च, रायं, अभिक्खं समुदाय देवी ॥ ३७ ॥

वन्तासी पुरिसो रायं, न सो होइ पर्ससिओ ।

माहणेण परिच्चत्तं, धणं आदाउमिच्छसि ॥ ३८ ॥

सव्वं जगं जइ तुहं, सव्वं वावि धणं भवे ।

सव्वं पि ते अपज्जत्तं, नेव ताणाय तं तव ॥ ३९ ॥

मरिहिसि रायं जया तया वा, मणोरमे कामगुणे विहाय ।

एक्को हु धम्मो नरदेव ताणं, न विज्जई अब्रमिहेह किंचि ॥ ४० ॥

नाहं रमे पक्खिणि पंजरे वा, संताणछिन्ना चरिस्सामि मोणं ।

अकिंचणा उज्जुकडा निरामिसा, परिग्गहारम्भनियत्तदोसा ॥ ४१ ॥

द्वग्गिणा जहा रणे, डज्झमाणेसु जन्तुसु । अन्ने सत्ता पमोयन्ति, रागदोसव्वसं गया ॥ ४२ ॥

एवमेव वयं मूढा, कामभोगेसु मुच्छिया । डज्झमाणं न बुज्झामो, रागदोसग्गिणा जगं ॥ ४३ ॥

भोगे भोच्चा वमिन्ना य, लहुभूयविहारिणो । आमोयमाणा गच्छन्ति, दिया कामकमा इव ॥ ४४ ॥

इमे य बद्धा फन्दन्ति, मम हत्थज्जमागया । वयं च सत्ता कामेसु, भविस्सामो जहा इमे ॥ ४५ ॥

सामिसं कुललं दिस्स, वज्झमाणं निरामिसं । आमिसं सव्वमुज्झिता, विहरिस्सामि निरामिसा ॥ ४६ ॥
 गिद्धोवमा उ नच्चाणं, कामे संसारवड्डणे । उरगो सुवण्णपासे व्व, संकमाणो तणुं चरे ॥ ४७ ॥
 नागो व्व बन्धणं छित्ता, अप्पणो व्वसहिं वए । एयं पच्छं महारायं, उस्सुयारि त्ति मे सुयं ॥ ४८ ॥
 चइत्ता विउलं रज्जं, कामभोगे य दुच्चए । निव्विसय निरामिसा, निन्नेदा निप्परिग्गहा ॥ ४९ ॥
 धम्मं धम्मं वियाणित्ता, चेच्चा कामगुणे वरे । तवं पगिज्झहक्खायं, धोरं धोरपरक्कमा ॥ ५० ॥
 एवं ते कमसो बुद्धा, सव्वे धम्मपरायणा । जम्ममच्चुभउव्विग्गा, दुक्खस्सन्तगवेसिणो ॥ ५१ ॥
 सासणे विगयमोहाणं, पुव्वि भावणभाविआ । अचिरेणेव कालेण, दुक्खस्सन्तमुवागया ॥ ५२ ॥
 राया सह देवीए, माहणो य पुरोहिओ । माहणी दास्मा चेव, सव्वे ते परिनिव्वुड ॥ ५३ ॥

त्ति बेमि ॥ इअ उस्सुयारिज्जं समत्तं ॥ १४ ॥

॥ अह सभिक्षू पंचदहं अज्झयणं ॥

मोणं चरिस्सामि समिच्च धम्मं, सहिए उज्जुकडे नियाणछिन्ने ।
 संथवं अहिज्ज अकामकामे, अन्नायएसी परिव्वए स भिक्षू ॥ १ ॥
 राओवरयं चरेज्ज लाढे, विरए वेयवियायरक्खिए ।
 षन्ने अभिभूय सव्वदंसी जे, कम्हिचि न मुच्छिए स भिक्षू ॥ २ ॥
 अक्कोसवहं विइत्तु धीरे, मुणी चरे लाढे निच्चमायभुत्ते ।
 अव्वग्गमणे असंपहिट्ठे, जे कसिणं अहियासए स भिक्षू ॥ ३ ॥
 पन्तं सयगासणं भइत्ता, सीउण्हं विविहं च दंसमसगं ।
 अव्वग्गमणे असंपहिट्ठे, जे कसिणं अहियासए स भिक्षू ॥ ४ ॥
 नो सक्कइमिच्छई न पूयं, नो वि य वन्दणं कुओ पसंसं ।
 से संजए सुव्वए तवस्सी, सहिए आयगवेसए स भिक्षू ॥ ५ ॥
 जेण पुण जहाइ जीवियं, मोहं वा कसिणं नियच्छई ।
 नरनारिं पजहे सया तवस्सी, न य कोऊहलं उवेइ स भिक्षू ॥ ६ ॥
 छिन्नं सरं भोमन्तलिकखं, सुमिणं लक्खणदण्डवत्थुविज्जं ।
 अंगवियारं सरस्स विजयं, जे विज्जाहिं न जीवइ स भिक्षू ॥ ७ ॥
 मन्तं मूलं विविहं वेज्जचिन्तं, वमणविरेयणधूमणेत्तसिणाणं ।
 आउरे सरणं तिगिच्छियं च, तं परिन्नाय परिव्वए स भिक्षू ॥ ८ ॥
 खत्तियगणउग्गरायपुत्ता, माहणभोइय विविहा य सिप्पिणो ।
 नो तेसिं वयइ सिलोगपूयं, तं परिन्नाय परिव्वए स भिक्षू ॥ ९ ॥
 गिहिणो जे पव्वइएण दिट्ठा, अप्पवइएण व संथुया हविज्जा ।
 तेसिं इयलोइयफलट्ठा, जो संथवं न करेइ स भिक्षू ॥ १० ॥
 सयणासणपाणभोयणं, विविहं खाइमसाइमं परोसिं ।

अदए पडिसेहिण नियण्ठे, जे तत्थ न पउस्सई स भिक्खु ॥ ११ ॥
जं किं चि आहारपाणजायं, विविहं खाइमसाइमं परेसिं लध्धुं ।
जो तं तिबिहेण नाणुकम्पे, मणवयकायसुसंखुडे स भिक्खु ॥ १२ ॥
आयामगं चेव जवोदणं च, सीयं सोवीरजवोदणं च ।
न हीलए पिण्डं नीरसं तु, पन्तकुलाइं परिव्वए स भिक्खु ॥ १३ ॥
सदा विविहा भवन्ति लोए, दिव्वा माणुस्सगा तिरिच्छा ।
भीमा भयमेरवा उराला, सोच्चा न विहिज्जई स भिक्खु ॥ १४ ॥
वादं विविहं समिच्च लोए, सहिए खेयाणुखए य कोवियप्पा ।
पन्ने अभिभूय सब्बदंसी, उवसन्ते अविहेडिए स भिक्खु ॥ १५ ॥
अविसप्पजीवी अगिहे अमित्ते, जिइन्दिए सब्बओ विप्पमुक्के ।
अणुक्कसाई लहुअप्पभक्खी, चेच्चा गिहं एगचरे स भिक्खु ॥ १६ ॥
त्ति बेमि ॥ इअ सभिक्खुयं समत्तं ॥ १५ ॥

॥ अह बम्भचेरसमाहिठाणाणाम सोलसमं अज्झयणं ॥

सुयं मे आउसं-तेणं भगवया एवमक्खायं । इह खलु थेरेहिं भगवन्तेहिं दस बम्भचेरसमाहिठाणा पन्नत्ता, जे भिक्खु सोच्चा निसम्म संजमबहुले संवरबहुले समाहिबहुले गुत्ते गुत्तिन्दिए गुत्तबम्भ-
यारी सया अप्पमत्ते विहरेज्जा । कयरे खलु ते थेरेहिं भगवन्तेहिं दस बम्भचेरसमाहिठाणा पन्नत्ता, जे भिक्खु सोच्चा निसम्म संजमबहुले समाहिबहुले गुत्ते गुत्तिन्दिए गुत्तबम्भयारी सया अप्पमत्ते विहरेज्जा ॥ इमे खलु ते थेरेहिं भगवन्तेहिं दस बम्भचेरठाणा पन्नत्ता, जे भिक्खु सोच्चा निसम्म संजमबहुले संवरबहुले समाहिबहुले गुत्ते गुत्तिन्दिए गुत्तबम्भयारी सया अप्पमत्ते विहरेज्जा तंजहा विविच्चाइं सयणासणाइं सेवित्ता हवइ से निग्गन्थे । नो इत्थीपसुपण्डगसंसत्ताइं सयणासणाइं सेवित्ता हवइ से निग्गन्थे । तं कहमिति चे । आयरियाह । निग्गन्थस्स खलु इत्थीपसुपण्डगसंसत्ताइं सय-
णासणाइं सेवमाणस्स बम्भयारिस्स बम्भचेरे संका वा कंखा वा विइगिच्छा वा समुप्पज्जिज्जा, भेदं वा लभेज्जा, उम्मायं वा पाउणिज्जा, दीहकालियं वा रोगायकं हवेज्जा, केवलपन्नत्ताओ धम्माओ भंसेज्जा । तम्हा नो इत्थीपसुपण्डगसंसत्ताइं सयणासणाइं सेवित्ता हवइ से निग्गन्थे ॥ १ ॥ नो इत्थीणं कंहं कहित्ता हवइ से निग्गन्थे । तं कहमिति चे आयरियाह । निग्गन्थस्स खलु इत्थीणं कंहं कहेमाणस्स कम्भयारिस्स बम्भचेरे संका वा कंखा वा विइगिच्छा वा समुप्पज्जिज्जा, भेदं वा लभेज्जा, उम्मायं वा पाउणिज्जा, दीहकालियं वा रोगायकं हवेज्जा, केवलपन्नत्ताओ धम्माओ भं-
सेज्जा । तम्हा नो इत्थीणं कंहं कहेज्जा ॥ २ ॥ नो इत्थीणं सद्धिं सन्निसेज्जागए विहरित्ता हवइ से निग्गन्थे । तं कहमिति चे । आयरियाह । निग्गन्थस्स खलु इत्थीहिं सद्धिं सन्निसेज्जागयस्स बम्भयारिस्स बम्भचेरे संका वा कंखा वा विइगिच्छा वा समुप्पज्जिज्जा, भेदं वा लभेज्जा उम्मायं वा पाउणिज्जा, दीहकालियं वा रोगायकं हवेज्जा, केवलपन्नत्ताओ धम्माओ भंसेज्जा । तम्हा खलु

नो निग्गन्थे इत्थीहिं सद्धिं सन्निसेज्जागए विहरेज्जा ॥ ३ ॥ नो इत्थीणं इन्दियाइं मणोहराइं मणोरमाइं आलोइत्ता निज्झाइत्ता हवइ से निग्गन्थे । तं कहमिति चे आयरियाह । निग्गन्थस्स खलु इत्थीणं इन्दियाइं मणोहराइं मणोरमाइं आलोएमाणस्स निज्झायमाणस्स बम्भयारिस्स बम्भचेरे संका वा कंखा वा विइगिच्छा वा समुप्पज्जिज्जा, भेदं वा लभेज्जा, उम्मायं वा पाउणिज्जा, दीहकालियं वा रोगायकं हवेज्जा, केवलपन्नत्ताओ धम्माओ भंसेज्जा । तम्हा खलु नो निग्गन्थे इत्थीणं इन्दियाइं मणोहराइं मणोरमाइं आलोएज्ज निज्झाएज्जा ॥ ४ ॥ नो इत्थीणं कुडुन्तरंसि वा दूसन्तरंसि वा भित्तन्तरंसि वा कूइयसहं वा रुइयसहं वा गीयसहं वा हसियसहं वा थणियसहं वा कन्दियसहं वा विलवियसहं वा सुणेत्ता हवइ से निग्गन्थे । तं कहमिति चे । आयरियाह । निग्गन्थस्स खलु इत्थीणं कुडुन्तरंसि वा दूसन्तरंसि वा भित्तन्तरंसि वा कूइयसहं वा रुइयसहं वा गीयसहं वा हसियसहं वा थणियसहं वा कन्दियसहं वा विलवियसहं वा सुणेमाणस्स बम्भयारिस्स बम्भचेरे संका वा कंखा वा विइगिच्छा वा समुप्पज्जिज्जा, भेदं वा लभेज्जा, उम्मायं वा पाउणिज्जा, दीहकालियं वा रोगायकं हवेज्जा, केवलपन्नत्ताओ धम्माओ भंसेज्जा । तम्हा खलु नो निग्गन्थे इत्थीणं कुडुन्तरंसि वा दूसन्तरंसि वा भित्तन्तरंसि वा कूइयसहं वा रुइयसहं वा गीयसहं वा हसियसहं वा थणियसहं वा कन्दियसहं वा विलवियसहं वा सुलेमाणे विहरेज्जा ॥ ५ ॥ नो निग्गन्थे पुव्वरयं पुव्वकीलियं अणुसरित्ता हवइ से निग्गन्थे तं कहमिति चे । आयरियाह । निग्गन्थस्स खलु पुव्वरयं पुव्वकीलियं अणुसरमाणस्स बम्भयारिस्स बम्भचेरे संका वा कंखा वा विइगिच्छा वा समुप्पज्जिज्जा, भेदं वा लभेज्जा, उम्मायं वा पाउणिज्जा, दीहकालियं वा रोगायकं हवेज्जा, केवलपन्नत्ताओ धम्माओ भंसेज्जा । तम्हा खलु नो निग्गन्थे पुव्वरयं पुव्वकीलियं अणुसरेज्जा ॥ ६ ॥ नो पणीयं आहारं आहरित्ता हवइ से निग्गन्थे । तं कहमिति चे । आयरियाह । निग्गन्थस्स खलु पणीयं आहारं आहारेमाणस्स बम्भयारिस्स बम्भचेरे संका वा कंखा वा विइगिच्छा वा समुप्पज्जिज्जा, भेदं वा लभेज्जा, उम्मायं वा पाउणिज्जा, दीहकालियं वा रोगायकं हवेज्जा, केवलपन्नत्ताओ धम्माओ भंसेज्जा । तम्हा खलु नो निग्गन्थे पणीयं आहारं आहारेज्जा ॥ ७ ॥ नो अइमायाए पाणभोयणं आहारेत्ता हवइ से निग्गन्थे । तं कहमिति चे । आयरियाह । निग्गन्थस्स खलु अइमायाए पाणभोयणं आहारेमाणस्स बम्भयारिस्स बम्भचेरे संका वा कंखा वा विइगिच्छा वा समुप्पज्जिज्जा, भेदं वा लभेज्जा, उम्मायं वा पाउणिज्जा, दीहकालियं वा रोगायकं हवेज्जा, केवलपन्नत्ताओ धम्माओ भंसेज्जा । तम्हा खलु नो निग्गन्थे अइमायाए पाणभोयणं आहारेज्जा ॥ ८ ॥ नो विभूसाणुवादी हवइ से निग्गन्थे । तं कहमिति चे आयरियाह । विभूसावत्तिए विभूसियसरीरे इत्थिज्जणस्स अभिलसणिजे हवइ तओ णं इत्थिजणेणं अभिलसिज्जमाणस्स बम्भचेरे संका वा कंखा वा विइगिच्छा वा समुप्पज्जिज्जा, भेदं वा लभेज्जा, उम्मायं वा पाउणिज्जा, दीहकालियं वा रोगायकं हवेज्जा, केवलपन्नत्ताओ धम्माओ भंसेज्जा । तम्हा खलु नो निग्गन्थे विभूसाणुवादी हविज्जा ॥ ९ ॥ नो सदरूवरसगन्धफासाणुवादी हवइ से निग्गन्थे । तं कहमिति चे । आयरियाह । निग्गन्थस्स खलु सदरूवरसगन्धफासाणुवादिस्स बम्भयारिस्स बम्भचेरे संका वा कंखा वा विइगिच्छा वा समुप्पज्जिज्जा, भेदं वा लभेज्जा, उम्मायं वा पाउणिज्जा, दीहकालियं वा रोगायकं हवेज्जा, केव-

लिपन्नत्ताओ धम्माओ भंसेज्जा। तम्हा खडु नो सदरूवरसगन्धफासाणुवादी भवेज्जा से निगन्थे ।
दसमे बम्भचेरसमाहिठाणे हवइ ॥ १० ॥ भवन्ति इत्थ सिलोगा तंजहा—

जं विवित्तमणाइणं, रहियं इत्थि जणेण य बम्भचेरस रक्खड्ढा, आलयं तु निवेसए ॥ १ ॥
मणपल्हायजणणी, कामरागविवड्ढणी । बम्भचेरओ भिक्खु, थीकहं तु विवज्जए ॥ २ ॥
समं च संथवं थीहिं, संकहं च अभिक्खणं । बम्भचेरओ भिक्खु, निच्चसो परिवज्जए ॥ ३ ॥
अंगपच्चंगसंठाणं, चारुल्लवियपेहियं । बम्भचेरओ थीणं, चक्खुगिज्झं विवज्जए ॥ ४ ॥
कूइयं रुइयं गीयं, हसियं थणियकन्दियं । बम्भचेरओ थीणं, सोयगेज्झं विवज्जए ॥ ५ ॥
हासं किडुं रइं दप्पं, सहसावित्तासियाणि य । बम्भचेरओ थीणं, नाणुचिन्ते कयाइ वि ॥ ६ ॥
षणीयं भत्तपाणं तु, खिप्पं मयविवड्ढणं । बम्भचेरओ भिक्खु, निच्चसो परिवज्जए ॥ ७ ॥
धम्मलद्धं मियं काले, जत्तत्थं पणिहाणवं । नाइमत्तं तु भुंजेज्जा, बम्भचेरओ सया ॥ ८ ॥
विभूसं परिवज्जेज्जा, सरीरपरिमण्डणं । बम्भचेरओ भिक्खु, सिंगारत्थं न धारए ॥ ९ ॥
सदे रुवे य गन्धे य, रसे फासे तहेवय । पंचविहे कामगुणे, निच्चसो परिवज्जए ॥ १० ॥
आलओ थीजणाइणो, थीकहा य मणोरमा । संथवो चेव नारीणं, तासिं इन्दियदरिसणं ॥ ११ ॥
कूइयं रुइयं गीयं, हासभुत्तासियाणि य । पणीयं भत्तपाणं च, अइमायं पाणभोयणं ॥ १२ ॥
गत्तभूसणमिट्ठं च, कामभोगा य दुज्जया । नरस्सत्तगवेसिस्स, विसं तालउडं जहा ॥ १३ ॥
दुज्जए कामभोगे य, निच्चसो परिवज्जए । संकाथाणाणि सद्वाणि, वज्जेज्जा पणिहाणवं ॥ १४ ॥
धम्मारामरते चरे भिक्खु, धिइमं धम्मसारही । धम्मारामरते दन्ते, बम्भचेरसमाहिए ॥ १५ ॥
देवदाणवगन्धवा, जक्खरक्खसकिन्नरा । बम्भयारिं नमंसन्ति, दुक्करं जे करन्ति तं ॥ १६ ॥
एस धम्मे द्युवे निच्चे, सासए जिणदेसिए । सिद्धा सिज्झन्ति चाणेण, सिज्झिस्सन्ति तहावरे ॥ १७ ॥

त्ति वेमि ॥ इअ बम्भचेरसमाहिठाणा समत्ता ॥ १६ ॥

॥ अह पावसमणिज्जं सत्तदहं अज्झयणं ॥

जे केइ उ-पवइए नियण्ठे, धम्मं सुणित्ता विणओववन्ने ।

सुदुल्लहं लहिउं बोहिलाभं, विहरेज्ज पच्छा य जहासुहं तु ॥ १ ॥

सेज्जा दढा पाउरणम्मि अत्थि, उप्पज्जई भोत्तु तहेव पाउं ।

जाणामि जं वट्ठई आउसु त्ति, किं नाम कहामि सुएण भन्ते ॥ २ ॥

जे केई पवइए, निहामीले पगामसो । भोच्चा पेच्चा सुहं सुवइ, पावसमणि त्ति बुच्चई ॥ ३ ॥

आयरियउवज्जएहि, सुयं विणयं च गाहिए । ते चेव खिंसई बाले, पावसमणि त्ति बुच्चई ॥ ४ ॥

आयरियउवज्जायाणं, सम्मं न पडितप्पइ । अप्पडिपूयए थद्धे पावसमणि त्ति बुच्चई ॥ ५ ॥

सम्महमाणो षाणाणि, बीयाणि हरियाणि य । असंजए संजयमन्नमाणीं, पावसमणि त्ति बुच्चई ॥ ६ ॥

संथारं फलगं पीढं, निसेज्जं पायकम्बलं । अप्पमज्जियमारुहइ, पावसमणि त्ति बुच्चई ॥ ७ ॥

दवदवस्स चरई, पमत्ते य अभिक्खणं । उल्लंघणे य चण्डे य, पावसमणि त्ति बुच्चई ॥ ८ ॥

पडिलेहेइ पमत्ते, पउज्झइ पायकम्बलं । पडिलेहा अणाउत्ते, पावसमणि त्ति बुच्चई ॥ ९ ॥
 पडिलेहेइ पमत्ते, से किंचि हु निसामिया । गुरुपारिभावए निच्चं, पावसमणि त्ति बुच्चई ॥ १० ॥
 बहुमाई पमुहरे, थद्धे लुद्धे अणिग्गहे । असंविभागी अविद्यत्ते, पावसमणि त्ति बुच्चई ॥ ११ ॥
 विवादं च डदीरेइ, अहम्मे अत्तपन्नहा । वुग्गहे कलहे रत्ते, पावसमणि त्ति बुच्चई ॥ १२ ॥
 अथिरासणे कुकुइए, जत्थ तत्थ निसीयई । आसणम्मि अणाउत्ते, पावसमणि त्ति बुच्चई ॥ १३ ॥
 तसक्खपाए सुवई, सेजं न पडिलेहइ । संथारए अणाउत्ते, पावसमणि त्ति बुच्चई ॥ १४ ॥
 दुद्धदहीविगईओ, आहारेइ अभिक्खणं । अरए य तवोकम्मे, पावसमणि त्ति बुच्चई ॥ १५ ॥
 अत्थन्तम्मि य सूरम्मि. आहारेइ अभिक्खणं । चोइओ पडिचोएइ, पावसमणि त्ति बुच्चई ॥ १६ ॥
 आयरियपरिच्चाई, परपासण्डसेवए । गाणंगणिए दुब्भूए, पावसमणि त्ति बुच्चई ॥ १७ ॥
 सय गेहं परिच्चज्ज, परगेहंसि वावरे । निमित्तेण य ववहरइ, पावसमणि त्ति बुच्चई ॥ १८ ॥
 सन्नाइ पिण्डं जेमेइ, नेच्छई सामुदाणिय । गिहिनिसेज्जं च वाहेइ, पावसमणि त्ति बुच्चई ॥ १९ ॥

एयारिसे पंचकुसीलसुवुडे, रूवंधरे मुणिपवराण हेट्टिमे ।

अयंसि लोए विसमेव गरहिए, न से इहं नेव परत्थ लोए ॥ २० ॥

जे वज्जए एए सया उ दोसे, से सुवए होइ मुणीण मज्जे ।

अयसि लोए अमय व पूइए, आराहए लोमिणं तहा परं ॥ २१ ॥

॥ ति बेमि ॥ इअ पावसमणिज्जं समत्तं ॥ १७ ॥

॥ अह संजइज्जं अढारहमं अज्झयणं ॥

कम्पिल्ले नयरे राया, उदिण्णबलवाहणे । नामेणं संजए नामं, मिगवं उवणिग्गए ॥ १ ॥
 हयाणीए गयाणीए, रयाणीए तहेव य । पायताणीए महया, सव्वओ परिवारिए ॥ २ ॥
 मिए लुहिता हयगओ, कम्पिल्लुज्जाण केसरे । भीए सन्ते मिए तत्थ, वहेइ रसमुच्छिए ॥ ३ ॥
 अह केसरम्मि उज्जाणे, अणगारे तवोधणे । सज्झायज्झाणसंजुत्ते, धम्मज्झाणं क्षियायइ ॥ ४ ॥
 अप्फोवमण्डवम्मि, भायइ क्खवियासवे । तस्मागए मिगं पासं, वहेइ से नराहिवे ॥ ५ ॥
 अह आसगओ राया, खिप्पमागम्म सो तहिं । हए मिए उ पासिता, अणगारं तत्थ पासई ॥ ६ ॥
 अह राया तत्थ सम्भन्तो, अणगारो मणा हओ । मए उ मन्दपुण्णेणं, रसगिद्धेण घन्नुणा ॥ ७ ॥
 आसं विसज्जइत्ताणं, अणगारस्स सो निवो । विणएण वन्दए पाए, भगवं एत्थ मे खमे । ८ ॥
 अह मोणेण सो भग्गवं, अणगारे ज्ञाणमस्सिए । रायाणं न पडिमन्तेइ, तओ राया भवइदुओ ॥ ९ ॥
 संजओ आहमम्मीति, भगवं वाहराहि मे । कुद्ध तेएण अणगारे, डहेज्ज नरकोडिओ ॥ १० ॥
 अब्भओ पत्थिवा तुब्भं, अभयदाया भवाहि य । अणिच्चे जीवलोगम्मि, किं हिंसाए पसज्जसी ॥ ११ ॥
 जया सव्वं परिच्चज्ज, गन्तवमवसस्स ते । अणिच्चे जीवलोगम्मि, किं रज्जम्मि पसज्जसी ॥ १२ ॥
 जीवियं चेव रूवं च, विज्जुसंपाय चंचलं । जत्थ तं मुज्झसी रायं पेच्चत्थं नावुबुज्जसे ॥ १३ ॥
 दाराणि य सुया चेव, मित्ता य तह बन्धवा । जीवन्तमणुजीवन्ति, मयं नाणुवयन्ति य ॥ १४ ॥

नीहरन्ति मयं पुत्ता, पितरं परमदुस्त्रिया । पितरो वि तहा पुत्ते, बन्धू रायं तवं चरे ॥ १५ ॥
तओ तेणज्जिए दवे, दारे य परिरक्खिए । कीलन्तिऽन्ने नरा रायं, हट्टुतुट्टमलंकिया ॥ १६ ॥
तेणावि जं कयं कम्मं, सुहं वा जइ वा दुहं । कम्मुणा तेण संजुत्तो, गच्छई उ परं भवं ॥ १७ ॥
सोजण तस्स सो धम्मं, अणगारस्स अन्तिए । महया संवेगनिवेदं, समावन्नो नराहिवो ॥ १८ ॥
संजओ चइउं रज्जं, निक्खन्तो जिणसासणे । गद्दभालिस्स भगवओ, अणगारस्म अन्तिए ॥ १९ ॥
चिच्चा गट्ठं पव्वइए, खत्तिए परिभासइ । जहा ते दीसई रूवं, पसन्नं ते महा मणो ॥ २० ॥
किं नामे किं गोत्ते, कस्सट्ठाए व माहणे । कहं पडियरसी बुद्धे, कहं विणीए त्ति बुच्चसी ॥ २१ ॥
संजओ नाम नामेणं, तहा गोत्तेण गोयमो । गद्दभाली ममायरिया, विज्जाचरणपारगा ॥ २२ ॥
किरियं अकिरियं विणयं, णन्नाणं च महामुणी । एएहिं चउहिं ठाणेहिं, मेयन्ने किं पभासई ॥ २३ ॥
इइ पाउकरे बुद्धे, नायए परिणिव्वुए । विज्जाचरणसंपन्ने, सच्चे सच्चपरक्कमे ॥ २४ ॥
पडन्ति नरए घोरे, जे नरा पावकारिणो । दिव्वं च गइं गच्छन्ति, चरित्ता धम्ममारियं ॥ २५ ॥
मायावुइयभेयं तु, मुसाभासा निरत्थिया । संजममाणो वि अहं, वसामि इरियामि य ॥ २६ ॥
सव्वेए विइय मज्झं, मिच्छादिट्ठी अणारिया । विज्जमाणे परे लोए, सम्मं जाणामि अप्पगं ॥ २७ ॥
अहसासि महापाणे, जुइमं वरिससओवमे । जा सा पालिमहापाली, दिव्वा वरिमसओवमा ॥ २८ ॥
से छुए बम्भलोगाओ, माणुस्सं भवमागए । अप्पणो य परेसिं च, आउं जाणे जहा तहा ॥ २९ ॥
नाणारुहं च छन्दं च, परिवज्जेज्ज संजए । अणट्ठा जे य सव्वत्था, इयविज्जामणुसंचरे ॥ ३० ॥
पडिक्कमामि पसिणाणं, परमंतेहिं वा पुणो । अहो वट्ठिए अहोरायं, इइ विज्जा तवं चरे ॥ ३१ ॥
जं च मे पुच्छसी काले, समं सुद्धेण चेतसा । ताइं पाउकरे बुद्धे तं नाणं जिणसासणे ॥ ३२ ॥
किरियं च रोयई धीरे, अकिरियं परिवज्जए । दिट्ठीए दिट्ठीसम्पन्ने, धम्मं चरसु दुच्चरं ॥ ३३ ॥
एयं पुण्णपयं सोच्चा, अत्थधम्मोवसोहियं । भरहो वि भारहं वासं, चेच्चा कामाइ पव्वए ॥ ३४ ॥
सगरो वि सागरन्तं, भरहवांसं नराहिवो । इस्सरियं केवलं हिच्चा, दयाइ परिनिव्वुडे ॥ ३५ ॥
चइत्ता भारहं वासं, चक्कवट्ठी महिड्डिओ । पव्वज्जमब्भुवगओ, मघवं नाम महाजसो ॥ ३६ ॥
सणकुमारो मणुस्सिन्दो, चक्कवट्ठी महिड्डिओ । पुत्तं रज्जे ठवेऊणं, सो वि राया तवं चरे ॥ ३७ ॥
चइत्ता भारहं वासं, चक्कवट्ठी महिड्डिओ । सन्ती सन्तिकरे लोए, पत्तो गइमणुत्तरं ॥ ३८ ॥
इक्खागारायवसभो, कुन्धू नाम नरिसरो । विक्खायकित्ती भगवं, पत्तो गइमणुत्तरं ॥ ३९ ॥
सागरन्तं चइत्ताणं, भरहं नरवरीसरो । अरो य अरयं पत्तो, पत्तो गइमणुत्तरं ॥ ४० ॥
चइत्ता भारहं वासं, चइत्ता बलवाहणं । चइत्ता उत्तमे भोए, महापउमे तवं चरे ॥ ४१ ॥
एगच्छत्तं पसाहिता, महिं माणनिसूरणो । हरिसेणो मसुस्सिन्दो, पत्तो गइमणुत्तरं ॥ ४२ ॥
अन्निओ रायसहस्सेहिं, सुपरिच्चाई, दमं चरे । जयनामो जिणक्खायं, पत्तो गइमणुत्तरं ॥ ४३ ॥
दसण्णरज्जं मुदियं, चइत्ताणं मुणी चरे । दसण्णभदो निक्खन्तो, सक्खं सक्केण चोइओ ॥ ४४ ॥
नमी नमेइ अप्पाणं, सक्खं सक्केण चोइओ । चइऊण गेहं वइदेही, सामण्णे पज्जुवट्ठिओ ॥ ४५ ॥
करक्कण्डू कलिंसेसु, पंचालेसु य दुम्मुहो । नमी राया वीदेहेसु, गन्धारेसु य नग्गई ॥ ४६ ॥
एए नरिन्दवसभा, निक्खन्ता जिणसासणे । पुत्ते रज्जे ठवेऊणं, सामण्णे पज्जुवट्ठिया ॥ ४७ ॥

सोवीररायवसभो, चइत्ताण गुणी चरे । उदायणो पवइओ, पत्तो गइमणुत्तरं ॥ ४८ ॥
 तहेव कासीराया, सेओसच्चपरकमे । कामभोगे परिच्चज्ज, पहणे कम्ममहावणं ॥ ४९ ॥
 तहेव विजओ राया, अणट्ठाकित्ति पवए । रज्जं तु गुणसमिद्धं, पयहित्तु महाजसो ॥ ५० ॥
 तहेवुग्गं तवं किच्चा, अवक्खित्तेण चेयसा । महब्बलो रायरिसी, आदाय सिरसा सिरिं ॥ ५१ ॥
 कहं धीरो अहेऊहिं, उम्मत्तो व महिं चरे । एए विसेसमादाय, सारा दट्ठपरकमा ॥ ५२ ॥
 अच्चन्तनियाणखमा, सच्चा मे भासिया वई । अतरिंसु तरन्तेगे, तरिस्सन्ति अणागया ॥ ५३ ॥
 कहिं धीरे अहेऊहिं अत्तणं परियावसे । सबसंगविनिम्मुक्के, सिद्धे भवइ नीरण ॥ ५४ ॥

त्ति बेमि ॥ इअ संजइज्जं समत्तं ॥ १८ ॥

॥ मियापुत्तीयं एगूणवीसइमं अज्झयणं ॥

सुग्गीवे नयरे रम्मे, काणणुज्जाणसोहिए । राया बलभहि त्ति, मिया तस्सग्गमाहिसी ॥ १ ॥
 तेसिं पुत्ते बलसिरी, मियापुत्ते त्ति विस्सुए । अम्मापिऊण दइए, जुवराया दमीसरे ॥ २ ॥
 नन्दणे सो उ पासाए, कीलए सह इत्थिहिं । देवोदोगुन्दगे चेव, निच्चं मुइयमाणसो ॥ ३ ॥
 मणिरयणकोट्टिमतळे, पासायालोयणट्ठिओ । आलोएइ नगरस्स, चउक्क त्तियचच्चरे ॥ ४ ॥
 अह तत्थ अइच्छन्तं, पासई समणसंजयं । तवनियमसंजमधरं, सीलहुं गुणआगरं ॥ ५ ॥
 तं हेहई मियापुत्ते, दिट्ठीए अणिमिसाए उ । कहिं मन्ने रिसं रूवं, दिट्ठपुवं मए पुरा ॥ ६ ॥
 साहुस्स दरिसणे तस्स, अज्झवसाणम्मि सोहणे । मोहं गयस्स सन्तस्स, जाईसरणं समुप्पन्नं ॥ ७ ॥
 जाईसरणे समुप्पन्ने, मियापुत्ते महिद्धिए । सरई पोराणियं जाई, सामण्णं च पुरा कयं ॥ ८ ॥
 विसएहि अरज्जन्तो, रज्जन्तो, संजमम्मि य । अम्मापियरमुवागम्म, इमं वयणमब्बवी ॥ ९ ॥

सुयाणि मे पंच महव्वयाणि, नरएसु दुक्खं च तिरिक्खजोणिसु ।

निव्विण्णकामो मि महण्णवाउ, अणुजाणह पवइस्सामि अम्मो ॥ १० ॥

अम्म ताय मए भोगा, भुत्ता विसफलोवमा । पच्छा कडुयविवागा, अणुबन्धदुहावहा ॥ ११ ॥
 इमं सरीरं अणिच्चं, असुइं असुइंसंभवं । असासयावासमिणं, दुक्खकेसाण भायणं ॥ १२ ॥
 असासए सरीरम्मि, रइं नोवलभामहं । पच्छा पुरा व चइयव्वे, फेणबुब्बुयसन्निभे ॥ १३ ॥
 माणुसत्ते असारम्मि, वाहीरोगाण आलए । जरामरणघत्थम्मि, खणपि न रमामहं ॥ १४ ॥
 जम्मं दुक्खं जरा दुक्खं, रोगाणि मरणाणि य । अहो दुक्खो हु संसारो, जत्थ कीसन्ति जन्तवो ॥ १५ ॥
 खेत्तं वत्थुं हिरण्णं च, पुत्तदारं च बन्धवा । चइत्ताणं हमं देहं, गन्तव्वमवसस्स मे ॥ १६ ॥
 जह किम्पागफलाण, परिणामो न सुन्दरो । एवं भुत्ताण भोगाणं, परिणामो न सुन्दरो ॥ १७ ॥
 अद्दाणं जो महंतं तु, अप्पाहेओ पवज्जई । गच्छन्तो सो दुही होइ, छुहातण्हाए पीडिओ ॥ १८ ॥
 एवं धम्मं अकाऊणं, जो गच्छइ परं भवं । गच्छन्तो सो सुही होइ, वाहीरोगेहिं पीडिओ ॥ १९ ॥
 अद्दाणं जो महंतं तु, सपाहेओ पवज्जई । गच्छन्तो सो सुही होइ, छुहातण्हाविवज्जिओ ॥ २० ॥

एवं धम्मं पि काऊणं, जो गच्छइ परं भवं । गच्छन्तो सो सुही होइ, अप्पकम्मे अवेयणे ॥ २१ ॥
 जहा गेहे पलित्तम्मि, तस्स गेहस्स जो पहू । सारभण्डाणि नीणेइ, असारं अवउज्झइ ॥ २२ ॥
 एवं लोए पलित्तम्मि, जराए मरणेण य । अप्पाणं तारइस्सामि, तुब्भेहिं अणुमन्निओ ॥ २३ ॥
 तं विन्तम्मापियरो, सामण्णं पुत्त दुच्चरं । गुणाणं तु सहस्साइं, धारेयवाइं भिक्खुणा ॥ २४ ॥
 समया सबभूएसु, सत्तुमित्तेसु वा जगे । पाणाइवायविरई, जावज्जीवाए दुकरं ॥ २५ ॥
 निच्चकालप्पमत्तेणं, मुसावायविवज्जणं । भासियव्वं हियं सच्चं, निच्चाउत्तेण दुकरं ॥ २६ ॥
 दन्तमोहणमाइस्स, अदत्तस्स विवज्जणं । अणवज्जेसणिज्जस्स, गिहण्णा अवि दुकरं ॥ २७ ॥
 विरई अबम्भेचरस्स, कामभोगरन्तुणा । उग्गं महव्वयं बम्भं, धारेयव्वं सुदुकरं ॥ २८ ॥
 धणधन्नपेसव्वग्गेसु, परिग्गहविवज्जणं । सवारम्भपरिच्चाओ, निम्ममत्तं सुदुकरं ॥ २९ ॥
 चउव्विहे वि आहारे, राइभोयणवज्जणा । सन्निहोसंचओ चेव, वज्जेयव्वो सुदुकरं ॥ ३० ॥
 छुहा तण्हा य सीउण्हं दंसमसंगवेयणा । अक्कोसा दुक्खसेज्जा य, तणफासा जलमेव य ॥ ३१ ॥
 तालणा तज्जणा चेव, वढबन्धपरीसहा । दुक्खं भिक्खायरिया, जायणा य अलाभया ॥ ३२ ॥
 कावोया जा इमा वित्ती, केसलोओ य दारुणो । दुक्खं बम्भवयं घोरं, धारेउं य महप्पणो ॥ ३३ ॥
 सुहोइओ तुमं पुत्ता, सुकुमालो सुमज्जिओ । न हु सी पभू तुमं पुत्ता, सामण्णमणुपालिया ॥ ३४ ॥
 जावज्जीवमविस्सामो, गुणाणं तु महब्भरो । गुरु उ लोहभारुव, जो पुत्ता होइ दुव्वहो ॥ ३५ ॥
 आगासे गंगसोउ व, पडिसोउ व दुत्तरो । बाहाहिं सागरो चेव, तरियव्वो गुणोदही ॥ ३६ ॥
 वालुया कवलो चेव, निरस्साए उ संजमे । असिधारागमणं चेव, दुकरं चरिउं तवो ॥ ३७ ॥
 अही वेगन्तदिट्ठीए, चरित्ते पुत्त दुकरे । जवा लोहमया चेव, चावेयव्वा सुदुकरं ॥ ३८ ॥
 जहा अग्गिसिहा दित्ता, पाउं होइ सुदुकरा । एहा दुकरं करेउं जे, तारुण्णे समणत्तणं ॥ ३९ ॥
 जहा दुक्खं भरेउं जे, होइ वायस्स कोत्थलो । तहा दुक्खं करेउं जे, कीवेणं समणत्तणं ॥ ४० ॥
 जहा तुलाए तोलेउं, दुकरो मन्दरो गिरी । तहा निहुयनीसंकं, दुकरं समणत्तणं ॥ ४१ ॥
 जहा भुयाहिं तरिउं, दुकरं रयणायरो । तहा अणुवसन्तेणं, दुकरं दमसागरो ॥ ४२ ॥
 भुंज माणुस्सए भोगे, पंचलक्खणए तुमं । भुत्तभोगी तओ जाया, पच्छा धम्मं चरिस्समि ॥ ४३ ॥
 सोवेइ अम्मापियरो, एवमेयं जहा फुडं । इह लोए निप्पिवासस्स, नत्थि किंचिवि दुकरं ॥ ४४ ॥
 सारीरमाणसा चेव, वेयणाओ द्वनन्तसो । मए सोढाओ भीमाओ, असइं दुक्खभयाणी य ॥ ४५ ॥
 जरामरणकन्तारे, चाउरन्ते भयागरे । मए सोढाणि भीमाणि, जम्माणि मरणाणि य ॥ ४६ ॥
 जहा इहं अगणीउण्हो, एत्तोऽणन्तगुणे तहिं । नरएभु वेयणा उण्हा, अस्साया वेइया मए ॥ ४७ ॥
 इमं इहं सीयं, एत्तोऽणन्तगुणे तहिं । नरएसु वेयणा सीया, अस्सया वेइया मए ॥ ४८ ॥
 कन्दन्तो कंदुकुम्मीसु, उड्डुपाओ अहोसिरे । हुयासणे जलन्तम्मि, पक्कयुव्वो अणन्तसो ॥ ४९ ॥
 महादबग्गिसंकासे, मरुम्मि वइरबालुए । कदम्बबालुयाए य, दड्डुपुव्वो अणन्तसो ॥ ५० ॥
 रसन्तो कन्दुकुम्मीसु, उड्डुं बद्धो अबन्धवो । करवत्तकरकयईहिं, छिन्नपुव्वो अणन्तसो ॥ ५१ ॥
 अइतिक्खकण्टगाइण्णे, तुंगे सिम्बलिपायवे । खेवियं पासवद्वेणं, कड्डोकड्डाहिं दुकरं ॥ ५२ ॥
 महाजन्तेसु उच्छू वा, आरसन्तो सुमेरवं । पीडिओ मि सकम्मेहिं, पावकम्मोअणन्तसो ॥ ५३ ॥

कूवन्तो कोलमुणएहिं, सामेहिं सवलेहि य । फाडिओ फालिओ छिन्नो, विफुगन्तो अणेगसो ॥ ५४ ॥
 असीहि अवसिवण्णाहिं, भल्लेहिं पट्टिसेहि य । छिन्नो भिन्नो विभिन्नो य, ओइण्णो पावकम्मुणा ॥ ५५ ॥
 अनसे लोहरहे जुत्तो, जलन्ते समिलाजुए । चोइओ तोत्तजुत्तेहिं, रोज्जो वा जह पाडिओ ॥ ५६ ॥
 हुयासणे जलन्तम्मि, चियासुं महिसो विव । दड्डो पक्को य अवसो, पावकम्मेहि पाविओ ॥ ५७ ॥
 वला संडासतुण्डेहिं, लोहतुण्डेहिं पक्खिहिं । विलुत्तो विलवन्तो हं, ढंक्कगिद्धेहिऽणन्तसो ॥ ५८ ॥
 तण्हाकिलन्तो धावन्तो, पत्तो वेयराणिं नदिं । जलं पाहिं ति चिन्तन्तो, खुरधाराहिं विवाइओ ॥ ५९ ॥
 उण्हामित्तो संपत्तो, असिपत्तं महावणं । असिपत्तेहिं पडन्तेहिं, छिन्नपुव्वो अणेगसो ॥ ६० ॥
 मुग्गरेहिं मुसंढीहिं, सल्लेहिं मुसल्लेहिं य । गया संभग्गगत्तेहिं, पत्तं दुक्खं अणन्तसो ॥ ६१ ॥
 खुरेहिं तिक्खधारेहिं, लुरियाहिं कप्पणीहि य । कप्पिओ फालिओ छिन्नो, उक्कित्तो य अणेगसो ॥ ६२ ॥
 पासेहिं कूडजालेहिं, मिओ वा अवसो अहं । वाहिओ बद्धुद्धो वा, बहू चेव विवाइओ ॥ ६३ ॥
 गळेहिं मगरजालेहिं, मच्छो वा अवसो अहं । उल्लिओ फालिओ गहिओ, मारिणो य अणन्तसो ॥ ६४ ॥
 वीदंसएहि जालेहिं, लेप्पाहिं सउणो विव । गहिओ लग्गो बद्धो य, मारिओ य अणन्तसो ॥ ६५ ॥
 कुहाडफरसुमाईहिं, वड्डुईहिं दुमो विव । कुट्टिओ फालिओ छिन्नो, तच्छिओ य अणन्तसो ॥ ६६ ॥
 चवेडमुट्टिमाईहिं, कुमारेहिं अयं पिव । ताडिओ कुट्टिओ भिन्नो, चुण्णिओ य अणन्तसो ॥ ६७ ॥
 तत्ताइं तम्बलोहाइं, तउयाइं सीसयाणि य । पाइओ कलकलन्ताइं, आरसन्तो सुभेरवं ॥ ६८ ॥
 तुहं पियाइं मंसाइं, खण्डाइं सोलगाणि य । खाविओ मिसमंसाइं, अग्गिवण्णाइऽणेगसो ॥ ६९ ॥
 तुहं पिया सुरा सीहू, मेरओ य महूणि य । पाइओ मि जलन्तीओ, वसाओ रुहिराणि य ॥ ७० ॥
 निच्चं भीएण तत्थेण, दुहिएण वहिएण य । परमा दुहसंबद्धा, वेयणा वेदिता मए ॥ ७१ ॥
 तिव्वचण्डप्पगाढाओ, घोराओ अइदुस्सहा । महब्भयाओ भीमाओ, नरएसु वेदिता मए ॥ ७२ ॥
 जारिसा माणुसे लोए, ताया दीसन्ति वेयणा । एत्तो अणन्तगुणिया, नरएसु दुक्खवेयणा ॥ ७३ ॥
 सब्भवेसु अस्साया, वेयणा वेदिता मए । निमेसन्तरमित्तं पि, जं साता नत्थि वेयणा ॥ ७४ ॥
 तं विन्तम्मापियरो, छन्देणं पुत्त पवया । नवरं पुण सामण्णे, दुक्खं निप्पडिकम्मया ॥ ७५ ॥
 सो बेइ अम्मापियरो, एवमेयं जहा फुडं । पडिकम्मं को कुणई, अरण्णे मियपक्खिणं ॥ ७६ ॥
 एगब्भूए अरण्णे व, जहा उ चरई भिगे । एवं धम्मं चरिस्सामि, संजमेण तवेण य ॥ ७७ ॥
 जया मिगस्स आयंको, महारण्णम्मि जायई । अच्चन्तं रुक्खमूलम्मि, को णं ताहे तिगिच्छई ॥ ७८ ॥
 को वा से ओपहं देइ, को वा से पुच्छई सुहं । को से भत्तं च पाणं वा, आहरित्तु पणामए ॥ ७९ ॥
 जया से सुही होइ, तया गच्छई गोयरं । भत्तपाणस्स अट्ठाए, वल्लाराखि सराणि य ॥ ८० ॥
 खाइत्ता दाणियं पाउं, वल्लरेहिं मरेहि य । मिगचारियं चरित्ताणं, गच्छई मिगचारियं ॥ ८१ ॥
 एवं समुट्ठिओ भिक्खू, एवमेव अणेगए । मिगचारियं चरित्ताणं, उड्डं पक्कमई दिसं ॥ ८२ ॥

जहा भिगे एगे अणेगचारी, अणेगवासे धुवगोयरे य ।

एवं मुणी गोयरियं पविट्ठे, नो हीलए नो वि य खिंसएज्जा ॥

॥ ८३ ॥

मिगचारियं चरिस्सामि, एवं पुत्ता जहासुहं । अम्मापिईहिऽणुन्नाओ, जहाइ उवहिं तहा ॥ ८४ ॥

मियचारियं चरिस्सामि, सब्भवेसु विमोक्खणि । तुब्भेहिं अब्भणुन्नाओ, गच्छ पुत्त जहासुहं ॥ ८५ ॥

एवं सो अम्मापियरो, अणुमाणिताण बहुविहं । ममत्तं छिन्दई ताहे, महानागो व कंचुयं ॥ ८६ ॥
 इड्डी वि च मित्ते य, पुत्तदारं च नायओ । रेणुयं व पडे लगं, निधुत्ताण निग्गओ ॥ ८७ ॥
 पंचमहवयजुत्तो, पंचहि समिओ तिगुत्तिगुत्तो य । सग्भिन्तरबाहिरओ, तवोकम्मंसि उज्जुओ ॥ ८८ ॥
 निम्ममो निरहंकारो, निस्संगो चत्तगारवो । समो य सबभूएसु, तसेसु थावरेसु य ॥ ८९ ॥
 लाभालामे सुहे दुक्खे, जीविए मरणे तहा । समो निन्दापसंसासु, तहा माणावमाणओ ॥ ९० ॥
 गारवेसुं कसाएसुं, दण्डसल्लभएसु य । नियत्तो हाससोगाओ, अनियाणो अबन्धणो ॥ ९१ ॥
 अणिस्सिओ इहं लोए, परलोए अणिस्सिओ । वासीचन्दणकप्पो य, असणे अणसणे तहा ॥ ९२ ॥
 अप्पसत्थेहिं दारेहिं, सबओ पिहियासवे । अज्झप्पज्झाणजोगेहिं, पसत्थदमसासणे ॥ ९३ ॥
 एवं नाणेण चरणेण, दंसणेण तवेण य । भावणाहि य सुद्धाहिं, सम्मं भावेत्तु अप्पयं ॥ ९४ ॥
 बहुयाणि उ वासाणि, सामण्णमणुपालिया । मासिएण उ भत्तेण, सिद्धिं पत्तो अणुत्तरं ॥ ९५ ॥
 एवं करन्ति संबुद्धा, पण्डिया पवियक्खणा । विणिअट्टन्ति भोगेसु, मियापुत्ते जहारिसी ॥ ९६ ॥

महापभावस्स महाजसस्स, मियापुत्तस्स निसम्म भासियं ।

तवप्पहाणं चरियं च उत्तमं, गहप्पहाणं च तिलोगविस्सुतं ॥

॥ ९७ ॥

वियाणिया दुक्खविवद्वणं धणं, ममत्तबन्धं च मयाभयावहं ।

सुहावहं धम्मधुरं अणुत्तरं, धारेज्ज निवाणगुणावहं महं ॥

॥ ९८ ॥

त्ति बेमि ॥ इअ मियापुत्तीयं समत्तं ॥ १९ ॥

॥ अह महानियण्ठिज्जं वीसइमं अज्झयणं ॥

सिद्धाण नमो किच्चा, संजयाणं च भावओ । अत्थधम्मगइं तच्चं अणुसट्ठिं सुणेह मे ॥ १ ॥
 पभूयरायणो राया, सेणिओ मगहाहिवो । विहारजत्तं निज्जाओ, मण्डिकुल्लिसि चेइए ॥ २ ॥
 नाणादुमलयाइण्णं, नाणापक्खिनिसेवियं । नाणाकुसुमसंछन्नं, उज्जाणं नन्दणोवमं ॥ ३ ॥
 तत्थ सो पासई साहुं, संजयं सुसमाहियं । निसन्नं रुक्खमूलम्मि, सुकुमालं सुहोइयं ॥ ४ ॥
 तस्स रूवं तु पासित्ता, राइणो तम्मि संजए । अच्चन्तदरमो आसी, अउलो रूवविम्हओ ॥ ५ ॥
 अहोवण्णो अहो रूवं, अहो अज्झस्स सोमया । अहो खन्ती अहो मुत्ती, अहो भोगे असंजया ॥ ६ ॥
 तस्स पाए उ वन्दिता, काज्जण य पयाहिणं । नाइदूरमणासन्ने, पंजली पडिपुच्छई ॥ ७ ॥
 तरुणो सि अज्जो पबइओ, भोगकालम्मि संजया । उवट्ठिओ सि सामण्णे, एयमट्ठं सुणेमि ता ॥ ८ ॥
 अणाहोमि महाराय, नाहो मज्झ न विज्जई । अणुकम्पगं सुहिं वावि, कंचि नाभिसमेमहं ॥ ९ ॥
 तओ सो पहसिओ राया, सेणिओ मगहाहिवो । एवं ते इड्ढिमन्तस्स, कहं नाहो न विज्जई ॥ १० ॥
 होमि नाहो भयताणं, भोगे भुंजाहि संजया । मित्तनाइपरिवुडो, माणुस्सं ख सुदुल्लहं ॥ ११ ॥
 अप्पणा वि अणाहो सि, सेणिया मगहाहिया । अप्पणा अणाहो सन्तो, कस्स नाहो भविस्ससि ॥ १२ ॥
 एवं वुत्तो नरिन्दो सो, सुसंभन्तो सुविम्हिओ । वयणं अस्सुयपुव्वं, साहुणा विम्हयन्निओ ॥ १३ ॥
 अस्सा इत्थी मणुस्सा मे, पुरं अन्तेउरं च मे । भुंजामि माणुस्से भोगे, आणा इस्सरियं च मे ॥ १४ ॥

एरिसे सम्पयग्गम्मि, सब्बकामसमप्पिए । कहं अणाहो भवई, मा हु भन्ते सुसं वए ॥ १५ ॥
 न तुमं जाणे अणाहस्स, अत्थं पोत्थं च पत्थिवा । जहा अणाहो भवई, सणाहो वा नराहिवा ॥ १६ ॥
 सुणेह मे महाराय, अब्बिखत्तेण चेषसा । जहा अणाहो भवई, जहा मेयं पवत्तियं ॥ १७ ॥
 कोसम्बी नाम नयरी, पुराण पुरमेयणी । तत्थ आसी पिया मज्झ, पभूयधणसंचओ ॥ १८ ॥
 पढमे वए महाराय, अउलामे अच्छिवेयणा । अहोत्था विउलो डाहो, सब्बगत्तेसु पत्थिवा ॥ १९ ॥
 सत्थं जहा परमतिकखं, सरीरविवरन्तरे । आशीलिज्ज अरी कुद्धो, एवं मे अच्छिवेयणा ॥ २० ॥
 तियं मे अन्तरिच्छं च, उत्तमंगं च पीडई । इन्दासणिसमा घोरा, वेयणा परमदारुणा ॥ २१ ॥
 उवट्ठिया मे आयरिया, विज्जामन्ततिगिच्छया । अधीया सत्थकुसला, मन्तमूलविसारया ॥ २२ ॥
 तेमे तिगिच्छं कुवन्ति, चाउप्पायं जहाहियं । न य दुक्खा विमोयन्ति, एसा मज्झ अणाहया ॥ २३ ॥
 पिया मे सब्बसारंपि, दिज्जाहि मम कारणा । न य दुक्खा विमोएइ, एसा मज्झ अणाहया ॥ २४ ॥
 माया य मे महाराय, पुत्तसोगदुहट्ठिया । न य दुक्खा विमोएइ, एसा मज्झ अणाहया ॥ २५ ॥
 भायरो मे महाराय, सगा जेट्ठकणिट्ठगा । न य दुक्खा विमोयन्ति, एसा मज्झ अणाहया ॥ २६ ॥
 भइणीओ मे महाराय, सगा जेट्ठकणिट्ठगा । न य दुक्खा विमोयन्ति, एसा मज्झ अणाहया ॥ २७ ॥
 भारिया मे महाराय, अणुरत्ता अणुवया । अंसुपुणेहिं नयणेहिं, उरं मे परिसिंचई ॥ २८ ॥
 अन्नं च पाणं ण्हाणं च, गन्धमल्लविलेवणं । मए नायमणायं वा, सा बाला नेव भुंजई ॥ २९ ॥
 खणं पि मे महाराय, पासाओ मे न फिट्ठई । न य दुक्खा विमोएइ, एसा मज्झ अणाहया ॥ ३० ॥
 तओ हं एवमाहंसु, दुक्खमा हु पुणो पुणो । वेयणा अणुभविउं जे, संसारम्मि अणन्तए ॥ ३१ ॥
 सइं च जइ मुच्चेज्जा, वेयणा विउला इओ । खन्तो दन्तो निगरम्भो, पव्वए अणगारियं ॥ ३२ ॥
 एवं च चिन्तइत्ताणं, पसुत्तो मि नराहिवा । परियत्तन्तीए राईए, वेयणा मे खयं गया ॥ ३३ ॥
 तओ कल्ले पमायम्मि, आपुच्छित्ताण बन्धवे । खन्तो दन्तो निगरम्भो, पव्वइओऽणगारियं ॥ ३४ ॥
 तो हं नाहो जाओ, अप्पणो य परस्स य । सब्बे सिं चेव भूयाणं, तसाण थावराण य ॥ ३५ ॥
 अप्पा नई वेयरणी, अप्पा मे कूडसामली । अप्पा कामदुहा धेणू, अप्पा मे नन्दणं वणं ॥ ३६ ॥
 अप्पा कत्ता विकत्ता य, दुक्खाण य सुहाण य । अप्पा मित्तममित्तं च, दुप्पट्ठियसुपट्ठिओ ॥ ३७ ॥

इमा हु अन्ना वि अणाहया निवा, तमेगचित्तो निहुओ सुणेहि ।

नियण्ठधम्मं लहीयाण वी जहा, सीयन्ति एगे बहुकायर नरा ॥ ३८ ॥

जो पव्वइत्ताण महवयाइं, सम्मं च नो फासयई पमाया ।

अनिग्गहप्पा य रसेसु गिद्धे, न मूलओ छिन्नइ बन्धणं से ॥ ३९ ॥

आउत्तया जस्स न अत्थि काइ, इरियाए भासाए तहेसणाए ।

आयाणनिकखेवदुगंछणाए, न धीरजायं अणुजाइ मग्गं ॥ ४० ॥

चिरं पि से मुण्डरुई भवित्ता, अथिरव्वए तवनियमेहि भट्ठे ।

चिरं पि अप्पाण किल्लेसइत्ता, न पारए होइ हु संपराए ॥ ४१ ॥

पोले व मुट्ठी जह से असारे, अयन्तिए कूडकहावणे वा ।

राढामणी वेरुलियप्पगासे, अमहग्घए होइ हु जाणएसु ॥ ४२ ॥

कुसीललिंगं इह धारइत्ता, इसिज्झयं जीविय बूहइत्ता ।
 असंजए संजयलप्पमाणे, विणिग्घायमागच्छइ से चिरंपि ॥ ४३ ॥
 विसं तु पीयं जह कालकूडं, हणाइ सत्थं जह कुग्गहीयं ।
 एसो वि धम्मो विसओववन्नो, हणाइ वेयाल इवाविवन्नो ॥ ४४ ॥
 जे लक्खणं सुविण पउंजमाणे, निमित्तकोऊहलसंपगाढे ।
 कुहेडविज्जासवदारजीवी, न गच्छई सरणं तम्मि काले ॥ ४५ ॥
 तमं तमेणेव उ से असीले, सया दुही विप्परियामुवेइ ।
 संघावई नरगतिरिक्खजोणिं, मोणं विराहेत्तु असाहुरूवे ॥ ४६ ॥
 उद्देसियं कीयगडं नियार्गं, न मुंचई किं च अणेसणिज्जं ।
 अग्गी विवा सवभक्खी भवित्ता, इत्तो चुए गच्छइ कट्टु पावं ॥ ४७ ॥
 न तं अरी कंठछेत्ता करेइ, जं से करे अप्पणिया दुरप्पया ।
 से नाहइ मच्चुमुहं तु पत्ते, पच्छाभितावेण दयाविहूणो ॥ ४८ ॥
 निरट्टिया नग्गरुई उ तस्स, जे उत्तमट्टं विवज्जासमेइ ।
 इमे वि से नत्थि परे वि लोए, दुहओ वि से भिज्जइ तत्थ लोए ॥ ४९ ॥
 एमेव हा छन्दकुसीलरूवे, मग्गं विराहेत्तु जिणुत्तमाणं ।
 कुररी विवा भोगरसाणुगिद्धा, निरट्टसोया परियासमेइ ॥ ५० ॥
 सोच्चाण मेहावि सुभासियं इमं, अणुसासणं नाणगुणोव्वेयं ।
 मग्गं कुसीलाण जहाय सव्वं, महानियण्ठाण वए पहेण ॥ ५१ ॥
 चरित्तमायारगुणन्निए तओ, अणुत्तरं संजम पालियाण ।
 निरासवे संखवियाण कम्मं, उवेइ ठाणं विउल्लुत्तमं धुवं ॥ ५२ ॥
 एवुग्गदन्ते वि महातवोधणे, महामुणी महापइन्ने महायसे ।
 महानियण्ठिज्जमिणं महासुयं, से कहेई महया वित्थरेणं ॥ ५३ ॥
 तुट्ठो य सेणिओ राया, इणमुदाहु कयंजली ।
 अणाहत्तं जहाभूयं, सुट्ठु मे उवदंसियं ॥ ५४ ॥
 तुज्झंसुलद्धं खु मणुस्स जम्मं, लाभा सुलद्धा य तुमे महेसी ।
 तुब्भे सणाहा य सबन्धवा य, जं भे ठिया मग्गे जिणुत्तमाणं ॥ ५५ ॥
 तं सि नाहो अणाहाणं, सव्वभूयाण संजया ।
 खामेमि ते महाभाग, इच्छामि अणुसासिउं ॥ ५६ ॥
 पुच्छिऊण मए तुब्भं, आणविग्घाओ जो कओ ।
 निमन्ति या य भोगेहिं, तं सव्वं मरिसेहि मे ॥ ५७ ॥
 एवं थुणित्ताण स रायसीहो, अणगारसीहं परमाइ भत्तीए ।
 सओरोहो सपरियणो सबन्धवो, धम्माणुरत्तो विमलेण चेयसा ॥ ५८ ॥
 ऊससियरोमकूवो, काऊण य पयाहिणं ।

अभिवन्दिऊण सिरसा, अइयाओ नराहिवो ॥ ५९ ॥
 इयरो वि गुणसमिद्धो, तिगुत्तिगुत्तो तिदण्डविरओ य ।
 विहग इव विप्पमुक्को, विहरइ वसुहं विगयमोहो ॥ ६० ॥
 त्ति बेमि ॥ इअ महानियण्ठिज्जं समत्तं ॥

॥ अह समुदपालीयं एगवीसइमं अज्झयणं ॥

चम्पाए पालिए नाम, सावए आसि वाणिए । महावीरस्स भगवओ, सीसे सो उ महप्पणो ॥ १ ॥
 निग्गन्थे पावयणे, सावए से वि कोविए । पोएण ववहरन्ते, पिहुण्डं नगरमानए ॥ २ ॥
 पिहुण्डे ववहन्तस्स, वाणिओ देह धूयरं । तं ससत्तं पइगिज्झ, सदेसमह पत्थिओ ॥ ३ ॥
 अह पालियस्स घरिणी, समुदम्मि पसवई । अह बालए तहिं जाए, समुदपालि त्ति नामए ॥ ४ ॥
 खेमेण आगए चम्पं, सावए वाणिए घरं । संवड्ढई तस्स घरे, दारए से सुहोइए ॥ ५ ॥
 वावत्तरी कलाओ य, सिकखई नीइकोविए । जोवणेण य संपन्ने, सुरूवे पियदंसणे ॥ ६ ॥
 तस्स रुववइं भज्जं, पिया आणेइ रुविणिं । पासाए कीलए रम्मे, देवो दोगुन्दओ जहा ॥ ७ ॥
 अह अन्नया कयाई, पासायालीयणे ठिओ । वज्झमण्डणसोभागं, वज्झं पासइ वज्झगं ॥ ८ ॥
 तं पासिऊण संवेगं, समुदपालो इणमव्ववी । अहोऽसुमाण कम्माणं, निज्जाण पावगं इमं ॥ ९ ॥
 संबुद्धो सो तहिं भगवं, परमसंवेमागओ । आपुच्छमापियरो, पव्वए अणगारियं ॥ १० ॥

जहित्तु ऽसग्गन्थमहाकिलेसं, महन्तमोहं कसिणं भयावहं ।

परियायधम्मं चमिरोयएज्जा, वयाणि सीलाणि परीसहे य ॥ ११ ॥

अहिंससच्चं च अतेणगं च, तत्तो य वम्मं अपरिग्गहं च ।

पडिवज्जिया पंचमहवयाणि, चरिज्ज धम्मं जिणदेसियं विदू ॥ १२ ॥

सव्वेहिं भूएहिं दयानुकम्पी, खन्तिक्खमे संजमवम्मभयारी ।

सावज्जजोगं परिवज्जयन्तो, चरिज्ज भिक्खू सुसमाहिइन्दिए ॥ १३ ॥

कालेण कालं विहरेज्ज रट्ठे, बलाबलं जाणिय अप्पणो य ।

सीहो व सहेण न सन्तसेज्जा, वयजोग सुच्चा न असच्चमाहु ॥ १४ ॥

उवेहमाणो उ परिवएज्जा, पियमप्पियं सव्व तित्तिक्खएज्जा ।

न सव्व सव्वत्थ ऽभिरोयएज्जा, न यावि पूयं गरहं च संजए ॥ १५ ॥

अणेगच्छन्दाभिह माणवेहिं, जे भावओ संपगरेइ भिक्खू ।

भयभेरवा तत्थ उइन्ति भीमा, दिव्वा मणुस्सा अदुवातिरिच्छा ॥ १६ ॥

परीसहा दुव्विसहा अणेगे, सीयन्ति जत्था बहुकायरा नरा ।

से तत्थ पत्ते न वहिज्ज भिक्खू, संगामसीसे इव नागराया ॥ १७ ॥

सीओसिणा दंसमसा य फासा, आयंका विविहा फुसन्ति देहं ।

अकुक्कुओ तत्थऽहियासहेज्जा, रयाइ खेवेज्ज पुरे कयाइं ॥ १८ ॥

पहाय रागं च तद्देव दोसं, मोहं च भिक्खू सततं वियक्खणो ।
 मेरु व्व वाएण अकम्पमाणो, परीसहे आयगुत्ते सहेज्जा ॥ १९ ॥
 अणुन्नए नावणए महेसी, ने यावि पुयं गरहं च संजए ।
 स उज्जभावं पडिवज्ज, संजए, निव्वाणमगं विरए उवेइ ॥ २० ॥
 अरइरइसहे पहीणसंथवे, विरए आयहिए पहाणवं ।
 परमट्ठपएहिं चिट्ठई, छिन्नसोए अममे अकिंचणे ॥ २१ ॥
 विवित्तलयणाइ भएज्ज ताई, निरोवलेवाइ असंथडाइं ।
 इसीहि चिण्णाइ महायसेहिं, काएण फासेज्ज परीसहाइं ॥ २२ ॥
 सन्नाणनाणोवगए महेसी, अणुत्तरं चरिउं धम्मसंचयं ।
 अणुत्तरे नाणधरे जसंसी, ओभासई सूरिए वन्तलिकखे ॥ २३ ॥
 दुविहं खवेऊण य पुण्णपावं, निरंगणे सव्वओ विप्पमुक्के ।
 तरित्ता समुदं व महाभवोधं, समुदपाले अपुणागमं गए ॥ २४ ॥
 त्ति वेमि ॥ इअ समुदपालीयं समत्तं ॥

॥ अह रइनेमिज्जं बावीसइमं अज्झयणं ॥

सोरियपुरम्मि नयरे, आसि राया महिड्डिए । वसुदेवु त्ति नामेणं, रायलक्खणसंजुए ॥ १ ॥
 तस्स भज्जा दुवे आसी, रोहिणी देवई तहा । तासिं दोण्हं दुवे पुत्ता, इट्ठा रामकेसवा ॥ २ ॥
 सोरियपुरम्मि नयरे, आसि राया महिड्डिए । समुदविजए नामं, रायलक्खणसंजुए ॥ ३ ॥
 तस्स भज्जा सिवा नाम, तीसे पुत्तो महायसो । भगवं अरिट्ठनेमि त्ति, लोगनाहे दमीसरे ॥ ४ ॥
 सो ऽरिट्ठनेमिनाओ उ, लक्खणस्सरसंजुओ । अट्ठसहस्सलक्खणधरो, गोयमो कालगच्छवी ॥ ५ ॥
 वज्जरिसहसंधयणो, समचउरंसो झसोयरो । तस्स रायमईकन्नं, भज्जं जायइ केसवो ॥ ६ ॥
 अह सा रायवरकन्ना, सुसीला चारुपेहणी । सबलक्खणसंपन्ना, विज्जुसोयामणिप्पभा ॥ ७ ॥
 अहाह जणओ तीसे, वासुदेवं महिड्डियं । इहागच्छउकुमारो, जा से कन्नं ददामि हं ॥ ८ ॥
 सबोसहीहिं ण्हविओ, कयकोउयमंगलो । दिव्वजुयलपरिहिओ, आभरणेहिं विभूसिओ ॥ ९ ॥
 मत्तं च गन्धहत्थि, वासुदेवस्स जेडुगं । आरूढो सोहए अहियं, सिरे चूडामणि जहा ॥ १० ॥
 अह ऊसिएण छत्तेण, चामराहि य सोहिए । दसारचक्रेण य सो, सबओ परिवारिओ ॥ ११ ॥
 चउरंगिणीए सेणाए, रइयाए जहकमं । तुरियाण सन्निनाएण, दिव्वेण गगणं फुसे ॥ १२ ॥
 एयारिसाए इड्डीए, जुत्तीए उत्तमाइ य । नियगाओ भवणाओ, निज्जाओ वणिहपुंगवो ॥ १३ ॥
 अह सो तत्थ निज्जन्तो, दिस्स पाणे भयद्दुए । वाडेहिं पंजरेहिं च, सन्निरुद्धे सुदुक्खिए ॥ १४ ॥
 जीवियन्तं तु सम्पत्ते, मंसट्ठा भक्खियव्वए । पासेत्ता से महापन्ने, सारहिं इणमव्ववी ॥ १५ ॥
 कस्स अट्ठा इमे पाणा, एए सबे सुहेसिणो । वाडेहिं पंजरेहिं च, सन्निरुद्धा य अच्छहिं ॥ १६ ॥
 अह सारही तओ भणइ, एए भदा उ पाणिणो । तुज्जं विवाहकज्जम्मि, भोयावेउं बहुं जणं ॥ १७ ॥

सोऊण तस्स वयणं, बहुपाणिविणासणं । चिन्तेइ से महापन्नो, साणुकोसे जिए हिउ ॥ १८ ॥
 जइ मज्झ कारणा एए, हम्मन्ति सुवहू जिया । न मे एयं तु निस्सेसं, परलोगे भविस्सई ॥ १९ ॥
 सो कुण्डलाण जुयलं, सुत्तगं च महायसो । आभरणाणि य सत्ताणि, सारहिस्स पणामए ॥ २० ॥
 मणपरिणामे य कए, देवा य जहोइयं समोइण्णा । सब्बुइ सपरिसा, निक्खमणं तस्स काउं जे ॥ २१ ॥
 देवमणुस्सपरिवुडो, सीयारयणं तओ समारूढो, निक्खिमय वारगाओ, रेवयम्मि द्विओ भगवं ॥ २२ ॥
 उज्जाणं संपत्तो, ओइण्णो उत्तमाउ सीयाओ । साहस्सीपरिवुडो, मह निक्खमई उ शित्ताहिं ॥ २३ ॥
 अह से सुगन्धगन्धीए, तुरियं मउकुंचिए । सयमेव भुंचई केसे, पंचमुट्ठीहिं समाहिओ ॥ २४ ॥
 वासुदेवो य णं भणइ, लुत्तकेसं जिइन्दियं । इच्छिरियमणोरहं तुरियं, पावसू तं दमीसरा ॥ २५ ॥
 नाणेणं दंसणेणं च, चरित्तेण तहेव य । खत्तीए मुत्तीए, वड्डमाणो भवाहि य ॥ २६ ॥
 एवं ते रामकेसवा, दसारा य बहू जणा । अरिट्ठणेमिं वन्दित्ता, अभिगया दारगापुरिं ॥ २७ ॥
 सोऊण रायकन्ना, पवज्जं सा जिणस्स उ । नीहासा य निराणन्दा, सोगेण उ समुत्थिया ॥ २८ ॥
 राईमई विनिन्तेइ, धिरत्थु मम जीवियं । जा हं तेण परिच्चत्ता, सेयं पव्वइउं मम ॥ २९ ॥
 अह सा भमरसन्निभे, कुंचफणगसाहिए । सयमेव लुंचई केसें, धिइमन्ता ववस्सिया ॥ ३० ॥
 वासुदेवो य णं भणइ, लुत्तकेसं जिइन्दियं । संमारसागरं घोरं, तर कन्ने लहुं लहुं ॥ ३१ ॥
 सा पव्वइया सन्ती, पव्वावेसी तहिं वहुं सयणं परियणं चेव, सीलवन्ता बहुस्सुया ॥ ३२ ॥
 गिरिं रेवतयं जन्ती, वासेणुल्ला उ अन्तरा । वासन्ते अन्धयारम्मि, अन्तो लयणस्स सा ठिया ॥ ३३ ॥
 चीवराइं विसारन्ती, जहा जाय त्ति पासिया । रहनेमी भग्गचित्तो, पच्छा दिट्ठो य तीइ वि ॥ ३४ ॥
 मीया य सा तहिं दट्ठु, एगन्ते संजयं तयं । वाहाहिं काउ संगोप्फं, वेवमाणी निसीयई ॥ ३५ ॥
 अह सो वि रायपुत्तो, समुहविजयंगओ । भीयं पवेवियं दट्ठुं, इमं वक्कं उदाहरे ॥ ३६ ॥
 रहनेमी अहं भदे, सुरूवे चारुभासिणी । ममं भयाहि सुयणु, न ते पीला भविस्सई ॥ ३७ ॥
 एहि ता भुंजिमो भोए, माणुस्सं खु सुदुल्लहं । भुत्तभोगी पुणो पच्छा, जिणमगं चरिस्समो ॥ ३८ ॥
 दट्ठुण रहनेमिं तं, भग्गुजोयपराजियं । राईमई असम्भन्ता, अप्पाणं संवरे तहिं ॥ ३९ ॥
 अह सा रायवरकन्ना, सुट्ठिया नियमवए । जाई कुलं च सीलं च, रक्खमाणी तयं वए ॥ ४० ॥
 जइ सि रूवेण वेसमणो, लल्लिएण नलकुवरो । तहा वि ते न इच्छामि, जइ सि सक्खं पुरंदरो ॥ ४१ ॥
 धिरत्थु तेऽजसोकामी, जो तं जीवियकारणा । वन्तं इच्छसि आवाउं, सेयं ते मरणं भवे ॥ ४२ ॥
 अहं च भोगरायस्स, तं च सिअन्धगवण्हणो । मा कुले गन्धणा होमो, संजमं निहुओ चर ॥ ४३ ॥
 जइ तं काहिसि भावं, जा जा दच्छसि नारिओ । वायाइद्वो व हट्ठो, अट्ठिअप्पा भविस्ससि ॥ ४४ ॥
 गोवालो भण्डवालो वा, जहा तद्वणिस्सरो । एवं अणिस्सरो तं पि, सामणस्स भविस्ससि ॥ ४५ ॥
 तीसे सो वयणं सोच्चा, संययाए सुभासियं । अंकुसेण जहा नागो, धम्मे संपडिवाइओ ॥ ४६ ॥
 मणगुत्तो वायगुत्तो, कायगुत्तो जिइन्दिए । सामणं निच्चलं फासे, जावजीवं दट्ठवओ ॥ ४७ ॥
 उगं तवं चरित्ताणं, जाया दोणिं वि केवली । सवं कम्मं खवित्ताणं, सिद्धिं पत्ता अणुत्तरं ॥ ४८ ॥
 एवं करेन्ति संबुद्धा, पण्डिया पवियक्खणा । विणियट्ठन्ति भोगेसु, जहा सो पुरिसोत्तमो ॥ ४९ ॥

त्ति बेमि ॥ रहनेमिज्जं समत्तं ॥

॥ अह केसिगोयमिज्जं तेवीसइमं अज्झयणं ॥

जिणे पासि त्ति नामेण, अरहा लोगपूइओ । संबुद्धप्पा य सव्वन्नू, धम्मतिथयरे जिणे ॥ १ ॥
तस्स लोगपदीवस्स, आसि सीसे महायसे । केसी कुमारसमणे, विज्जाचरणपारगे ॥ २ ॥
ओहिनाणसुए बुद्धे, सीससंघसमाउले । गामाणुगामं रीयन्ते, सावत्थि पुरमागए ॥ ३ ॥
तिन्दुयं नाम उज्जाणं, तस्सि नगरमण्डले । फासुए सिज्जसंथारे, तत्थ वासमुवागए ॥ ४ ॥
अह तेणेव कालेणं धम्मतिथयरे जिणे । भगवं वद्धमाणि त्ति, सव्वलोगम्मि विस्सुए ॥ ५ ॥
तस्स लोगपदीवस्स आसि सीसे महायसे । भगवं गोयमे नामं, विज्जाचरणपारए ॥ ६ ॥
बारसंगविऊ बुद्धे, सीससंघसमाउले । गामाणुगामं रीयन्ते, से वि सावत्थिमागए ॥ ७ ॥
कोट्टुगं नाम उज्जाणं, तम्पी नगरमण्डले । फासुए सिज्जसंथारे, तत्थ वासमुवागए ॥ ८ ॥
केसी कुमारसमणे, गोयमे य महायसे । उभओ वि तत्थ विहरिंसु, अल्लीणा सुसमाहिया ॥ ९ ॥
उमओ सीससंघाणं, संजयाणं तवस्सिणं, । तत्थ चिन्ता समुप्पन्ना, गुणवन्ताण ताइणं ॥ १० ॥
केरिसो वा इमो धम्मो, इमो धम्मो व केरिसो । आयारधम्म पणिही, इमा वा सा व केरिसी ॥ ११ ॥
चाउज्जामो य जो धम्मो, जो इमो पंचसिक्खिओ । देसिओ वद्धमाणेण, पासेण य महामुणी ॥ १२ ॥
अचेलओ य जो धम्मो, जो इमो सन्तरुत्तरो । एगकज्जपवन्नाणं, विसेसे किं नु कारणं ॥ १३ ॥
अह ते तत्थ सीसाणं, विन्नाय पवितक्किय । समागमे कयइई, उभओ केसिगोयमा ॥ १४ ॥
गोयमे पडिरूवन्नू, सीससंघसमाउले । जेट्ठं कुलमवेक्खन्तो, तिन्दुयं वणमागओ ॥ १५ ॥
केसी कुमारसमणे, गोयमं दिस्समागयं । पडिरूवं पडिवत्तिं सम्मं संपडिवज्जई ॥ १६ ॥
पलालं फासुयं तत्थ, पंचमं कुसतणाणि य । गोयमस्स निसेज्जाए, खिप्पं संमणामए ॥ १७ ॥
केसी कुमारसमणे, गोयमे य महायसे । उभओ निसण्णा सोहन्ति, चन्दसूरसमप्पभा ॥ १८ ॥
समागया बहू तत्थ, पासण्डा कोउगा मिया । गिहत्थाणं चणेगाओ, साहस्सीओ समागया ॥ १९ ॥
देवदाणवगन्धवा, जक्खरक्खसकिन्नरा । अदिस्साणं च भूयाणं, आसी तत्थ समागमो ॥ २० ॥
पुच्छामि ते महाभाग, केसी गोयममब्बवी । तओ केसिं वुवण्तं तु, गोयमो इणमब्बवी ॥ २१ ॥
पुच्छ भन्ते अहिच्छं ते, केसिं गोयममब्बवी । तओ केसी अणुन्नाए, गोयमं इणमब्बवी ॥ २२ ॥
चाउज्जामो य जो धम्मो, जो इमो पंचसिक्खिओ । देसिओ वद्धमाणेण, पासेण य महामुणी ॥ २३ ॥
एगकज्जपवन्नाणं, विसेसे किं नु कारणं । धम्मे दुविहे मेहावी, कहं विप्पच्चओ न ते ॥ २४ ॥
तओ केसिं वुवण्तं तु, गोयमो इ मब्बवी । पन्ना समिक्खए धम्मतत्तं तत्तविणिच्छिं ॥ २५ ॥
पुरिमा उज्जुजडा उ, वंकजडा य पच्छिमा । पज्झिमा उज्जुपन्ना उ, तेण धम्मे दुहा कए ॥ २६ ॥
पुरिमाणं दुविसोज्झो उ, चरिमाणं दुरणुपालओ । कप्पो मज्झिमगाणं तु, सुविसोज्झो सुपालओ ॥ २७ ॥
साहु गोयम पन्ना ते, छिन्नो मे संसओ इमो । अन्नो वि संसओ मज्झं, तं मे कहसु गोयमा ॥ २८ ॥
अचेलगो य जो धम्मो, जो इमो सन्तरुत्तरो । देसिओ वद्धमाणेण, पासेण य महाजसा ॥ २९ ॥
एगकज्जपवन्नाणं, विसेसे किं नु कारणं । लिंगे दुविहे मेहावी, कहं विप्पच्चओ न ते ॥ ३० ॥

केसिमेवं बुवाणं तु, गोयमो इणमब्बवी । विन्नाणेण समागम्भ, धम्मसाहणमिच्छियं ॥ ३१ ॥
 पच्चयत्थं च लोगस्स, नाणाविहविगप्पणं । जत्तत्थं गणहत्थं च, लोगे लिंगपओयणं ॥ ३२ ॥
 अह भवे पइन्ना उ, मोक्खसम्भूयसाहणा । नाणं च दंसणं चेव, चरित्तं चेव निच्छए ॥ ३३ ॥
 साहु गोयम पन्ना ते, छिन्नो मे संसओ इमो । अन्नो वि संसओ मज्झं, तं मे कहसु गोयमा ॥ ३४ ॥
 अणेगाणं सहस्साणं, मज्जे चिट्ठसि गोयमा । ते य ते अहिगच्छन्ति, कहं ते निज्जिया तुमे ॥ ३५ ॥
 एगे जिए जिया पंच, पंच जिए जिया दस । इसहा उ जिणित्ताणं, सबसत्तु जिणामहं ॥ ३६ ॥
 सत्तू य इइ के बुत्ते, केसी गोयम मब्बवी । तओ केसिं बुवंतं तु, गोयमो इणमब्बवी ॥ ३७ ॥
 एगप्पा अजिए सत्तु, कसाया इन्दियाणि य । ते जिणित्तु जहानायं, विहरामि अहं मुणी ॥ ३८ ॥
 साहु गोयम पन्ना ते, छिन्नो मे संसओ इमो, अन्नो वि संसओ मज्झं, तं मे कहसु गोयमा ॥ ३९ ॥
 दीसन्ति यहवे लोए, पासबद्धा सरीरिणो । मुक्कपासो लहुब्भुओ, कहं विहरिसी मुणी ॥ ४० ॥
 ते पासे सबसो चित्ता, निदन्तूण उवायओ । मुक्कपासो लहुब्भुओ, कहं विहरामि अहं मुणी ॥ ४१ ॥
 पासा य इइ के बुत्ता, केसी गोयममब्बवी । केसिमेवं बुवंतं तु, गोयमो इणमब्बवी ॥ ४२ ॥
 रागद्वोसादओ तिवा, नेहपासा भयकरा । ते छिन्दित्ता जहानायं, विहरामि जहकमं ॥ ४३ ॥
 साहु गोयम पन्ना ते, छिन्नो मे संसओ इमो । अन्नो वि संसओ मज्झं, तं मे कहसु गोयमा ॥ ४४ ॥
 अन्तोहिययसंभूया, लया चिट्ठइ गोयमा । फलेइ विसभक्खीणि, सा उ उद्धरिया कहं ॥ ४५ ॥
 तं लयं सबसो छित्ता, उद्धरित्ता समूलियं । विहरामि जहानायं, मुक्को मि विसभक्खणं ॥ ४६ ॥
 लया य इइ का बुत्ता, केसी गोयममब्बवी । केसिमेवं बुवंतं तु, गोयमो इणमब्बवी ॥ ४७ ॥
 भवतण्हा लया बुत्ता, भीमा भीमफलोदया । तमुद्धिच्चा जहानायं, विहरामि जहासुहं ॥ ४८ ॥
 साहु गोयम पन्ना ते, छिन्नो मे संसओ इमो । अन्नो वि संसओ मज्झं, तं मे कहसु गोयमा ॥ ४९ ॥
 संपज्जलिया घोरा, अग्गी चिट्ठइ गोयमा । जे उहन्ति सरीरत्थे, कहं विज्झाविया तुमे ॥ ५० ॥
 महामेहप्पसूयाओ, गिज्झ वारि जलुत्तमं । सिंचामि समयं देहं, सित्ता नो व उहन्ति मे ॥ ५१ ॥
 अग्गी य इइ के बुत्ता, केसी गोयममब्बवी । केसिमेवं बुवंतं तु, गोयमो इणमब्बवी ॥ ५२ ॥
 कसाया अग्गिणो बुत्ता, सुयसीलतवा जल । सुयधाराभिहया सन्ता, भिन्ना हु न उहन्ति मे ॥ ५३ ॥
 साहु गोयम पन्ना ते, छिन्नो मे संसओ । अन्नो वि संसओ मज्झं, तं मे कहसु गोयमा ॥ ५४ ॥
 अयं साहसिओ भीमो, दुट्ठस्सो परिधावई । जंसि गोयममारूढो, कहं तेण न हीरसि ॥ ५५ ॥
 पधावन्तं निगिण्हामि, सुयरस्सीसमाहियं । न मे गच्छइ उम्मग्गं, मग्गं च पडिवज्जई ॥ ५६ ॥
 आसे य इइ के बुत्ते, केसी गोयममब्बवी । केसिमेवं बुवंतं तु, गोयमो इणमब्बवी ॥ ५७ ॥
 मणो साहसिओ भीमो, दुट्ठस्सो परिधावई । तं सम्मं तु निगिण्हामि, धम्मसिक्खइ कन्थगं ॥ ५८ ॥
 साहु गोयम पन्ना ते, छिन्नो मे संसओ इमो । अन्नो वि संसओ मज्झं, तं मे कहसु गोयमा ॥ ५९ ॥
 कुप्पहा बहवो लोए, जेहिं नासन्ति जन्तुणो । अट्ठाणे कह वट्ठन्ते, तं न नाससि गोयमा ॥ ६० ॥
 जे य मग्गेण गच्छन्ति, जे य उम्मग्गपट्ठिया । ते सबे वेइया मज्झं, तो न नस्सामहं मुणी ॥ ६१ ॥
 मग्गे य इइ के बुत्ते, केसी गोयममब्बवी । केसिमेवं बुवंतं तु, गोयमो इणमब्बवी ॥ ६२ ॥
 कुप्पवयणपासण्डी, सबे उम्मग्गपट्ठिया । सम्मग्गं तु जिणक्खायं, एस मग्गे हि उत्तमे ॥ ६३ ॥

साहु गोयम पन्ना ते, छिन्नो मे संसओ इमो। अन्नो वि संसओ मज्झं, तं मे कहसु गोयमा ॥ ६४ ॥
 महाउदगवेगेण, बुज्झमाणाण पाणिणं। सरणं गई पइट्ठा य, दीवं कं मन्नसी मुणी ॥ ६५ ॥
 अत्थि एगो महादीवो, वारिमज्झे महालओ। महाउदगवेगस्स, गई तत्थ न विज्जई ॥ ६६ ॥
 दीवे य इइ के बुत्ते, केसी गोयममब्बवी। केसिमेवं बुवंतं तु, गोयमो इणमब्बवी ॥ ६७ ॥
 जरामरणवेगेण, बुज्झमाणाण पाणिणं। धम्मो दीवो पइट्ठा य, गई सरणमुत्तमं ॥ ६८ ॥
 साहु गोयम पन्ना ते, छिन्नो मे संसओ इमो। अन्नो वि संसओ मज्झं, तं मे कहसु गोयमा ॥ ६९ ॥
 अण्णवंसि महोहंसि, नावा विपरिधावई। जंसि गोयममारूढो, कहं पारं गमिस्ससि ॥ ७० ॥
 जा उ सस्साविणी नावा, न सा पारस्स गामिणी। जा निरस्साविणी नावा, सा उ पारस्स गामिणी ॥ ७१ ॥
 नावा य इइ का बुत्ता, केसी गोयममब्बवी। केसिमेवं बुवंतं तु, गोयमो इणमब्बवी ॥ ७२ ॥
 सरीरमाहु नाव त्ति, जीवे बुच्चइ नाविओ। संसारो अण्णवो बुत्तो, जं तरंति महेसिणो ॥ ७३ ॥
 साहु गोयम पन्ना ते, छिन्नो मे संसओ इमो। अन्नो वि संसओ मज्झं, तं मे कहसु गोयमा ॥ ७४ ॥
 अन्धयारे तमे घोरे, चिट्ठन्ति पाणिणो बहू। को करिस्सइ उज्जोयं, सब्बलोयम्मि पाणिणं ॥ ७५ ॥
 उग्गओ विमलो भाणू, सब्बलोयपभंकरो। सो करिस्सइ उज्जोयं, सब्बलोयम्मि पाणिणं ॥ ७६ ॥
 भाणू य इइ के बुत्ते, केसी गोयममब्बवी। केसिमेवं बुवंतं तु, गोयमो इणमब्बवी ॥ ७७ ॥
 उग्गओ खीणसंसारो, सब्बन्नु जिणभक्खरो। सो करिस्सइ उज्जोयं, सब्बलोयम्मि पाणिणं ॥ ७८ ॥
 साहु गोयम पन्ना ते, छिन्नो मे संसओ इमो। अन्नो वि संसओ मज्झं, तं मे कहसु गोयमा ॥ ७९ ॥
 सारीरमाणसे दुक्खे, बज्झमाणाण पाणिणं। खेमं सिवमणाबाहं, ठाणं किं मन्नसी मुणी ॥ ८० ॥
 अत्थि एगं धुवं ठाणं, लोग्गम्मि दुरारुहं। जत्थ नत्थि जरा मच्चू, वाहिणो वेयणा तहा ॥ ८१ ॥
 ठाणे य इइ के बुत्ते, केसी गोयममब्बवी। केसिमेवं बुवंतं तु, गोयमो इणमब्बवी ॥ ८२ ॥
 निव्व्राणं ति अबाहं ति, सिद्धी लोग्गमेव य। खेमं सिवं अणाबाहं, जं चरंति महेसिणो ॥ ८३ ॥
 तं ठाणं सासयं वासं, लोयग्गम्मि दुरारुहं। जं संपत्ता न सोयन्ति, भवोहन्तकरा मुणी ॥ ८४ ॥
 साहु गोयम पन्ना ते, छिन्नो मे संसओ इमो। नमो ते संसयातीत, सब्बसुत्तमहोयही ॥ ८५ ॥
 एवं तु संसए छिन्ने, केसी घोरपरक्कमे। अभिवन्दिता सिरसा; गोमयं तु महायसं ॥ ८६ ॥
 पंचमहध्वयधम्मं, पडिक्कइ भावओ। पुरिमस्स पच्छिमम्मि, मग्गे तत्थ सुहावहे ॥ ८७ ॥
 केसीगोयमओ निच्चं, तम्मि आसि समागमे। सुयसीलसमुक्कंसो, महत्थत्थविणिच्छओ ॥ ८८ ॥
 तोसिया परिसा सत्ता, सम्मग्गं समुवट्ठिया। संथुया ते पसीयन्तु, भयवं केसिगोयमे ॥ ८९ ॥

त्ति बेमि ॥ केसिगोयमिज्जं समत्तं ॥ २३ ॥

॥ अह समिईओ चउवीसइमं अज्झयणं ॥

अट्ठ पवयणमायाओ, समिई गुत्ती तहेव य । पंचेव य समिईओ, तओ गुत्तीउ आहीया ॥ १ ॥
 इरियाभासेसणादाणे, उच्चारे समिई इय । मणगुत्ती वयगुत्ती, कायगुत्ती य अट्ठमा ॥ २ ॥
 एयाओ अट्ठ समिईओ, समासेण वियाहिया । दुवालसंगं जिणक्खायं, मायं जत्थ उ पवयणं ॥ ३ ॥
 आलम्बणेण कालेण, मग्गेण जयणाय य । चउकारणपरिसुद्धं, संजए इरियं रिए ॥ ४ ॥
 तत्थ आलम्बणं नणं दंसणं चरणं तहा । काले य दिवसे वुत्ते, मग्गे उप्पहवज्जिए ॥ ५ ॥
 दव्वओ खेत्तओ चेव, कालओ भावओ तहा । जायणा चउव्विहा वुत्ता, तं मे कित्तयओ सुण ॥ ६ ॥
 दव्वओ चक्खुसा पेहे, जुगमित्तं च खेत्तओ । कालओ जाव रीइज्जा, उवउत्ते य भावओ ॥ ७ ॥
 इन्दियत्थे विवज्जित्ता, सज्झायं चेव पञ्चहा । तम्मुत्ती तप्पुरकारे, उवउत्ते रियं रिए ॥ ८ ॥
 कोहे माणे य मायाए, लोभे य उवउत्तया । हासे भए मोहरिए, विकहासु तहेव य ॥ ९ ॥
 एयाइं अट्ठ ठाणाइं, परिधज्जित्तु संजए । असावज्जं मियं काले, भासं भासिज्ज पन्नवं ॥ १० ॥
 गवेसणाए गहणे य, परिभोगेसणाय य । आहारोवहिसेज्जाए, एए तिन्नि विसोहए ॥ ११ ॥
 गग्गमुप्पायणं पढमे, वीए सोहेज्ज एसणं । परिभोयम्मि चउक्कं, विसोहेज्ज जयं जई ॥ १२ ॥
 ओहोवहोवग्गहियं, भण्डगं दुविहं मुणी । गिण्हन्तो निक्खिवन्तो वा, पउंजेज्ज इमं विहिं ॥ १३ ॥
 चक्खुसा पडिलेहित्त, पमजेज्ज जयं जई । अइए निक्खिवेज्जा वा, दुहओ वि समिए सया ॥ १४ ॥
 उच्चारं पासवणं, खेलं सिंघाणजल्लियं । आहारं उवहिं देहं, अन्नं वावि तहाविहं ॥ १५ ॥
 अणावायमसंलोए, अणोवाए चेव होइ संलोए । आवायमसंलोए, आवाए चेव संलोए ॥ १६ ॥
 अणावायमसंलोए, परस्सणुवघाइए । समे अज्झुसिरे यावि, अचिरकालकयम्मि य ॥ १७ ॥
 वित्थिण्णे दूरमोगाटे, नासन्ने विलवज्जिए । तसपाणबीयरहिए, उच्चाराईणि वोसिरे ॥ १८ ॥
 एयाओ पञ्च समिईओ, समासेण वियाहिया । एत्तो य तओ गुत्तीओ, वोच्छामि अणुपुव्वसो ॥ १९ ॥
 संरम्भसमारम्भे, आरम्भे य तहेव य । चउत्थी असच्चमोसा य, मणगुत्तीओ चउव्विहा ॥ २० ॥
 संरम्भसमारम्भे, आरम्भे य तहेव य । मणं पवत्तमाणं तु, नियत्तेज्ज जयं जई ॥ २१ ॥
 सच्चा तहेव मोसा य, सच्चमोसा तहेव य । चउत्थी असच्चमोसा य, वइमुत्ती चउव्विहा ॥ २२ ॥
 संरम्भसमारम्भे, आरम्भे य तहेव य । वयं पवत्तमाणं तु, नियत्तेज्ज जयं जई ॥ २३ ॥
 ठाणे निसीयणे चेव, तहेव य तुयट्ठणे । उल्लंघणपल्लंघणे, इन्दियाण य जुंजणे ॥ २४ ॥
 संरम्भसमारम्भे, आरम्भम्मि तहेव य । कायं पवत्तमाणं तु, नियत्तेज्ज जयं जई ॥ २५ ॥
 एयाओ पञ्च समिईओ, चरणस्स य पवत्तणे । गुत्ती नियत्तणे वुत्ता, असुभत्थेसु सब्बसा ॥ २६ ॥
 एसा पवयणमाया, जे सम्मं आयरे मुणी । खिप्पं सब्बसंसार, विप्पमुच्चइ पण्डिए ॥ २७ ॥

त्ति वेमि ॥ इअ समिईओ समत्ताओ

॥ अह जन्नइज्जं पञ्चवीसइमं अज्झयणं ॥

माहणकुलसंभूओ, आसि विप्पो महायसो । जायाई जमजन्नम्मि, जयघोसि त्ति नामओ ॥ १ ॥
 इन्दियग्गामनिग्गाही, मग्गगाभी महामुणी । गामाणुग्गामं रीयंते, पत्ते वाणारसिं पुरिं ॥ २ ॥
 वाणारसीए बहिया, उज्जाणम्मि मणोरमे । फासुए सेज्जसंथारे, तत्थ वासमुवागए ॥ ३ ॥
 अह तेणेव कालेणं, पुरीए तत्थ माहणे । विजयघोसि त्ति नामेण, जन्नं जयइ पेयवी ॥ ४ ॥
 अह से तत्थ अणगारे, मासक्खमणपारणे । विजयघोसस्स जन्नम्मि, भिक्खमट्ठा उवट्ठिए ॥ ५ ॥
 समुवट्ठियं तहिं सन्तं, जायगो पडिशेहिए । न हु दाहामि ते भिक्खं, भिक्खू जायाहि अन्नओ ॥ ६ ॥
 जे य वेयविज्ज विप्पा, जन्नट्ठा य जे दिया । जोइसंगविऊ जे य, जे य धम्माण पारगा ॥ ७ ॥
 जे समत्था समुद्धत्तुं, परमप्पाणमेव य । तेसिं अन्नमणिदेयं, भो भिक्खू सब्बकामियं ॥ ८ ॥
 सो तत्थ एव पडिसिद्धो, जायगेण महामुणी । न वि रुट्ठो न वि तुट्ठो, उत्तिमट्ठगवेसओ ॥ ९ ॥
 नन्नट्ठं पाणहेउं वा, नवि निवाहणाय वा । तेसिं विमोक्खणट्ठाए, इणं वयणमब्बवी ॥ १० ॥
 नवि जाणसि वेयमुहं, नवि जन्नाण जं मुहं । नक्खत्ताण मुहं जं च, जं च धम्माण वा मुहं ॥ ११ ॥
 जे समत्था समुद्धत्तुं, परमप्पाणमेव य । न ते तुमं वियाणासि, अह जाणासि तो भण ॥ १२ ॥
 तस्सक्खेवपमोक्खं तु, अवयन्तो तहिं दिओ । सपरिसो पंजली होउं, पुच्छई तं महामुणिं ॥ १३ ॥
 वेयाणं च मुहं बूहि, बूहि जन्नाण जं मुहं । नक्खत्ताण मुहं बूहि, बूहि धम्माण वा मुहं ॥ १४ ॥
 जे समत्था समुद्धत्तुं, परमप्पाणमेव य । एयं मे संसयं सब्बं, साहू कहसु अच्छओ ॥ १५ ॥
 अग्गिहुत्तमुहा वेया, अन्नट्ठी वेयसा मुहं । नक्खत्ताण मुहं चन्दो, धम्माण कासवो मुहं ॥ १६ ॥
 जहा चन्दं गहाईया, चिट्ठन्ती पंजलीउडा । वन्दमाणा नमंसन्ता, उत्तमं मतहारिणो ॥ १७ ॥
 अजाणगा जन्नवाई, विज्जामाहणसंपया । गूढा सज्झायतवसा, भासच्छन्ना इवग्गिणो ॥ १८ ॥
 नो लोए बम्भणो वुत्तो, अग्गीव महिओ जहा । सया कुमलसंदिट्ठं, तं वयं बूम माहणं ॥ १९ ॥
 जो न सज्जइ आगन्तुं, पवयन्तो न सोयइ । रमइ अज्जवयणम्मि, तं वयं बूम माहणं ॥ २० ॥
 जायरूवं जहामट्ठं, निद्धन्तमलपावगं । रागदोसभयाईयं, तं वयं बूम माहणं ॥ २१ ॥
 तवस्सियं किसं दन्तं अवचियमंससोणियं । सुवयं पत्तनिवाणं, तं वयं बूम माहणं ॥ २२ ॥
 तसपाणे वियणोत्ता, संगहेण य थावरे । जो न हिंसइ ति विहेण, तं वयं बूम माहणं ॥ २३ ॥
 कोहा वा जइ वा हासा, लोहा वा जइ वा भया । मुसं न वयई जो उ, तं वयं बूम माहणं ॥ २४ ॥
 चित्तमन्तमचित्तं वा, अप्पं वा जइ वा बहुं । न गिण्हाइ अदत्तं जे, तं वयं बूम माहणं ॥ २५ ॥
 दिवमाणुसतेरिच्छं, जो न सेवइ मेहुणं । मणसा कायवक्केणं, तं वयं बूम माहणं ॥ २६ ॥
 जहा पोमं जले जायं, नोवलिप्पइ वारिणा । एवं अलित्तं कामेहिं, तं वयं बूम माहणं ॥ २७ ॥
 अलोळुयं मुहाजीविं, अणगारं अकिंचणं । असंसत्तं गिहत्थेसु, तं वयं बूम माहणं ॥ २८ ॥
 जहिता पुव्वसंजोगं, नाइसंगे य बन्धवे । जो न सज्जइ भोगेसु, तं वयं बूम माहणं ॥ २९ ॥
 पसुबन्धा सब्बवेया य, जट्ठं च पावकम्मुणा । न तं तायन्ति दुस्सीलं, कम्माणि बलवन्ति हि ॥ ३० ॥

न वि मुण्डिण समणो, न ओंकारेण बम्भणो । न मुणी रणवासेणं, कुसचीरेण तावसो ॥ ३१ ॥
 समयाए समणो होइ बम्भचेरेण बम्भणो । नाणेण उ मुणी होइ, तवेण होइ तावसो ॥ ३२ ॥
 कम्मुणा बम्भणो होइ, कम्मुणा होइ खत्तिओ । वइसो कम्मुणा होइ, सुद्धो हवइ कम्मुणा ॥ ३३ ॥
 एए पाउकरे बुद्धे, जेहिं होइ सिणायओ । सबकम्मविणिम्मुक्कं, तं वयं बूम माहणं ॥ ३४ ॥
 एवं गुणसमाउत्ता, जे भवन्ति दिउत्तमा । ते समत्था उ उद्धत्तुं, परमप्पाणमेव य ॥ ३५ ॥
 एवं तु संसए छिन्न, विजयघोसे य माहणे । समुदाय तयं तं तु, जयघोसं महामुणिं ॥ ३६ ॥
 तुद्धे य विजयघोसे, इणमुदाहु कयंजली । माहणत्तं जहाभूयं, सुद्धु मे उवदंसियं ॥ ३७ ॥
 तुब्भे जइया जन्नाणं, तुब्भे वेयविऊ विऊ । जोइसंगविऊ तुब्भे, तुब्भे धम्माण पारगा ॥ ३८ ॥
 तुब्भे समत्था उद्धत्तुं, परमप्पाणमेव य । तमणुग्गहं करेहम्हं, भिक्खेणं भिक्खु उत्तमा ॥ ३९ ॥
 न कज्जं मज्झ भिक्खेण, खिप्पं निक्खमसू दिया । मा भमिहिसि भयावद्धे, घोरे संसारसागरे ॥ ४० ॥
 उवलेवो होइ भोगेसु, अभोगी नोवलिप्पई । भोगी भमइ संसारे, अभोगी विप्पमुच्चई ॥ ४१ ॥
 उल्लो सुक्खो य दो छूटा, गोलया मट्टियामया । दो वि आवडिया कुड्डे, जो उल्लो सोऽत्थ लग्गई ॥ ४२ ॥
 एवं लग्गन्ति दुस्सेहा, जे नरा कामलालसा । विरत्ता उ न लग्गन्ति, जहा से सुक्खगोलए ॥ ४३ ॥
 एवं से विजयघोसे, जयघोसस्स अन्तिए । अणगारस्स निक्खन्तो, धम्मं सोच्चा अणुत्तरं ॥ ४४ ॥
 खवित्ता पुव्वकम्माइं, संजमेण तवेण य । जयघोसविजयघोमा, सिद्धं पत्ता अणुत्तरं ॥ ४५ ॥

त्ति वेमि ॥ इअ जन्नइज्जं समत्तं ॥ २५ ॥

॥ अह सामायारी छवीसइमं अज्झयणं ॥

सामायारिं पवक्खामि, सब्बदुक्खविमोक्खणिं । जं चरित्ताण निग्गन्था, तिण्णा संसारसागरं ॥ १ ॥
 षट्ठमा आवस्सिया नाम, विइया य निसीहिया । आपुच्छणा य तइया, चउत्थी पडिपुच्छणा ॥ २ ॥
 पंचमी छन्दणा नाम, इच्छाकारो य छट्ठओ । सत्तमो मिच्छाकारो य, तहकारो य अट्ठमो ॥ ३ ॥
 अब्भुट्ठाणं च नवमं, दसमी उपसंपदा । एसा दसंगा साहूणं, सामायारी पवेइया ॥ ४ ॥
 गमणे आवस्सियं कूज्जा, ठाणे कुज्ज निसीहियं । आपुच्छणं सयंकरणे, परकरणे पडिपुच्छणं ॥ ५ ॥
 छन्दणा दवजाएणं, इच्छाकारो य सारणे । मिच्छाकारो य निन्दाए, तहकारो पडिस्सुए ॥ ६ ॥
 अब्भुट्ठाणं गुरुपूया, अच्छणे उवसंपदा । एवं दुपंचसंजुत्ता, सामायारी पवेइया ॥ ७ ॥
 पुब्विल्लम्मि चउब्भाए, आइच्चम्मि समुट्ठिए । भण्डयं पडिलेहित्ता, वन्दिता य तओ गुरुं ॥ ८ ॥
 पुच्छिज्ज पंजलीउडो, किं कायवं मए इह । इच्छं निओइउं भन्ते, वेयावच्चे व सज्झाए ॥ ९ ॥
 वेयावच्चे निउत्तेण, कायवं अगिलायओ । सज्झाए वा निउत्तेण, सब्बदुक्खविमोक्खणे ॥ १० ॥
 दिवसस्स चउरो भागे, भिक्खु कुज्जा वियक्खणो । तओ उत्तरगुणे कुज्जा, दिणभागेसु चउसु वि ॥ ११ ॥
 षट्ठमं पोरिसि सज्झायं, बीयं ज्ञाणं झियायई । तइयाए भिक्खायरियं, पुणो चउत्थीइ सज्झायं ॥ १२ ॥
 आसाढे मासे दुपया, पोसे मासे चउप्पया । चित्तासोएसु मासेसु, तिप्पया हवइ पोरिसी ॥ १३ ॥
 अंगुलं सत्तरत्तेणं, पक्खेणं च दुरंगलं । वड्डए हायए वावि, मासेणं चउरंगुलं ॥ १४ ॥

आसाढबहुलपक्खे, भद्वए कत्तिए य पोसे य । फग्गुणवाइसाहेसु य, बोद्धवा ओमरत्ताओ ॥ १५ ॥
 जेढ्ढामूले आसाढसावणे, छहिं अंगुलेहिं पडिलेहा । अट्ठहिं बीयतम्मि, तइए दस अट्ठहिं चउत्थे ॥ १६ ॥
 रत्तिं पि चउरो भागे, भिक्खू कुज्जा वियक्खणो । तओ उत्तरगुणे कुज्जा, राइभाएसु चउसु वि ॥ १७ ॥
 पढमं पोरिसि सज्झायं, बीयं ज्ञाणं झियायई । तइयाए निदमोक्खं तु, चउत्थी भुजो वि सज्झायं ॥ १८ ॥
 जं नेइ जया रत्तिं, नक्खत्त तम्मि नहचउम्भाए । संपत्ते विरमेज्जा, सज्झायं पओसकालम्मि ॥ १९ ॥
 तम्मेव य नक्खत्ते, गयणचउम्भागसावसेसम्मि । वेरत्तियं पि कालं, पडिलेहिंत्ता मुणी कुज्जा ॥ २० ॥
 पुव्विल्लम्मि चउम्भाए, पडिलेहिंत्ताण भण्डयं । गुरुं वन्दित्तु सज्झा, यकुज्जा दुक्खविमोक्खणं ॥ २१ ॥
 पोरिसीए चउम्भाए, वन्दित्ताण तओ गुरुं । अपडिकमित्ता कालस्स, भायणं पडिलेहए ॥ २२ ॥
 मुहपोत्तिं पडिलेहिंत्ता, पडिलेज्ज गोच्छगं । गोच्छगलइयंगुलिओ, वत्थाइं पडिलेहए ॥ २३ ॥
 उट्ठं थिरं अतुरियं, पुवं ता वत्थमेव पडिलेहे । तो विइयं पप्फोडे, तइयं च पुणो पमज्जिज्ज ॥ २४ ॥
 अणच्चावियं अवलियं, अणाणुबन्धिममोसलं चैव । छप्पुरिमा नव खोडा, पाणीपाणिविसोहणं ॥ २५ ॥
 आरभडा सम्म हा, वज्जेयवा य मोसलो तइया । पप्फोडणा चउत्थी, विक्खित्ता वेइया छट्ठी ॥ २६ ॥
 पसिढिलपलम्बलोला, एगा मोसा अणेगरूवधुणा । कुणइ पमाणिपमायं, संकियगणणोवगं कुज्जा ॥ २७ ॥
 अणूणाइरित्तपडिलेहा, अविवच्चासा तहेव य । पढमं पयं पसत्थं, सेसाणि य अप्पसत्थाइं ॥ २८ ॥
 पडिलेहणं कुणन्तो, मिहो कहं कुणइ जणवयकहं वा । देइ व पच्चक्खणं, वाएइ सयं पडिच्छइ वा ॥ २९ ॥
 पुढवी आउक्काए, तेऊ-वऊ-वणस्सइ-तसाणं । पडिलेहणापमत्तो, छण्हं पि विराहओ होइ ॥ ३० ॥
 पुढवी-आउक्काए, तेऊ-वाऊ वणस्सइ-तसाणं । पडिलेहणाआउत्तो, छण्हं संरक्खओ होइ ॥ ३१ ॥
 तइयाए पोरिसीए, भत्तं पणं गवेसए । छण्हं अन्नयराए, कारणम्मि समुट्ठिए ॥ ३२ ॥
 वेयण वेयावच्चे, इरियट्ठाए य संजमट्ठाए । तह पाणवत्तियाए, छट्ठं पुण धम्मचिन्ताए ॥ ३३ ॥
 निग्गन्थो धिइमन्तो, निग्गन्थी वि न करेज्ज छहिं चैव । थाणेहि उ इमेहिं, अणइकमणाइ से होइ ॥ ३४ ॥
 आयंके उवसग्गे, तित्तिक्खया बम्भचेरगुत्तीसु । पाणिदया तवहेउं, सरीरवोच्छे यणट्ठाए ॥ ३५ ॥
 अवसेसं भएडगं गिज्ज, चक्खुसा पडिलेहए । परमद्वजोयणाओ, विहारं विहरए मुणो ॥ ३६ ॥
 चउत्थीए पोरिसीए, निक्खित्ताण भायणं । सज्झायं तओ कुज्जा, सबभावविभावणं ॥ ३७ ॥
 पोरिसीए चउम्भाए, वन्दित्ताण तओ गुरुं । पडिकमित्ता कालस्स, सेजं तु पडिलेहए ॥ ३८ ॥
 पासवणुच्चारभूमिं च, पडिलेहिज्ज जयं जई । काउस्सगं तओ कुज्जा, सबदुक्खविमोक्खणं ॥ ३९ ॥
 देवसियं च अईयारं, चिन्तिज्जा अणुपुव्वसो । नाणे य दंसणे चैव, चरित्तम्मि तहेव य ॥ ४० ॥
 पारियकाउस्सग्गो, वन्दित्ताण तओ गुरुं । देसियं तु अईयारं, आलोएज्ज जहकम्मं ॥ ४१ ॥
 पडिकमित्तु निस्सल्लो, वन्दित्ताण तओ गुरुं । काउस्सगं तओ कुज्जा, सबदुक्खविमोक्खणं ॥ ४२ ॥
 पारियकाउस्सग्गो, वन्दित्ताण तओ गुरुं । थुइमंगलं च काउण, कालं संपडिलेहए ॥ ४३ ॥
 पढमं पोरिसि सज्झायं, वित्तियं ज्ञाणं झियायई । तइयाए निदमोक्खं तु, सज्झायं तु चउत्थिए ॥ ४४ ॥
 पोरिसीए चउत्थीए, कालं तु पडिलेहिया । सज्झायं तु तओ कुज्जा, अबोहेन्तो असंजए ॥ ४५ ॥
 पोरिसीए चउम्भाए, वन्दिऊण तओ गुरुं । पडिकमित्तु कालस्स, कालं तु पडिलेहए ॥ ४६ ॥
 आगए कायवोस्सग्गे; सबदुक्खविमोक्खणे । काउस्सगं तओ कुज्जा सबदुक्खविमोक्खणं ॥ ४७ ॥

राइयं च अईयारं, चिन्तिज्ज अणुपुवसो । नाणंमि दंसणंमि य, चरित्तमि तवंमि य ॥ ४८ ॥
 पारियकाउस्सग्गो, वन्दिताण तओ गुरुं । राइयं तु अईयारं, आलोएज्ज जहक्कम्मं ॥ ४९ ॥
 पडिक्कमित्तु निस्सल्लो, वन्दिताण तओ गुरुं । काउस्सग्गं तओ कुज्जा, सब्बदुक्खणं ॥ ५० ॥
 किं तवं षडिवज्जामि, एवं तत्थ विचिन्तिए । काउस्सग्गं तु पारित्ता, वन्दई य तओ गुरुं ॥ ५१ ॥
 पारियकाउस्सग्गो, वन्दिताण तओ गुरुं । तवं तु पडिवज्जेज्जा, कुज्जा सिद्धाण संथवं ॥ ५२ ॥
 एसा सामायारी, समासेण वियाहिया । जं चरित्ता बहू जीवा, तिण्णा संसारसागरं ॥ ५३ ॥

ति बेमि ॥ इअ सामायारी समत्ता ॥ २६ ॥

॥ अह खलुंकिज्जं सत्तवीसइमं अज्झयणं ॥

थेरे गणहरे गग्गे, मुणी आसि विसारए । आइण्णे गणिभावम्मि, समाहिं पडिसंधए ॥ १ ॥
 वहणे वहमाणस्स, कन्तरं अइवत्तई । जोगे वहमाणस्स, संसारो अइवत्तई ॥ २ ॥
 खलुंके जो उ जोएइ, विहम्माणो किलिस्सई । असमाहिं ज वेएइ, तोत्तओ से य भज्जई ॥ ३ ॥
 एगं डसइ पुच्छम्मि, एगं विन्धइ ऽभिकखणं । एगो भंजइ समिलं, एगो उप्पहदट्ठिओ ॥ ४ ॥
 एगो पडइ पासेणं, निवेसइ निवज्जई । उक्कुहइ उप्फिडइ, सढे बालगवी वए ॥ ५ ॥
 माई मुद्रेण पडइ, कुद्रे गच्छे पडिप्पहं । मयलक्खेण चिट्ठई, वेणेण य पद्दामई ॥ ६ ॥
 छिन्नाले छिन्दई सेलिं, दुदन्तो भंजए जुगं । सेवि य सुस्सुयाइत्ता, उज्जहित्ता पलायए ॥ ७ ॥
 खलुंका जारिसा जोज्जा, दुस्सीसा वि हु तारिसा । जोइया धम्मजाणम्मि, भजन्ती धिइदुब्बला ॥ ८ ॥
 इड्ढीगारविए एगे, एगेऽत्थ रसगारवे । सायागारविए एगे, एगे सुचिरकोहणे ॥ ९ ॥
 भिक्खालसिए एगे, एगे ओमाणभीरुए । थद्वे एगे आणुसासम्मी, हेऊहिं कारणेहि य ॥ १० ॥
 सो वि अन्तरभासिल्लो, दोसमेव पकुवई । आयरियणं तु वयणं, पडिक्कलेइऽभिकखणं ॥ ११ ॥
 न सा ममं वियाणाइ; न य सा मज्झ दाहिई । निग्गया होहिई मन्ने, सहू अनोत्थ वच्चउ ॥ १२ ॥
 पेसिया पलिउंचन्ति, ते परियन्ति, समन्तओ । रायवेड्ढिं च मन्नन्ता, करेन्ति मिउडिं मुहे ॥ १३ ॥
 वाइया संगहिया चेव, भत्तपाणेण पोसिया । जायपक्खा जहा हंसा, पक्कमन्ति दिसो दिंसि ॥ १४ ॥
 अह सारही विचिन्तेइ, खलुंकेहिं समागओ । किं मज्झ दुट्ठसीसेहिं, अप्पा मे अबसीयई ॥ १५ ॥
 जारिसा मम सीसाओ, तारिसा गलिगद्दहा । गलिगद्दहे जहिताणं, दढं पणिण्हई तवं ॥ १६ ॥
 मिउमद्वसंपन्नो, गम्भीरो सुसमाहिओ । विहरइ महिं महप्पा, सीलभूएण अप्पणं ॥ १७ ॥

त्ति बेमि ॥ खलुंकिज्जं समत्तं ॥ २७ ॥

॥ अह मोक्खग्गइ अट्ठावीसइमं अज्झयणं ॥

मोक्खमग्गइ तच्चं, सुणेह जिणभासियं । चउकारणसंजुत्तं, नाणदंसणलक्खणं ॥ १ ॥
 नाणं च दंसणं चैव, चरित्तं च तवो तहा । एसः मग्गु त्ति पन्नत्तो, जिणेहिं वरदंसिहिं ॥ २ ॥
 नाणं च दंसणं चैव, चरित्तं च तवो तहा । एयमग्गमणुप्पत्ता, जीवा गच्छन्ति सोग्गइं ॥ ३ ॥
 तत्थ पंचविहं नाणं, सुयं आभिनिबोहियं । ओहिनाणं तु तइयं, मणनाणं च केवलं ॥ ४ ॥
 एयं पंचविहं नाणं, दव्वाण य गुणाण य । पज्जवाण य सव्वेसिं, नाणं नाणीहि दंसियं ॥ ५ ॥
 गुणाणमासओ दव्वं, एगदव्वस्सिया गुणा । लक्खणं पज्जवाणं तु अभओ अस्सिया भवे ॥ ६ ॥
 धम्मो अहम्मो आगासं, कालो पुग्गल-जन्तवो । एस लोगो त्ति पन्नत्तो, जिणेहिं वरदंसिहिं ॥ ७ ॥
 धम्मो अहम्मो आगासं, दव्वं इक्किक्कमाहियं । अणन्ताणि य दव्वाणि, कालो, पुग्गलजन्तोवो ॥ ८ ॥
 गइलक्खणो उ धम्मो, अहम्मो ठाणलक्खणो । भायणं सव्वदव्वाणं, नहं ओगाहलक्खणं ॥ ९ ॥
 वत्तणालक्खणो कालो, जीवो उवओगलक्खणो । नाणेणं दंसणेणं च, सुहेण य दुहेण य ॥ १० ॥
 नाणं च दंसणं चैव, चरित्तं च तवो तहा । वीरियं अवओगो य, एयं जीवस्स लक्खणं ॥ ११ ॥
 सहन्धयार-उज्जोओ, पहा छाया तवे इ वा । वण्णरसगन्धफासा, पुग्गलाणं तु लक्खणं ॥ १२ ॥
 एगत्तं च पुहत्तं च, संखा संठाणमेव य । संजोगा य विभागा य, पज्जवाणं तु लक्खणं ॥ १३ ॥
 जीवाजीवा य बन्धो य, पुण्णं पावासवा तहा । संवरो निज्जरा मोक्खो, सन्तेए तहिया नव ॥ १४ ॥
 तहियाणं तु भावाणं, सव्वभावे उवएमणं । भावेणं सहहन्तस्स, सम्मत्तं तं वियाहियं ॥ १५ ॥
 निसग्गुवएसरुई, आणरुई सुत्त-वीयरुइमेव । अभिगम वित्थाररुई, किरिया-संखेव धम्मरुई ॥ १६ ॥
 भूयत्थेणाहिगया, जीवाजीवा य पुण्णपावं च । सहसम्मइयासवसंवरो य रोएइ उ निस्सग्गो ॥ १७ ॥
 जो जिणदिट्ठे भावे, चउब्बिहे सहहाइ सयमेव । एमेव नन्नह त्ति य, स निसग्गरुइ त्ति नायवो ॥ १८ ॥
 एए चैव उ भावे, उवइट्ठे जो परेण सहइई । छउमत्थेण जिणेण व, उवएसरुइ त्ति नायवो ॥ १९ ॥
 रागो दोसो मोहो, अन्नाणं जस्स अवगयं होइ । आणाए रोएतो, सो खलु आणारुई नामं ॥ २० ॥
 जो सुत्तमहिज्जन्तो, सुएण ओगाहई उ सम्मत्तं । अंणेण बहिरेण व, सो सुत्तरुइ त्ति नायवो ॥ २१ ॥
 एगेण अणेगाइं, पयाइं जो पसरई उ सम्मत्तं । उदए व तेल्लविन्दू, सो वीयरुइ त्ति नायवो ॥ २२ ॥
 सो होइ अभिगमरुई, सुयनाणं जेण अत्थओ दिट्ठं । एकारस अंगइं, पइण्णगं दिट्ठिवाओ य ॥ २३ ॥
 दव्वाण सबभावा, सबपमाणेहि जस्स उवलद्धा । सव्वाहि नयविहीहिं, वित्थाररुइ त्ति नायवो ॥ २४ ॥
 दंसणनाणचरित्ते, तवविणए सबसमिइगुत्तीसु । जो किरियाभावरुई, सो खलु किरियारुई नाम ॥ २५ ॥
 अणभिग्गहियकुदिट्ठी संखेवरुइ त्ति होइ नायवो । अविसारओ पवयणे, अणभिगहिओ य सेसेसु ॥ २६ ॥
 जो अत्थिकायधम्मं, सुधम्मं खलु चरित्तधम्मं च । सहइइ जिणाभिहियं, सो धम्मरुइ त्ति नायवो ॥ २७ ॥
 परमत्थसंथवो वा, सुदिट्ठपरमत्थसेवणं वा वि । वावन्नकुदंसणवज्जणा, य सम्मत्तसदहणा ॥ २८ ॥
 नत्थि चरित्तं सम्मत्तविहूणं, दंसणे उ भइयव्वं । सम्मत्तचरित्ताइं, जुगवं पुवं व समत्तं ॥ २९ ॥

नादंसणिस्स नाणं, नाणेण विणा न हुन्ति चरणगुणा ।

अगुणिस्स नत्थि मोक्खो, नत्थि अमोक्खस्स निव्वाणं

निस्संकिय-निकंखिय निव्वित्तिच्छा अमूढदिट्ठी य । उव्ववूह थिरीकरणे, वच्छल पभावणे अट्ठ ॥ ३१ ॥
 सामाइत्थ पढमं, छेओवट्ठावणं भये वीयं । परिहारविसुद्धीयं, सुहुमं तह संपरायं च ॥ ३२ ॥
 अकसायमहक्खायं, छउमथत्स जिणस्स वा । एवं चयरित्तकरं, चारित्तं होइ आहियं ॥ ३३ ॥
 तवो य दुविहो वुत्तो, बाहिरब्भन्तरो तदा । बाहिरो छव्विहो वुत्तो, एमेवब्भन्तरो तवो ॥ ३४ ॥
 नाणेण जाणई भावे, दंसणेण य सदहे । चरित्तेण निगिण्हाइ, तवेण परिसुज्झई ॥ ३५ ॥
 खवेत्ता पुव्वकमाइं, संजमेण तवेण य । सब्बदुक्खपहीणट्ठा, पक्कमन्ति महेसिणो ॥ ३६ ॥

त्ति बेमि ॥ इअ मोक्खमग्गगई समत्ता ॥ २८ ॥

॥ अह सम्मत्तपरक्रमं एगूणतीसइमं अज्झयणं ॥

सुयं मे आउसं-तेण भगवया एवमक्खायं । इह खलु सम्मत्तपरक्रमे नाम अज्झयणे समणेण भगवया महावीरेण कासवेणं पवेइए, जं सम्मं सदहित्ता पतियाइत्ता रोयइत्त फासित्ता पालइत्ता ती-रित्ता कित्तइत्ता सोहइत्ता आराहित्ता आणाए अणुपालइत्त बहवे जीवा सिज्झन्ति वुज्झन्ति मुच्चन्ति परिनिवायन्ति सब्बदुक्खाणमन्तं करेन्ति । तस्स णं अयमट्ठे एवमाहिज्झइ, तंजहा-संवेगे १ निवेए २ धम्मसट्ठा ३ गुरुसाहम्मियसुरसूसणया ४ आलोयणया ५ निन्दणया ६ गरिहणया ७ सामाइए ८ चउवीसत्थवे ९ वन्दणे १० पडिकमणे ११ काउस्सग्गे १२ पच्चक्खाणे १३ थवथुईमंगले १४ कालपडिलेइणया १५ पायच्छित्तकरणे १६ खमावयवया १७ सज्झाए १८ वायणया १९ पडिपु-च्छणया २० पडियट्ठणया २१ अणुप्पेहा २२ धम्मकहा २३ सुयस्स आराहणया २४ एगग्गमण-संनिवेसणया २५ संजमे २६ तवे २७ वोदाणे २८ सुहसाए २९ अपडिवट्ठया ३० विवित्तसयणा-सणसेवणया ३१ विणियट्ठणया ३२ संभोगपच्चक्खाणे ३३ उवहिपच्चक्खाणे ३४ आहारपच्चक्खाणे ३५ कसायपच्चक्खाणे ३६ जोगपच्चक्खाणे ३७ सरीरपच्चक्खाणे ३८ सहायपच्चक्खाणे ३९ भत्तप-च्चक्खाणे ४० सम्भावपच्चक्खाणे ४१ पडिरूवणया ४२ वेयावच्चे ४३ सब्बगुणसंपुण्णया ४४ वीय-रागया ४५ खन्ती ४६ मुत्ती ४७ महवे ४८ अज्जवे ४९ भावसच्चे ५० करणसच्चे ५१ जोगसच्चे मणगुत्तया ५३ वयगुत्तया ५४ कायगुत्तया ५५ मणसमाधारणया ५६ वयसमाधारणया ५७ का-यसमाधारणया ५८ नाणसंपन्नया ५९ दंसणसंपन्नया ६० चरित्तसंपन्नया ६१ सोइन्दियनिग्गहे ६२ चक्खिन्दियनिग्गहे ६३ घाणिन्दियनिग्गहे ६४ जिब्बिन्दियनिग्गहे ६५ फासिन्दियनिग्गहे ६६ कोहविजए ६७ माणविजए ६८ मायाविजए ६९ लोहविजए ७० पेज्जदोसमिच्छादंसणविजए ७१ सेलेसी ७२ अकम्मया ॥ ७३ ॥

संवेगेणं भन्ते जीवे किं जणयइ । संवेगेणं अणुत्तरं धम्मसट्ठं जणयइ । अणुत्तराए धम्मसट्ठाए संवेगं हव्वमागच्छइ अणन्ताणुबन्धिकोहमाणमायालोभे खवेइ । कम्मं न बन्धइ । तप्पच्चयं च णं मिच्छत्तविसोहिं काऊण दंसणाराहए भवइ । दंसणविसोहीए य णं विसुद्धाए अत्तेगइए तेणेव भवग्गहणेणं सिज्झई । सोहीए य णं विसुद्धाए तच्च पुणो भवग्गहणं नाइक्कमइ ॥ १ ॥ निव्वेदेणं

भन्ते जीवे किं जणयइ । निवेदेणं दिवमाणुसतेरिच्छएसु कामभोगेसु निवेयं हवमागच्छेइ सबविसएसु विरज्जइ । सबविसएसु विरज्जमाणे आरम्भपरिच्चायं करेइ । आरम्भपरिच्चायं करमाणे संसारमग्गं वोच्छिन्दइ, सिद्धिमग्गं पडिवन्ने य भवइ ॥२॥ धम्मसद्धाए णं भन्ते जीवे किं जणयइ । धम्मसद्धाए णं मायासोकखेसु रज्जमाणे विरज्जइ । आगारधम्मं च णं चयइ । अणगारिए णं जीवे सारीरमाणसाणं दुक्खाणं छेयणभेयणसंजोगार्हणं वोच्छेयं करेइ अच्चावाहं च सुहं निव्वत्तेइ ॥ ३ ॥ गुरुसाहम्मिय-सुस्ससणाए णं विणयपडिवत्तिं जणयइ । विणयपडिवन्ने य णं जीवे अणाच्चासायणसीले नेरइयतिरि-क्खजोणियमणुस्सदेवदुग्गईओ निरुम्मइ । वण्णसंजलणभत्तिवहुमाणयाए मणुस्सदेवगईओ निबन्धइ, सिद्धिं सोग्गइं च विसोहेइ । पसत्थाइं च णं विणयामूलाइं सव्वकज्जाइं साहेइ अन्ने य बहवे जीवे विणिइत्ता भवइ ॥४॥ आलोयणाए णं भन्ते जीवे किं जणयइ । आलोयणाए णं मायानियाणमिच्छा-दंसणमल्लानं मोक्खमग्गविग्घाणं अणंतसंसारबन्धणाणं उद्धरणं करेइ । उज्जुभावं च जणयइ । उज्जु-भावपडिवन्ने य णं जीवे अमाई इत्थीवेयनपुंसगवेयं च न बन्धइ । पुव्वद्वं च णं निज्जरेइ ॥ ५ ॥ निन्दणयाए णं भन्ते जीवे किं जणयइ । निन्दणयाए णं पच्छाणुतावं जणयइ । पच्छाणुतावेणं विर-ज्जमाणे करणगुणसेट्ठिं पडिवज्जइ । करणगुणसेट्ठीपडिवन्ने य णं अणगारे मोहणिज्जं कम्मं उग्घाएइ ॥६॥ गरहणयाए णं भन्ते जीवे किं जणयइ । गरहणयाए अपुरेकारं जणयइ । अपुरेकारगए णं जीवे अप्प-सत्थेहिंतो जोगेहिंतो नियत्तेइ, पसत्थे य पडिवज्जइ । पसत्थजोगपडिवन्ने य णं अणगारे अणन्तघाइपज्जवे खवेइ ७॥सामाइएणं भन्ते जीवे किं जणयइ । सामाइएणं सावज्जजोगविरइं जणयइ ॥८॥ चउव्वीस-त्थएणं भन्ते जीवे किं जणयइ । च० दंसणविसोहिं जणयइ ॥९॥ वन्दणएणं भन्ते जीवे किं जणयइ । व० नीयागोयं कम्मं खवेइ । उच्चागोयं कम्मं निबन्धइ सोहग्गं च णं अपडिहियं आणाफलं निव्वत्तेइ । दाहिणभावं च णं जणयइ ॥१०॥ पडिक्कमणेणं भन्ते जीवे किं जणयइ । प० वयच्छिद्धानि पिहेइ । पिहियवयच्छिद्दे पुण जीवे निरुद्धासवे असबलचरित्ते अट्टमु पवयणमायासु उवउत्ते अपुहत्ते सुप्पणि-हिइंदिए विहरइ ॥ ११ ॥ काउसग्गेणं भन्ते जीवे किं जणयइ । का० तीयपडुप्पन्नं पायच्छित्तं विसोहेइ । विसुद्धपायच्छित्ते य जीवे निव्वुयहियए ओहरिभरु ध्व भारवहे पसत्थज्झाणोवगए सुहं सुहेणं विहरइ ॥ १२ ॥ पच्चक्खाणेणं भन्ते जीवे किं जणयइ । प० आसवदाराइं निरुम्मइ । पच्च-क्खाणेणं इच्छानिरोहं जणयइ । इच्छानिरोहं गए य णं जीवे सव्वदव्वेसु विणीयतण्हे सीइभूए वि-हरइ ॥ १३ ॥ थवथुइमंमलेणं भन्ते जीवे किं जणयइ । य० नाणदंसणचरित्तबोहिलाभं जणयइ । नाणदंसणचरित्तबोहिलाभसंपन्ने य णं जीवे अन्तकिरियं कप्पविमाणोववत्तिगं आराहणं आराहेइ ॥ १४ ॥ कालपडिलेहणयाए णं भन्ते जीवे किं जणयइ । का० नाणावरणिज्जं कम्मं खवेइ ॥ १५ ॥ पायच्छित्तकरणेणं भन्ते जीवे किं जणयइ । पा० पावविसोहिं जणयइ, निरइयारे वावि भवइ । सम्मं च णं पायच्छित्तं पडिवज्जमाणे मग्गं च मग्गफलं च विसोहेइ, आयारं च आयारफलं च आराहेइ ॥ १६ ॥ खमावणयाए णं भन्ते जीवे किं जणयइ । ख० पल्हायणभावं जणयइ । पल्हायणभावमु-व्वगए य सव्वपाणभूयजीवसत्तेसु-मेत्तीभावमुप्पाएइ । मेत्तीभावमुव्वगए यावि जीवे भावविसोहिं काऊण निब्भए भवइ ॥१७॥ सज्झाएणं भन्ते जीवे किं जणयइ । स० नाणावरणिज्जं कम्मं खवेइ ॥ १८ ॥ वायणाए णं भन्ते जीवे किं जणयइ । वा० निज्जरं जणयइ सुयस्स य अणासायणाए

वट्टए । सुयसअणासायणाए वट्टमाणे तित्थधम्मं अवलम्बइ । तित्थधम्मं अलम्बमाणे महानिज्जरे महापज्जवसाणे भवइ ॥ १९ ॥ पडिपुच्छणयाए णं भन्ते जीवे किं जणयइ । प० सुत्तत्थतदुभयाइं विसोदेइ । कंखामोहणिज्जं कम्मं वोच्छिन्दइ ॥ २० ॥ परियट्ठणाए णं भन्ते जीवे किं जणयइ । प० वंजणाइं जणयइ, वंजणलद्धिं च उप्पाएइ ॥ २१ ॥ अणुप्पेहाए णं भन्ते जीवे किं जणयइ । अ० आउ-यवज्जाओ सत्तकम्मपगडीओ घणियबन्धणवट्ठाओ सिढिलबन्धणलद्धाओ पकरेइ । दीहकालट्ठिइयाओ हस्सकालठिइ आसी पकरेइ । तिवाणुभावाओ मन्दाणुभावाओ पकरेइ । (बहुपएसग्गाओ अप्पएस-ग्गाओ पकरेइ) आउयं च णं कम्मं सिया बन्धइ, सिया नो बन्धइ । असावेयणिज्जं च णं कम्मं नो भुज्जो भुज्जो उवचिणाइ । अणाइयं च णं अणवदग्गं दीहमद्धं चाउरन्तं संसारकन्तारं खिप्पामेव वीइ-वमइ ॥ २२ ॥ धम्मकहाए णं भन्ते जीवे किं जणयइ । ध० निज्जरं जणयइ । धम्मकहाए णं पवयणं पभावेइ । पवयणपभावेणं जीवे आगमेसस्स भदत्ताए कम्मं निबन्धइ ॥ २३ ॥ सुयस्स आराहणयाए णं भन्ते जीवे किं जणयइ । सु० अन्नाणं खवेइ न य संकिलिस्सइ ॥ २४ ॥ एगग्गमणसंनिवेसण-याए णं भन्ते जीवे किं जणयइ । ए० चित्तनिरोहं करेइ ॥ २५ ॥ संजमएणं भन्ते जीवे किं जण-यइ । स० अणण्हयत्तं जणयइ ॥ २६ ॥ तवेणं भन्ते जीवे किं जणयइ ॥ तवेणं वोदाणं जणयइ ॥ २७ ॥ वोदाणेणं भन्ते जीवे किं जणयइ । वो० अकिरियं जणयइ । अकिरियाए भवित्ता तओ पच्छा सिज्झइ, बुज्झइ मुच्चइ परिनिवायइ सब्बदुक्खाणमन्तं करेइ ॥ २८ ॥ सुहसाएणं भन्ते जीवे किं जणयइ । सु० अणुस्सुयत्तं जणयइ । अणुस्सुयाए णं जीवे अणुकम्पए अणुभडे विगयसोगे चरित्तमोहणिज्जं कम्मं खवेइ ॥ २९ ॥ अप्पडिबद्धयाए णं भन्ते जीवे किं जणयइ । अ० निरसंगत्तं जणयइ । निस्संगत्तेणं जीवे एगे एगग्गचित्ते दिया य राओ य असज्जमाणे अप्पडिबद्धे यावि विहरइ ॥ ३० ॥ विवित्तसयणासणयाए णं भन्ते जीवे किं जणयइ । वि० चरित्तगुत्तिं जणयइ । चरित्तगुत्ते य णं जीवे विवित्ताहारे दट्ठचरित्ते एगन्तरए मोक्खभावपडिवन्ने अट्ठविहकम्मगंठिं नि-ज्जरेइ ॥ ३१ ॥ विनियट्ठयाए णं भन्ते जीवे किं जणयइ । वि० पावकम्माणं अकरणयाए अब्भुट्ठेइ । पुव्वबद्धाण य निज्जरणयाए तं नियत्तेइ । तओ पच्छा चाउरन्तं संसारकन्तारं वीइवयइ ॥ ३२ ॥ सं-भोगपच्चक्खाणेणं भन्ते जीवे किं जणयइ । सं० आलम्बणाइं खवेइ । निरालम्बणस्स य आयट्ठिया योगा भवन्ति । सएणं लाभेणं संमुस्सइ, परलाभं नो आसादेइ, परलाभं नो तकेइ, नो पीहेइ, नो पत्थेइ, नो अभिलसइ । परलाभं अणस्सायमाणे अतक्केमाणे अपीहमाणे अपत्थेमाणे अणभिलसमाणे दुच्चं सुहसेज्जं उववसंपज्जित्ता णं विहरइ ॥ ३३ ॥ उवहिपच्चक्खाणेणं भन्ते जीवे किं जणयइ । उ० अपलिमन्थं जणयइ । निरुवहिए णं जीवे निक्कंखी उवहिमन्तरेण य न संकिलिस्सई ॥ ३४ ॥ आहा-रपच्चक्खाणेणं भन्ते जीवे किं जणयइ । आ० जीवियासंसप्पओगं वोच्छिन्दइ । जीवियासंसप्पओगं वोच्छिन्दिता जीवे आहारमन्तरेणं न संकिलिस्सइ ॥ ३५ ॥ कसायपच्चक्खाणेणं भन्ते जीवे किं जणयइ । क० वीयरगभावं जणयइ । वीयरगभावपडिवन्ने वि य णं जीवे समसुहदुक्खे भवइ ॥ ३६ ॥ जोगपच्चक्खाणेणं भन्ते जीवे किं जणयइ । जो० अजोगत्तं जणयइ अजोगे णं जीवे नवं कम्मं न बन्धइ, पुव्वबद्धं निज्जरेइ ॥ ३७ ॥ सरीरपच्चक्खाणेणं भन्ते जीवे किं जणयइ । स० सिद्धा-इसयगुणकित्तणं निवत्तेइ सिद्धाइसयगुणसंपन्ने य णं जीवे लोगग्गमुवगए परमसुही भवइ ॥ ३८ ॥

सहायपच्चक्खाणेण भन्ते जीवे किं जणयइ । स० एगीभावं जणयइ । एगीभावभूए वि य णं जीवे एगत्तं भावेमाणे अप्पझंझे अप्पकलहे अप्पकसाए अप्पतुमंतुमे संजमबहुले संवरबहुले समाहिए यावि भवइ ॥ ३९ ॥ भत्तपच्चक्खाणेण भन्ते जीवे किं जणयइ । भ० अणेगाइं भवसयाइं निरुम्भइ ॥ ४० ॥ सब्भावपच्चक्खाणेणं भन्ते जीवे किं जणयइ स० अनियाडिं जणयइ । अनियट्ठिपडिवन्ने य अणगारे चत्तारि केवलिकम्मंसे खवेइ तंजहा-वेयणिज्जं आउयं नामं गोयं । तओ पच्छा सिज्जइ बुज्जइ मुच्चइ सब्बदुक्खाणमन्तं करेइ ॥ ४१ ॥ पडिरूवणयाए णं भन्ते जीवे किं जणयइ । प० लाघवियं जणयइ । लघुभूए णं जीवे अप्पमत्ते पाण्डलिंगे पसत्थलिंगे विसुद्धसम्मत्ते सत्तसमिइसमत्ते सब्बपाणभूयजीवसत्तेसु वीससणिज्जरूवे अप्पडिलेहे जिइन्दिए विउलतवसमिइससन्नागए यावि भवइ ॥ ४२ ॥ वेयावच्चेणं भन्ते जीवे किं जणयइ । वे० तित्थयरत्तामगोत्तं कम्मं निबन्धइ ॥ ४३ ॥ सब्बगुणसंपन्नयाए णं भन्ते जीवे किं जणयइ । स० अपुणरावत्तिं पत्तए य णं जीवे सारीरमाणमाणं दुक्खाणं नो भागी भवइ ॥ ४४ ॥ वीयरगयाए णं भन्ते जीवे किं जणयइ । धी० नेहाणुबन्धणाणि तण्हाणुबन्धणाणि य वोच्छिन्दइ, मणुन्नामणुन्नेसु सदफरिसरूवरसगन्धसु चेव विरज्जइ ॥ ४५ ॥ खन्तीए णं भन्ते जीवे किं जणयइ ० ख० परीसहे जिणइ ॥ ४६ ॥ मुत्तीए णं भन्ते जीवे किं जणयइ । मु० अकिंचणं जणयइ । अकिंचणे य जीवे अत्थलोलाणं अपत्थणिज्जो भवइ ॥ ४७ ॥ अज्जवयाए णं भन्ते जीवे किं जणयइ । अ० काउज्जुययं भावुज्जुययं भासुज्जुययं अविसंवायणं जणयइ । अविसंवायणसंपन्नयाए णं जीवे धम्मस्स आराहए भवइ ॥ ४८ ॥ मद्वयाए णं भन्ते जीवे किं जणयइ । म० अणुस्सियत्तं जणयइ । अणुस्सियत्तेण जीवे मिउमद्वसंपन्ने अट्ट मयट्ठाणाइं निट्ठावेइ ॥ ४९ ॥ भावसच्चेणं भन्ते जीवे किं जणयइ । भा० भावविसोहिं जणयइ । भावविसोहिए वट्टमाणे जीवे अरहन्तपन्नत्तस्स धम्मस्स आराहणयाए अष्मुट्ठेइ । अरहन्तपन्नत्तस्स धम्मस्स आराहणयाए अब्भुट्ठित्ता परलोगधम्मस्स आराहए भवइ ॥ ५० ॥ करणसच्चेणं भन्ते जीवे किं जणयइ । क० करणसत्तिं जणयइ । करणसच्चे वट्टमाणे जीवे जहा वाई तहा कारी यावि भवइ ॥ ५१ ॥ जोग सच्चेणं भन्ते जीवे किं जणयइ । जो० जोगं विसोहेइ ॥ ५२ ॥ मणगुत्तयाए णं भन्ते जीवे किं जणयइ म० जीवे एगगं जणयइ । एगगचित्ते णं जीवे मणगुत्ते संजमाराहए भवइ ॥ ५३ ॥ वयगुत्तयाए णं भन्ते जीवे किं जणयइ । व० निव्वियारं जणयइ । निव्वियारे णं जीवे वइगुत्ते अज्झप्पजोगसाहणजुत्ते यावि विहरइ ॥ ५४ ॥ कायमुत्तयाए णं भन्ते जीवे किं जणयइ । का० संवरं जणयइ । संवरेणं कायगुत्ते पुणो पावासवनिरोहं करेइ ॥ ५५ ॥ मणसमाहारणयाए णं भन्ते जीवे किं जणयइ । म० एगगं जणयइ । एगगं जणइत्ता नाणपज्जवे जणयइ । नाणपज्जवे जणइत्ता सम्मत्तं विसोहेइ मिच्छतं च निज्जरेइ ॥ ५६ ॥ वयसमाहारणयाए भन्ते जीवे किं जणयइ । व० वयसमाहारणदंमणपज्जवे विसोहेइ । वयसाहारणदंसणपज्जवे विसोहित्ता सुलहबोहियत्तं निव्वत्तेइ, दुल्लहबोहियत्तं निज्जरेइ ॥ ५७ ॥ कायसमाहारणयाए णं भन्ते जीवे किं जणयइ । का० चरित्तपज्जवे विसोहेइ । चरित्तपज्जवे विसोहित्ता अहक्खायचरित्तं विसोहेइ । अहक्खायचरित्तं विसोहेत्ता चत्तारि केवलिकम्मंसे खवेइ । तओ पच्छा सिज्जइ बुज्जइ मुच्चइ परिनिब्बाइ सब्बदुक्खाणमन्तं करेइ ॥ ५८ ॥ नाणसंपन्नयाए णं भन्ते जीवे किं जणयइ । ना० जीवे सदभावाहिगमं जणयइ । नाणसंपन्ने जीवे चाउरन्ते संसारकन्तारे न विणस्सइ ।

जहा खई ससुत्ता न विणस्सइ तहा जीवे ससुत्ते संसारे न विणस्सइ, नाणविणयतवचरित्तजोगे संपा-
उणइ, ससमयपरसमयविसारए य असंघायणिज्जे भवइ ॥ ५९ ॥ दंसणसंपन्नयाए णं भंते जीवे किं
जणयइ । दं० भवमिच्छत्तछेयणं करेइ न विज्झायइ । परं अविज्झाएमाणे अणुत्तरेणं नाणदंसणेणं
अप्पाणं संजोएमाणे सम्मं भावेमाणे विहरइ ॥ ६० ॥ चरित्तसंपन्नयाए णं भंते जीवे किं जणयइ ।
च० सेलेसीभावं जणयइ । सेलेसिं पडिवन्ने य अणगारे चत्तारि केवलिकम्मसे खवेइ । तओ पच्छा
सिज्झइ बुज्झइ मुच्चइ परिनिवायइ सब्बदुक्खाणमन्तं करेइ ॥ ६१ ॥ सोइन्दियनिग्गहेणं भन्ते जीवे
किं जणयइ । सो० मणुन्नामणुन्नेसु सदेसु रागदोसनिग्गहं जणयइ, तप्पच्चइयं कम्मं न बन्धइ, पुव्व-
बद्धं च निज्जरेइ ॥ ६२ ॥ चक्खिन्दियनिग्गहेणं भन्ते जीवे किं जणयइ । च० मणुन्नामणुन्नेसु
रूवेसु रागदोसनिग्गहं जणयइ, तप्पच्चइयं कम्मं न बन्धइ, पुव्वबद्धं च निज्जरेइ ॥ ६३ ॥ घाणि-
न्दियनिग्गहेणं भन्ते जीवे किं जणयइ । घा० मणुन्नामणुन्नेसु गन्धेसु रागदोसनिग्गहं जणयइ,
तप्पच्चइयं कम्मं न बन्धइ, पुव्वबद्धं च निज्जरेइ ॥ ६४ ॥ जिब्बिन्दियनिग्गहेणं भन्ते जीवे किं
जणयइ । जि० मणुन्नामणुन्नेसु रसेसु रागदोषनिग्गहं जणयइ, तप्पच्चइयं कम्मं न बन्धइ, पुव्वबद्धं
च निज्जरेइ ॥ ६५ ॥ फासिन्दियनिग्गहेणं भन्ते जीवे किं जणयइ । फा० यणुन्नामणुन्नेसु फासेसु
रागदोषनिग्गहं जणयइ, तप्पच्चइयं कम्मं न बन्धइ, पुव्वबद्धं च निज्जरेइ ॥ ६६ ॥ कोहविजएणं भन्ते
जीवे किं जणयइ । को० खन्तिं जणयइ. कोहवेयणिज्जं कम्मं न बन्धइ, पुव्वबद्धं च निज्जरेइ ॥ ६७ ॥
माणविजएणं भन्ते जीवे किं जणयइ । मा० मद्दवं जणयइ, मायावेयणिज्जं कम्मं न बन्धइ, पुव्वबद्धं
च निज्जरेइ ॥ ६८ ॥ मायाविजएणं भन्ते जीवे किं जणयइ । मा० अज्जवं जणयइ, मायावेयणिज्जं
कम्मं न बन्धइ, पुव्वबद्धं च निज्जरेइ ॥ ६९ ॥ लोभविजएणं भन्ते जीवे किं जणयइ । लो० संतोसं
जणयइ, लोभवेयणिज्जं कम्मं न बन्धइ, पुव्वलद्धं च निज्जरेइ ॥ ७० ॥ पिज्जदोसमिच्छादंसणविजएणं
भन्ते जीवे किं जणयइ । पि० नाणदंसणचरित्ताराहणयाए अब्बुद्धेइ । अट्ठविहस्स कम्मस्स कम्म-
गण्ठिविमोयणयाए तप्पढमयाए जहाणुपुवीए अट्ठद्वीसइविहं मोहणिज्जं कम्मं उग्घाएइ, पञ्चविहं
नाणावरणिज्जं, नवविहं दंसणावरणिज्जं, पंचविहं अन्तराइयं, एए तिन्नि वि कम्मसे खवेइ । तओ
पच्छा अणुत्तरं कसिणं पडिपुत्तं निरावरणं दितिमरं विमुद्धं लोगालोपपभावं केवलवरनाणदंसणं
समुप्पाडेइ । जाव सजोगी भवइ, ताव ईरियावहियं कम्मं निबन्धइ सुहफरिसं दुसमयठियं । तं
पढमसमए बद्धं, विइयसमए वेइयं, तइयसमए निज्जिणं, तं बद्धं पुट्ठं उदीरियं वेइयं निज्जिणं
सेयाले य अकम्भयाच भवइ ॥ ७१ ॥ अह आउयं पालइत्ता अन्तोमुहुत्तद्वावसेसाए जोगनिरोहं करेमाणे
सुहुमकिरियं अप्पडिवाइं सुक्कज्झाणं झायमाणे तप्पढमयाए मणजोगं निरुंभइ वयजोगं निरुंभइ, कायजोगं
निरुंभइ, आणपाणुनिरोहं करेइ, ईसि पंचरहस्सक्खरुच्चारणट्ठाए य णं अणगारे समुच्छिन्नकिरियं अ-
नियट्ठिसुक्कज्झाणं झियायमाणे वेयणिज्जं आउयं नामं गोत्तं च एए चत्तारि कम्मसे जुगवं खवेइ ॥ ७२ ॥
तओ ओरालियतेयकम्माइं सव्वाहिं विप्पजणाहिं विप्पजहित्ता उज्जुसेट्ठिपत्ते अफुसमाणगई उट्ठं एग-
समएणं अविग्गहेणं तत्थ गन्ता सागारोवउत्ते सिज्झइ बुज्झइ जाव अंतं करेइ ॥ ७३ ॥ एस खलु
सम्मत्तपरक्कम्मस्स अज्झयणस्स अट्ठे समणेणं भगवया वहावीरेणं आघविए पन्नविए परुविए दंसिए
उवदंसिए ॥ ७४ ॥ त्ति वेमि ॥ इअ सम्मत्तपरक्कमे समत्ते ॥ २९ ॥



॥ अह तवमगं तीसइमं अज्झयणं ॥

जहा उ पावगं कम्मं, रागदोससमज्झियं । खवेइ तवसा भिक्खु, तमेगग्गमणो सुण ॥ १ ॥
 पाणिवहमुसावायाअदत्तमेहुणपरिग्गहा विरओ । राईभोयणविरओ, जीवो भवइ अणासवो ॥ २ ॥
 पंचसमिओ तिगुत्तो, अकसाओ जिइन्दिओ । अगारवो य निस्सहो, जीवो होइ अणासवो ॥ ३ ॥
 एएसिं तु विवच्चासे, रागदोससमज्झियं । खवेइ उ जहा भिक्खु, तमेगग्गमणो सुण ॥ ४ ॥
 जहा महातलायस्स, सन्निद्धे जलागमे । उस्सिचणाए तवणाए, कमेणं सोसणा भवे ॥ ५ ॥
 एवं तु संजयस्सावि, पावकम्मनिरासवे । भवकोडीसंचियं कम्मं, तवसा निज्जरिज्जइ ॥ ६ ॥
 सो तवो दुविहो वुत्तो, बाहिरम्भन्तरो तहा । बाहिरो छविहो वुत्तो, एवमम्भन्तरो तवो ॥ ७ ॥
 अणसणमूणोयरिया, भिक्खायरिया य रसपरिच्चाओ । कायकिलेसो संलीणया य बज्झो तवो होइ ॥ ८ ॥
 इत्तरिय मरणकाला य, अणसणादुविहा भवे । इत्तरिय सावकंखा, निरवकंखा उ विइज्जिया ॥ ९ ॥
 जो सो इतरियतवो, सो समासेण छविहो । सेदितवो पयरतवो, घणो य तह होइ वग्गो य ॥ १० ॥
 तत्तो य वग्गवग्गो, पंचमो छट्ठओ पइणतवो । मणइच्छियचित्तथो, नायवो होइ इतरिओ ॥ ११ ॥
 जा सा अणसणा मरणे, दुविहा सा वि वियाहिया । सवियारमवियारा, कायचिट्ठं पई भवे ॥ १२ ॥
 अहवा सपरिकम्मा, अपरिकम्मा य आहिया । नीहारिमनीहारी, आहारच्छेओ दोसु वि ॥ १३ ॥
 ओमोयरणं पंचहा, समासेण वियाहियं । दवओ खेत्तकालेण, भावेणं पज्जवेहि य ॥ १४ ॥
 जो जस्स उ आहारो, तत्तो ओमं तु जो करे । जहन्नेणेगसिंथाई, एवं दवेण ऊ भवे ॥ १५ ॥
 गामे नगरे तह रायहाणिनिगमे य आगरे पल्ली । खेडे कब्बडदोणमुहपट्टणमडम्बसंवाहे ॥ १६ ॥
 आसमपए विहारे, सन्निवेसे समायघोसे य । थलिसेणाएन्धारे, सत्थे संवट्टकोट्टे य ॥ १७ ॥
 वाडेसु व रच्छासु व, घरेसु वा एवमित्थियं खेत्तं । कप्पई उ एवमाई, एवं खेत्तेण ऊ भवे ॥ १८ ॥
 पेडा य अट्ठपेडा, गोमुत्तिपयंगवीहिया चेव । सम्बुक्कावट्टाययगन्तुं पच्चागया छट्ठा ॥ १९ ॥
 दिवसस्स पोरुसीणं, चउण्हंपि उ जत्तिओ भवे कालो । एवं चरमाणो खलु, कालोमाणं मुणेयव्वं ॥ २० ॥
 अहवा तइयाए पोरिसीए ऊणाइ घासमेसन्तो । चउभागूणाए वा, एव कालेण ऊ भवे ॥ २१ ॥
 इत्थी वा पुरिसो वा, अलंकिओ वानलंकिओ वावि । अन्नयरवयत्थो वा, अन्नयरं व वत्थेणं ॥ २२ ॥
 अन्नेण विसेसेणं, वण्णेणं भावमणुमुयन्ते उ । एवं चरमाणो खलु, भावोमाणं मुणेयव्वं ॥ २३ ॥
 दवे खेत्ते काले, भावम्मि य आहिया उ जे भावा । एएहि ओमचरओ, पज्जवचरओ भवे भिक्खु ॥ २४ ॥
 अट्ठविहगोयरगं तु, तहा सत्तेव एसणा । अभिग्गहा य जे अन्ने, भिक्खायरियमाहिया ॥ २५ ॥
 खीरदहिसप्पिमाई, पणीयं पाणभोयणं । परिवज्जणं रसाणं तु, भणियं रसविवज्जणं ॥ २६ ॥
 ठाणा वीरासणाईया, जीवस्स उ सुहावहा । उग्गा जहा धरिज्जन्ति, कायकिलेसं तमाहियं ॥ २७ ॥
 एगन्तमणावाए, इत्थीपसुविवज्जिए । सयणासणसेवणया, विवित्तसयणासणं ॥ २८ ॥
 एसो बाहिरगतवो, समासेण वियाहिओ । अब्भिन्तरं तवं एत्तो, वुच्छामि अणुपुव्वसो ॥ २९ ॥
 पायच्छित्तं विणओ, वेयावच्चं तदेव सज्झाओ । ज्ञाणं च विउसग्गो, एसो अब्भिन्तरो तवो ॥ ३० ॥

आलोयणारिहाईयं, पायच्छित्तं तु दसविहं । जं भिक्खू वहई सम्मं, पायच्छित्तं तमाहियं ॥ ३१ ॥
 अम्भुट्ठाणं अंजलिकरणं, तहेवासणदायणं । गुरुभत्तिभावसुस्ससा, विणओ एस वियाहिओ ॥ ३२ ॥
 आयरियमाईए, वेयावच्चम्मि दसविहे । आसेवणं जहागामं, वेयावच्चं तमाहियं ॥ ३३ ॥
 वायणा पुच्छणा चेव, तहेव परियट्ठणा । अणुप्पेहा धम्मकहा, अज्झाओ पञ्चहा भवे ॥ ३४ ॥
 अट्ठरूढाणि वज्जित्ता, ज्ञाएज्जा सुसमाहिए । धम्मसुक्काइं ज्ञाणाइं, ज्ञाणं तं तु बुद्धावए ॥ ३५ ॥
 सयणासणठाणे वा, जे उ भिक्खू न वावरे । कायस्स विउस्सगो, छट्ठो सो परिकित्तिओ ॥ ३६ ॥
 एवं तवं तु दुविहं, जे सम्मं आयरे मुणी । सो खिप्पं सबसंसारा, विप्पमुच्चइ पण्डिओ ॥ ३७ ॥

त्ति वेमि ॥ इअ तवमग्गं समत्तं ॥ ३० ॥

॥ अह चरणविही एगतीसइमं अज्झयणं ॥

चरणविहिं पवक्खामि, जीवस्स उ सुहावहं । जं चरित्ता बहू जीवा, तिण्णा संसारसागरं ॥ १ ॥
 एगओ विरइं कुज्जा, एगओ य पवत्तणं । असंजमे नियत्तिं च, संजमे य पवत्तणं ॥ २ ॥
 रागदोसे य दो पावे, पावकम्मपवत्तणे । जे भिक्खू रंभई निच्चं, से न अच्छइ मण्डले ॥ ३ ॥
 दण्डणं गारवाणं च, सल्लानं च तियं तियं । जे भिक्खू जयई निच्चं, से न अच्छइ मण्डले ॥ ४ ॥
 दिव्वे य जे उवसग्गे, तहा तेरिच्छमाणुसे । जे भिक्खू सहई जयई, से न अच्छइ मण्डले ॥ ५ ॥
 विगहाकसायसन्नाणं, ज्ञाणाणं च दुयं तहा । जे वज्जई निच्चं, से न अच्छइ मण्डले ॥ ६ ॥
 वएसु इन्दियत्थेसु, समिईसु किरियासु य । जे भिक्खू जयई निच्चं, से न अच्छइ मण्डले ॥ ७ ॥
 लेसासु छसु काएसु, छके आहारकारणे । जे भिक्खू जयई निच्चं, से न अच्छइ मण्डले ॥ ८ ॥
 पिण्डोग्गहपडिमासु, भयट्ठाणेषु सत्तसु । जे भिक्खू जयई निच्चं, से न अच्छइ मण्डले ॥ ९ ॥
 मदेसु बम्भगुत्तीसु, भिक्खुधम्मम्मि दसविहे । जे भिक्खू जयई निच्चं, से न अच्छइ मण्डले ॥ १० ॥
 उवासगाणं पडिमासु, भिक्खूणं पडिमासु य । जे भिक्खू जयई निच्चं, से न अच्छइ मण्डले ॥ ११ ॥
 किरियासु भूयगामेसु, परमाहम्मिएसु य । जे भिक्खू जयई निच्चं, से न अच्छइ मण्डले ॥ १२ ॥
 गाहासोलसएहिं, तहा असंजम्मि य । जे भिक्खू जयई निच्चं, से न अच्छइ मण्डले ॥ १३ ॥
 बम्भम्मि नायज्झणेषु, ठाणेषु य समाहिए । जे भिक्खू जयई निच्चं, से न अच्छइ मण्डले ॥ १४ ॥
 एगवीसाए सबले, बावीसाए परीसहे । जे भिक्खू जयई निच्चं, से न अच्छइ मण्डले ॥ १५ ॥
 तेवीसइ स्रयगडे, रुवाहिएसु सुरेसु अ । जे भिक्खू जयई निच्चं, से न अच्छइ मण्डले ॥ १६ ॥
 पणुवीसभावणासु, उदेसेसु दसाइणं । जे भिक्खू जयई निच्चं, से न अच्छइ मण्डले ॥ १७ ॥
 मणगारगुणेहिं च, पगप्पम्मि तहेव य । जे भिक्खू जयई निच्चं, से न अच्छइ मण्डले ॥ १८ ॥
 पायसुयपसंगेसु, मोहठाणेषु चेव य । जे भिक्खू जयई निच्चं, से न अच्छइ मण्डले ॥ १९ ॥
 सिद्धाइगुणजोगेसु, तेत्तीसासायणासु य । जे भिक्खू जयई निच्चं, से न अच्छइ मण्डले ॥ २० ॥
 इय एसु ठाणेषु, जे भिक्खू जयई सया । खिप्पं सो सबसंसारा, विप्पमुच्चइ पण्डियो ॥ २१ ॥

त्ति वेमि ॥ इअ चरणविही समत्ता ॥ ३१ ॥

॥ अह पमायट्टाणं वतीसइमं अज्झयणं ॥

अच्चन्तकालस्म समूलगस्स सबस्स दुक्खस्स उजो पमोक्खो ।
 तं भासओ मे पडिपुण्णचित्ता, सुणेह एगन्तहियं हियत्थं ॥ १ ॥
 नाणस्स सबस्स पगासणाए, अन्नाणमोहस्स विवज्जणाए ।
 रागस्स दोसस्स य संखएणं, एगन्तसोक्खं समुवेइ मोक्खं ॥ २ ॥
 तस्सेस मग्गो गुरुविद्धसेवा, विवज्जणा बालजणस्स दूरा ।
 सज्झायएगन्तनिसेवणा य, सुत्तत्थसंचिन्तणया धिई य ॥ ३ ॥
 आहारमिच्छे मियमेसणिज्जं, सहायमिच्छे निउणत्थबुद्धि ।
 निकेयमिच्छेज्ज विवेगजोग्गं, समाहिकामे समणे तवस्सी ॥ ४ ॥
 न य लभेज्जा निउणं सहयं, गुणाहियं वा गुणओ समं वा ।
 एक्को वि पवाइ विवज्जयन्ततो, विहरेज्ज कामेसु असज्जमाणो ॥ ५ ॥
 जहा य अएडप्पभवा बलागा, अण्डं बालागप्पभवं जहा य ।
 एमेव मोहाययणं खु तण्हा, पोहं च तण्हाययणं वयन्ति ॥ ६ ॥
 रागो य दोसो विय कम्मवीयं, कम्मं च मोहप्पभवं वयन्ति ।
 कम्मं च जाइमरणस्स मलं, दुक्खं च जाइमरणं वयन्ति ॥ ७ ॥
 दुक्खं हयं जस्स न होइ मोहो, मोहो हओ जस्स न होइ तण्हा ।
 तण्हा हया जस्स न होइ लोहो, लोहो हओ जस्स न किंचणाइ ॥ ८ ॥
 रागं च दोसं च तदेव मोहं, उद्धत्तु कामेण समूलजालं ।
 जे जे उवाया पडिवज्जियद्वा, ते कित्तइस्सामि अहाणुपुद्धिं ॥ ९ ॥
 रसा पगामं न निसेवियद्वा, पायं रसा दित्तिकस नराणं ।
 दित्तं च कामा समभिद्ववन्ति, दुमं जहा साउफलं व पक्खो ॥ १० ॥
 जहा दवग्गी पउरिन्धणे वणे, समारुओ नोवसमं उवेइ ।
 एविन्दियग्गी वि पगामभोइणो, न बम्भयारिस्स हियायि कस्सई ॥ ११ ॥
 विवित्तसेज्जासणजन्तियाणं, ओमासणाणं दमिइन्दिवाणं ।
 न रागसत्तू धरिसेइ चित्तं, पराओ वाहिरिवोसहेहि ॥ १२ ॥
 जहा विरालावसहस्स मूले, न मूसगाणं वसही पसत्था ।
 एमेव इत्थीनिलयस्स मज्जे, न बम्भयारिस्स स्वमो निवासो ॥ १३ ॥
 न रूवलावण्णविलासहासं, न जंपियंइंगियपेहियं वा ।
 इत्थीण चित्तंसि निवेसइत्ता, दट्ठे ववस्से समणे तवस्सी ॥ १४ ॥
 अदंसणं चेव अपत्थणं च, अचिन्तणं चेव अकित्तणं च ।
 इत्थीजणस्सारियज्झाणजुग्गं, हियं सया बम्भवए रयाणं ॥ १५ ॥

कामं तु देवीहि विभूसियाहिं, न चाइया खोभइउं तिगुत्ता ।
 तहा वि एगन्तहियं ति नच्चा, विवित्तचासो मुणिणं पसत्थो ॥ १६ ॥
 मोवखाभिकंखिस्स उ माणवस्स, संसारभीरुस्स ठियस्स धम्मो ।
 नेयारिसं दुत्तरमत्थि लोए, जहित्थिओ बालमणोहराओ ॥ १७ ॥
 एए य संगे समइकमित्ता, सुदुत्तरा चेव भवन्ति सेसा ।
 जहा महासागरमुत्तरित्ता, नई भवे अवि गङ्गासमाणा ॥ १८ ॥
 कामाणुगिद्विप्पभवं खु दुक्खं, सव्वस्स लोगस्स सदेवगस्स ।
 जे काइयं माणसियं च किंचि, तस्सन्तगं गच्छइ वीयरगो ॥ १९ ॥
 जहा य किम्पागफला मणोरमा, रसेण वण्णेण य भुज्जमाणा ।
 ते खुड्डए जीविय पच्चमाणा, एओवमा कामगुणा विवागे ॥ २० ॥
 जे इन्दियाणं विसया मणुन्ना, न तेसु भावं निसिरे कयाइ ।
 न यामणुत्तेसु मणं पि कुज्जा, समाहिकामे समणे तवस्सी ॥ २१ ॥
 चक्खुस्स चक्खुं गहणं वयन्ति, तं रागहेउं तु मणुन्नमाहु ।
 तं दोसहेउं अमणुन्नमाहु, समो य जो तेसु स वीयरगो ॥ २२ ॥
 रुवस्स चक्खु गहणं वयन्ति, चक्खुस्स रुवं गहणं वयन्ति ।
 रागस्स हेउं समणुन्नमाहु, दोसस्स हेउं अमणुन्नमाहु ॥ २३ ॥
 रुवेसु जो गेहिमुवेइ तिद्वं, अकालियं पावइ से विणासं ।
 रागाउरे से जह वा पयंगे, आलोयलोले समुवेइ मच्चुं ॥ २४ ॥
 जे यावि दोसं समुवेइ तिद्वं, तंसिक्खणे से उ उवेइ दुक्खं ।
 दुहन्तदोसेण सएण जन्तू, न किञ्चि रुवं अवरउज्झई से ॥ २५ ॥
 एगन्तरत्ते रुहरंसि रुवे, अतालसे से कुणई पओसं ।
 दुक्खस्स सम्पीलमुवेइ बाले, न लिप्पई तेण मुणी विरागा ॥ २६ ॥
 रुवाणुगासाणुगए य जीवे, चराचरे हिंसइ तेणरुवे ।
 चित्तेहि ते परितावेइ बाले, पीलेइ अत्तट्ठगुरू किलिङ्गे ॥ २७ ॥
 रुवाणुवाएण परिग्गहेण, उप्पायणे रक्खणसन्निओगे ।
 वए विओगे य कहं सुहं से, वए सम्भोगकाले य अतित्तलामे ॥ २८ ॥
 रुवे अतित्ते य परिग्गहम्मि, सत्तोवसत्तो न उवेइ तुट्ठि ।
 अतुट्ठिदोसेण दुही परस्स, लोभाविले आययई अदत्तं ॥ २९ ॥
 तण्हाभिभूयस्स अदत्तहारिणो, रुवे अतितस्स परिग्गहे य ।
 मायामुसं वड्डइ लोभदोसा, तत्थावि दुक्खा विमुच्चई से ॥ ३० ॥
 मोसस्स पच्छा य पुरत्थओ य, पयोगकाले य दुही दुरन्ते ।
 एवं अदत्ताणि समाययन्तो, रुवे अतित्तो दुहिओ अणिस्सो ॥ ३१ ॥
 रुवाणुरत्तस्स नरस्स एवं, कत्तो सुहं होज कयाइ किञ्चि ।

तत्थोवभोगे वि किलेसदुक्खं, निवत्तई जस्स कएण दुक्खं ॥ ३२ ॥
 एमेव रूवम्मि गओ पओसं, उवेइ दुक्खोहपरंपराओ ।
 पदुट्ठचित्तो य चिणाइ कम्मं, जं से पुणो होइ दुहं विवागे ॥ ३३ ॥
 रूवे विरत्तो मणुओ विसोगो, एएण दुक्खोहपरंपरेण ।
 न लिप्पए भवमज्जे वि सन्तो, जलेण वा पोक्खरिणीपलासं ॥ ३४ ॥
 सोयस्स सद्दं गहणं वयन्ति, तं रागहेउं तु मणुन्नमाहु ।
 तं दोसहेउं अमणुन्नमाहु, समो य जो तेसु स वीयरगो ॥ ३५ ॥
 सद्दस्स सोयं गहणं वयन्ति, सोयस्स सद्दं गहणं वयन्ति ।
 रागस्स हेउं समणुन्नमाहु, दोसस्स हेउं अमणुन्नमाहु ॥ ३६ ॥
 सद्देसु जो गेहिमुवेइ तिब्बं, अकालियं पावइ से विणासं ।
 रागाउरे हरिणमिगे व मुट्ठे सद्दे अतित्ते समुवेइ मच्चुं ॥ ३७ ॥
 जे यावि दोसं समुवेइ तिब्बं, तंसि क्खणे से उ उवेइ दुक्खं ।
 दुदन्तदोसेण सएण जन्तू, न किञ्चि सद्दं अवरुज्झई से ॥ ३८ ॥
 एगन्तरत्ते रुइरंसि सद्दे, अतालसे से कुणई पओसं ।
 दुक्खस्स सम्पीलमुवेइ बाले, न लिप्पई तेण मुणी विरागो ॥ ३९ ॥
 सद्दाणुगासाणुगए य जीवे, चराचरे हिंसइऽपेगरूवे ।
 चित्तेहि ते परितावेइ बाले, पीलेइ अतट्ठगुरू किलिद्धे ॥ ४० ॥
 सद्दाणुवाएण परिग्गहेण, उप्पायणे रक्खगसन्निओगे ।
 वए विओगे य कहं सुहं से, संभोगकाले य अतित्तलामे ॥ ४१ ॥
 सद्दे अतित्ते य परिग्गहम्मि, सत्तोवसत्तो न उवेइ तुट्ठिं ।
 अतुट्ठिदोसेण दुही परस्स, लोभाविळे आययई अदत्तं ॥ ४२ ॥
 तण्हाभिभूयस्स अदत्तहारिणो, सद्दे अतित्तस्स परिग्गहे य ।
 मायागुसं बद्धइ लोभदोसा, तत्थावि दुक्खा न विमुच्चई से ॥ ४३ ॥
 मोसस्स पच्छा य पुरत्थओ य, पओगकाले य दुही दुरन्ते ।
 एवं अदत्ताणि समाययन्तो, सद्दे अतितो दुहिओ अणिस्सो ॥ ४४ ॥
 सद्दाणुरत्तस्स नरस्स एवं, कत्तो सुहं होज्ज कयाइ किञ्चि ।
 तत्थोवभोगे वि किलेसदुक्खं, निवत्तई जस्स कएण दुक्खं ॥ ४५ ॥
 एमेव सद्दम्मि गओ पओसं, उवेइ दुक्खोहपरंपराओ ।
 पदुट्ठचित्तो य चिणाइ कम्मं, जं से पुणो होइ दुहं विवागे ॥ ४६ ॥
 सद्दे विरत्तो मणुओ विसोगो, एएण दुक्खोहपरंपरेण ।
 न लिप्पए भवमज्जे वि सन्तो, जलेण वा पोक्खरिणीपलासं ॥ ४७ ॥
 धाणस्स गन्धं गहणं वयन्ति, तं राअहेउं तु मणुन्नमाहु ।
 तं दोसहेउं अमणुन्नमाहु, समो य जो तेसु स वीयरगो ॥ ४८ ॥

गन्धस्स घाणं गहणं वयन्ति, घाणस्स गन्धं गहणं वयन्ति ।
 रागस्स हेउं समणुन्नमाहु, दोसस्स हेउं अमणुन्नमाहु ॥ ४९ ॥
 गन्धेसु जो गेहिमुवेइ तिब्बं, अकालियं पावइ से विणासं ।
 रागाउरे ओसहगन्धगिद्धे, सप्पे बिलाओ विव निक्खमंते ॥ ५० ॥
 जे यावि दोसं समुवेइ तिब्बं, तंसिक्खणे से उ उवेइ दुक्खं ।
 दुहन्तदोसेण सएण जन्तू, न किंचि गन्धं अवरुज्झई से ॥ ५१ ॥
 एगन्तरत्ते रुइरंसि गन्धे, अतालसे से कुणई पओसं ।
 दुक्खस्स संपीलमुवेइ बाले, न लिप्पई तेण मुणी विरागो ॥ ५२ ॥
 गन्धाणुगासाणुगए य जीवे, चराचरे हिंसइऽणेगरूवे ।
 चित्तेहि ते परितावेइ बाले, पीलेइ अत्तद्वगुरु किलिद्धे ॥ ५३ ॥
 गन्धाणुवाएण परिग्गहेण, उप्पायणे रक्खणसन्निओगे ।
 वए विओगे य कहं सुहं से, संभोगकाळे य अतित्तामे ॥ ५४ ॥
 गन्धे अतिचे य परिग्गहम्मि, सत्तोवसत्तो न उवेइ तुट्ठिं ।
 अतुट्ठिदोसेण दुही परस्स, लोभाविले आययई अदत्तं ॥ ५५ ॥
 तण्हाभिभूयस्स अदत्तहारिणो, गन्धे अतित्तस्स परिग्गहे य ।
 मायामुसं वड्डइ लोभदोसा, तत्थावि दुक्खा न विमुच्चई से ॥ ५६ ॥
 मोसस्स पच्छाय पुरत्थओ य, पओगकाले य दुही दुरन्ते ।
 एवं अदत्ताणि समाययन्तो, गन्धे अतित्तो दुहिओ अणिस्सो ॥ ५७ ॥
 गन्धाणुरत्तस्स नरस्स एवं, कत्तो सुहं होज्ज कयाइ किंचि ।
 तत्थोवभोगे वि किलेसदुक्खं, निव्वतई जस्स कएण दुक्खं ॥ ५८ ॥
 एमेव गन्धम्मि गओ पओसं, उवेइ दुक्खोहपरंपराओ ।
 पदुट्ठचित्तो य चिणाइ कम्मं, जं से पुणो होइ दुहं विवागे ॥ ५९ ॥
 गन्धे विरत्तो मणुओ विसोगो, एएण दुक्खोहपरंपरेण ।
 न लिप्पई भवमज्झे वि सन्तो, जलेण वा पोक्खरिणीपलासं ॥ ६० ॥
 जिब्भाए रसं गहणं वयन्ति, तं रागहेउं तु मणुन्नमाहु ।
 तं दोसहेउं अमणुन्नमाहु, समो य जो तेसु स वीयरगो ॥ ६१ ॥
 रसस्स जिब्भं गहणं वयन्ति, जिब्भाए रसं गहणं वयन्ति ।
 रागस्स हेउं समणुन्नमाहु, दोसस्स हेउं अमणुन्नमाहु ॥ ६२ ॥
 रसेसु जो गेहिमुवेइ तिब्बं, अकालियं पावइ से विणासं ।
 रागाउरे वड्डिसविभिन्नकाए, मच्छे जहा आमिसभोगसिद्धे ॥ ६३ ॥
 जे यावि दोसं समुवेइ तिब्बं, तंसिक्खणे से उ उवेइ दुक्खं ।
 दुहन्तदोसेण सएण जन्तू, न किंचि रसं अवरुज्झई से ॥ ६४ ॥
 एगन्तरत्ते रुइरंसि रसे, अतालसे से कुणई पओसं ।

दुक्खस्स संपीलमुवेइ बाले, न लिप्पई तेण मुणी विरागो ॥ ६५ ॥
 रसाणुगासाणुगए य जीवे, चराचरेहिंसइऽणेगरूवे ।
 चित्तेहि ते परितावेइ बाले, पीलेइ अत्तडुगुरू किलट्टे ॥ ६६ ॥
 रसाणुवाएण परिग्गहेण, उप्पायणे रक्खणसन्निओगे ।
 वए विओगे य कहं सुहं से, संभोगकाले य अतित्तलामे ॥ ६७ ॥
 रसे अतित्ते य परिग्गहम्मि, सत्तोवसत्तो न उवेइ तुट्ठि ।
 अतुट्ठिदोसेण दुही परस्स, लोभाविले आययई अदत्तं ॥ ६८ ॥
 तण्हाभिभूयस्स अदत्तहारिणो, रसे अदत्तस्स परिग्गहे य ।
 मायामुसं बड्डइ लोभदोसा, तत्थावि दुक्खा न विमुच्चई से ॥ ६९ ॥
 मोसस्स पञ्चा य पुरत्थओ य, पओगकाले य दुही दुरन्ते ।
 एवं अदत्ताणि समाययन्तो, रसे अतित्तो दुहिओ अणिस्सो ॥ ७० ॥
 रसाणुरत्तस्स नरस्स एवं, कत्तो सुहं होज्ज कयाइ किंचि ।
 तत्थोवभोगे वि किलेसदुक्खं, निव्वतई जस्स कएण दुक्खं ॥ ७१ ॥
 एमेव रसम्मि गओ पओसं, उवेइ दुक्खोहपरंपराओ ।
 पदुट्ठचित्तो य चिणाइ कम्मं, जं से पुणो होइ दुहं विवागे ॥ ७२ ॥
 रसे विरत्तो मणुओ विसोगो, एएण दुक्खोहपरंपरेण ।
 न लिप्पई भवमज्जे वि सन्तो, जलेण वा पोक्खरिणीपलासं ॥ ७३ ॥
 कायस्स फासं गहणं वयन्ति, तं रागहेउं तु मणुन्नमाहु ।
 तं दोसहेउं अमणुन्नमाहु, समो य जो तेसु स वीयरगो ॥ ७४ ॥
 फासस्स कायं गहणं वयन्ति, कायस्स फासं गहणं वयन्ति ।
 गगस्स हेउं समणुन्नमाहु दोसस्स हेउं अमणुन्नमाहु ॥ ७५ ॥
 फासेसु जो गेहिमुवेइ तिब्बं, अकालियं पावइ से विणासं ।
 रागाउरे सीयजलावसन्ने, गाहगहीए महिसे विवन्ने ॥ ७६ ॥
 जे यावि दोसं समुवेइ तिब्बं, तंसि क्खणे से उ उवेइ दुक्खं ।
 दुहन्तदोसेण सएण जन्तू, न किंचि फासं अवरुज्जई से ॥ ७७ ॥
 एगन्तरत्तं रुइरंसि फासे, आतालिसे से कुणई पओसं ।
 दुक्खस्स संपीलमुवेइ बाले, न लिप्पई तेण मुणी विरागो ॥ ७८ ॥
 फासाणुमासाणुगए य जीवे, चराचरे हिंसइऽणेगरूवे ।
 चित्तेहि ते परितावेइ बाले, पीलेइ अत्तडुगुरूकिलिट्ठे ॥ ७९ ॥
 फासाणुवाएण परिग्गहेण, उप्पायणे रक्खणसन्निओगे ।
 वए विओगे य कहं सुहं से, संभोगकाले य अतित्तलामे ॥ ८० ॥
 फासे अतित्ते य परिग्गहम्मि, सत्तोवसत्तो न उवेइ तुट्ठि ।
 अतुट्ठिदोसेण दुही परस्स, लोभाविले आययई अदत्तं ॥ ८१ ॥

तण्हाभिभूयस्स अदत्तहारिणो, फासे अतित्तस्स परिग्गहे य ।
 मायामुसं वड्ढइ लोभदोसा, तत्थावि दुक्खा न विमुच्चई से ॥ ८२ ॥
 मोसस्स पच्छा य पुरत्थओ य, पओगकाले य दुही दुरस्ते ।
 एवं अदत्ताणि समाययन्तो, फासे अतित्तो दुहिओ अणिस्सो ॥ ८३ ॥
 फासाणुरत्तस्स नरस्स एवं, कत्तो सुहं होज्ज कयाइ किंचि ।
 तत्थोवभोगे वि किलेसदुक्खं, निव्वतई जस्स कएण दुक्खं ॥ ८४ ॥
 एमेव फासम्मि गओ पओसं, उवेइ दुक्खोहपरंपराओ ।
 पदुट्ठचित्तो य चिणाइ कम्मं, जं से पुणो होइ दुहं विवागे ॥ ८५ ॥
 फासे विरत्तो मणुओ विसोगो, एएण दुक्खोहपरंपरेण ।
 न लिप्पई भवमज्जे वि सन्तो, जलेण वा पोक्खरिणीपलासं ॥ ८६ ॥
 मणस्स भावं गहणं वयन्ति, तं रागहेउं तु मणुन्नमाहु ।
 तं दोसहेउं अमणुन्नमाहु, समो य जो तेसु स वीयरगो ॥ ८७ ॥
 भावस्स मणं गहणं वयन्ति, मणस्स भावं गहणं वयन्ति ।
 रागस्स हेउं समणुन्नमाहु, दोसस्स हेउं अमणुन्नमाहु ॥ ८८ ॥
 भावेसु जो गेहिमुवेइ तिष्ठं, अकालियं पावइ से विणासं ।
 रागाउरे कामगुणेषु गिद्धे, करेणुमग्गावहिण गजे वा ॥ ८९ ॥
 जे यावि दोसं समुवेइ तिष्ठं, तंसिक्खणे से उ उवेइ दुक्खं ।
 दुहन्तदोसेण सएण जन्तू, न किंचि भावं अवरुज्झई से ॥ ९० ॥
 एगन्तरत्ते रुइरंसि भावे, अतालसे से कुणई पओसं ।
 दुक्खस्स संपीलमुवेइ बाले, न लिप्पई तेण मुणी विरागो ॥ ९१ ॥
 भावाणुगासाणुगए य जीवे, चराचरे हिंसइ ऽणेरूवे ।
 चित्तेहि ते परितावेइ बाले, पीलेइ अत्तट्ठयुरू किलिद्धे ॥ ९२ ॥
 भावाणुबाएण परिग्गहेण, उप्पायणे रक्खणसन्निओगे ।
 वए विओगे य कहं सुहं से, संभोगकाले य अतित्तलाभे ॥ ९३ ॥
 भावे अतित्ते य परिग्गहम्मि, सत्तोवसत्तो न उवेइ तुट्ठिं ।
 अतुट्ठिदोसेण दुही परस्स, लोभाविले आययई अदत्तं ॥ ९४ ॥
 तण्हाभिभूयस्स अदत्तहारिणो, भावे अतित्तस्स परिग्गहे य ।
 मायामुसं वड्ढइ लोभदोसा, तत्थावि दुक्खा न विमुच्चई से ॥ ९५ ॥
 मोसस्स पच्छा य पुरत्थओ य, पओगकाले य दुही दुरन्ते ।
 एवं अदत्ताणि समाययन्ती, भावे अतित्तो दुहिओ अणिस्सो ॥ ९६ ॥
 भावाणुरत्तस्स नरस्स एवं, कत्तो सुहं होज्ज कयाइ किंचि ।
 तत्थोवभोगे वि किलेसदुक्खं, निव्वतई जस्स कएण दुक्खं ॥ ९७ ॥
 एमेव भावम्मि गओ पओसं, उवेइ दुक्खोहपरंपराओ ।

पदुद्धचित्तो य चिणाइ कम्मं, जं से पुणो होइ दुहं विवागे ॥ ९८ ॥
 भावे विरत्तो मणुओ विसोगो, एएण दुक्खोहपरंपरेण ।
 न लिप्पई भवमज्जे वि सन्तो, जलेण वा पोक्खरिणी पलासं ॥ ९९ ॥
 एविन्दियत्था य मणस्स अत्था दुक्खस्स हेउं मणुयस्स रागिणो ।
 ते चेव थोवं पि कयाइ दुक्खं, न वीयरागस्स करेन्ति किंचि ॥ १०० ॥
 न कामभोगा ससयं उवेन्ति, न यावि भोगा विगइं उवेन्ति ।
 जे तप्पओसी य परिग्गही य, सो तेसु मोहा विगइं उवेइ ॥ १०१ ॥
 कोहं च माणं च तहेव मायं, लोहं दुगुच्छं अरइं रइं च ।
 हासं भयं सोगपुमित्थिवेयं, नपुंसवेयं विविहे य भावे ॥ १०२ ॥
 आवज्जई एवमणेगरूवे, एवंविहे कामगुणेषु सत्तो ।
 अन्ने य एयप्पभवे विसेसे, कारुण्णदीणे हिरिमे वइस्से ॥ १०३ ॥
 कप्पं न इच्छिज्ज सहायलिच्छ, पच्छाणुतावे न तवप्पभावं ।
 एवं वियारे अमियप्पयारे, आवज्जई इन्दियचोरवस्से ॥ १०४ ॥
 तओ से जायन्ति पओयणाइं, निमिज्जिउं मोहमहण्णवम्मि ।
 सुहेसिणो दुक्खविणोयणट्ठा, तप्पच्चयं उज्जमए य रागी ॥ १०५ ॥
 विरज्जमाणस्स य इन्दियत्था, सद्दाइया तावइयप्पगारा ।
 न तस्स सव्वे वि मणुन्नयं वा, निव्वत्तयन्ती अमणुन्नयं वा ॥ १०६ ॥
 एवं ससंकप्पविकप्पणासुं, संजायई समयमुवट्ठियस्स ।
 अत्थे असंकप्पयओ तओ से, पहीयए कामगुणेषु तण्हा ॥ १०७ ॥
 स वीयरागो कयसव्वकिच्चो, खवेइ नाणावरणं खणेणं ।
 तहेव जं दंसणमावरेइ, जं चन्तरायं पकरेइ कम्मं ॥ १०८ ॥
 सव्वं तओ जाणइ पासए य, अमोहणे होइ निरन्तराए ।
 अणासवे ज्ञाणसमाहिजुत्ते, आउक्खए मोक्खमुवेइ सुद्धे ॥ १०९ ॥
 सो तस्स सव्वस्स दुहस्स मुक्को, जं वाहई सययं जन्तुमेयं ।
 दीहामयं विप्पमुक्को पसत्थो, तो होइ अच्चन्तसुही कयत्थो ॥ ११० ॥
 अणाइकालप्पभवस्स एसो, सव्वस्स दुक्खस्स पमोक्खमग्गो ।
 वियाहिओ जं समुविच्च सत्ता, कमेण अच्चन्तसुही भवन्ति ॥ १११ ॥
 त्ति बेमि ॥ इअ पमायट्ठाणं समत्तं ॥ ३२ ॥

॥ अह कम्मप्पयडी तेत्तीसइमं अज्झयणं ॥

अट्ठं कम्माइं वोच्छामि, आणुपुविं जहाकमं । जेहिं बद्धो अयं जीवो, संसारे परिवट्ठई ॥ १ ॥
 नाणस्सावरणिज्जं, दंसणावरणं तहा । वेयणिज्जं तहा मोहं, आउकम्मं तहेव य ॥ २ ॥
 नामकम्मं च गोयं च, अन्तरायं तहेव य । एवमेयाइ कम्माइं, अट्ठेव उ समासओ ॥ ३ ॥
 नाणावरणं पञ्चविहं, सुयं आभिणिबोहियं । ओहिनाणं च तइयं, मणनाणं च केवलं ॥ ४ ॥
 निदा तहेव पयला, निदानिदा पयलपयला य । तत्तो यथीणगिद्धी उ, पंचमा होइ नायवा ॥ ५ ॥
 चक्खुमचक्खुओहिस्स, दंसणे केवले य आवरणे । एवं तु नवविगप्पं, नायवं दंसणावरणं ॥ ६ ॥
 वेयणीयंपि य दुविहं, सायममाहियं च अहियं । सायस्स उ बहू भेया, एमेव असायस्स वि ॥ ७ ॥
 मोहणिज्जंपि च दुविहं, दंसणे चरणे तहा । दंसणे तिविहं वुत्तं, चरणे दुविहं भवे ॥ ८ ॥
 सम्मत्तं चेव मिच्छत्तं, सम्मामिच्छत्तमेव य । एयाओ तिन्नि पयडीओ, मोहणिज्जस्स दंसणे ॥ ९ ॥
 चरित्तमोहणं कम्मं, दुविहं तं वियाहियं कसायमोहणिज्जं तु, नोकसायं तहेव य ॥ १० ॥
 सोलसविहभेएणं, कम्मं तु कसायजं । सत्तविहं नवविहं वा, कम्मं च नोकसायजं ॥ ११ ॥
 नेरइयतिरिक्खाउं, मणुस्साउं तहेव य । देवाउयं चउत्थं तु, आउं कम्मं चउव्विहं ॥ १२ ॥
 नामं कम्मं तु दुविहं, सुहमसुहं च आहियं । सुभस्स उ बहू भेया, एमेव असुहस्स वि ॥ १३ ॥
 गोयं कम्मं दुविहं, उच्चं नीयं च आहियं । उच्चं अट्ठविहं होइ, एवं नीवं पि आहियं ॥ १४ ॥
 दाणे लाभे य भोगे य, उवभोगे वीरिए तहा । पञ्चविहमन्तरायं, समासेण वियाहियं ॥ १५ ॥
 एयाओ मूलपयडीओ, उत्तराओ य आहिया । पएसग्गं खेत्तकाले य, भावं च उत्तरं सुण ॥ १६ ॥
 सब्बेसिं चेव कम्माणं, पएसग्गमणन्तगं । गणिठयसत्ताईयं, अन्तो सिद्धाण आहियं ॥ १७ ॥
 सब्बजीवाण कम्मं तु, संगहे छदिसागयं । सब्बेसु वि पएससेसु, सब्बं सव्वेण बद्धगं ॥ १८ ॥
 उदहीसरिसनामाण, तीसई कोडिकोडिओ । उकोसिय टिई होइ, अन्तोमुहुत्तं जहन्निया ॥ १९ ॥
 आवरणिज्जाण दुण्हंपि, वेयाणिज्जे तहेव य । अन्तराए य कम्मम्मि, टिई एसा वियाहिया ॥ २० ॥
 उदहोसरिसनामाण, सत्तरिं कोडिकोडीओ । मोहणिज्जस्स उकोसा, अन्तोमुहुत्तं जहन्निया ॥ २१ ॥
 तेत्तीस सागरोवमा, उकोसेण वियाहिया । टिई उ आउकम्मस्स, अन्तोमुहुत्तं जहन्निया ॥ २२ ॥
 उदहीसरिसनामाण, वीसई कोडिकोडीओ । नामगोत्ताणं उकोसा, अट्ठ मुहुत्ता जहन्निया ॥ २३ ॥
 सिद्धाणणन्तभागो य, अणुभागा हवन्ति उ । सब्बेसु वि पएसग्गं, सब्बजीवे अइच्छियं ॥ २४ ॥
 तम्हा एसि कम्माणं, अणुभागा वियाणिया । एसि संवरे चेव, खवणे य जए बूहो ॥ २५ ॥

त्ति वेमि ॥ इअ कम्मप्पयडी समत्ता ॥ ३३ ॥

॥ अह लेसज्झयणं चोत्तीसइमं अज्झयणं ॥

लेसज्झयणं पक्खामि, आणुपुविं जहकमं । छण्हंपि कम्म लेमाणं, अणुभावे सुहेण मे ॥ १ ॥
 नामां वण्णरसगन्धफासपरिणामलक्खणं । ठाणं ठिं गं चाउं, लेमाणं तु सुणेह मे ॥ २ ॥
 किण्हा नीला य काऊ य, तेऊ पम्हा तहेव य । सुकलेसा य छट्ठा य, नामां तु जहकमं ॥ ३ ॥
 जीसूयनिद्रसंकासा, गवलरिड्ढगसन्निभा । खंजणनयणनिभा, किण्हलेसा उ वण्णओ ॥ ४ ॥
 नीलासोगसंकासा, चासपिच्छसमप्पभा । वेरुलियनिद्रसंकासा, नीललेसा उ वण्णओ ॥ ५ ॥
 अयसोपुप्फसंकासा, कोइलच्छदमन्निभा । सुयतुण्डपईवनिभा, काउलेसा उ वण्णओ ॥ ६ ॥
 हिंगुलघाउसंकासा, तरुणाइच्चसन्निभा । सुयतुण्डपईवनिभा, तेऊलेसा उ वण्णओ ॥ ७ ॥
 हरियालभेयसंकासा, हलिदाभेयसमप्पभा । सणासणकुसुमनिभा पम्हलेसा उ वण्णओ ॥ ८ ॥
 संखंककुन्दसङ्कासा, खीरपूरसमप्पभा । रयणहारसंकासा, सुकलेसा उ वण्णओ ॥ ९ ॥

जह कडुयतुम्बगरसो, निम्बरसो कडुयरोहिणिरसो वा ।

एत्तो वि अणन्तगुणो, रसो य किण्हाए नायव्वो ॥ १० ॥

जह तिगडुयस्स य रसो, तिक्खो जह दत्थिपिप्पलीए वा ।

एत्तो वि अणन्तगुणो, रसो उ नीलेए नायव्वो ॥ ११ ॥

जह परिणअम्बगरसो, तुवरकविट्ठस्स वावि जारिसओ ।

एत्तो वि अणन्तगुणो, रसो उ काऊण नायव्वो ॥ १२ ॥

जह परिणयम्बगरसो, पक्कविट्ठस्स वावि जारिसओ ।

एत्तो वि अणन्तगुणो, रसो उ तेऊण नायव्वो ॥ १३ ॥

वरवारुणीए बारसो, विविहाण व आसवाण जारिसओ ।

मड्डमेरयस्स व रसो, एत्तो पम्हाए परएणं ॥ १४ ॥

खज्जमुदियरसो, खीररसो खंडसकरसो वा । एत्तो वि अणंतगुणो, रसो उ सुक्काए नायव्वो ॥ १५ ॥

जह गोमडस्स गंधो सुणगमडस्स व जहा अहिमडस्साएत्तो वि अणंतगुणो, लेमाणं जप्पमत्थाणं ॥ १६ ॥

जह मुरहिकुसुमगंधो, गंधवासाण पिस्समाणाणं । एत्तो वि अणंतगुणो, पसत्थलेमाण तिण्हं पि ॥ १७ ॥

जह करगयस्स फासो, गोजिम्भाए य सागपत्ताणं । एत्तो वि अणंतगुणो, लेमाणं अप्पहत्थाणं ॥ १८ ॥

जह बूरस्स व फासो, नवणीयस्स व सिरीसकुसुमाणं । एत्तो वि अणंतगुणो, पसत्थलेमाण तिण्हंपि ॥ १९ ॥

तिविहो व नवविहो वा, सत्तावीसइविहेकसीओ वा । दुसओ तेयालो वा, लेमाणं होइ परिणामो ॥ २० ॥

पंचामवप्पवत्तो, तीहिं अगुत्तो छसुं अविरओ य । तिक्खारंभपरिणओ, खुड्डो साहसिओ नरो ॥ २१ ॥

निद्धन्धसपरिणामो, निस्संसो अजिइन्दिओ । एयजोगसमाउत्तो, किण्हलेसं तु परिणमे ॥ २२ ॥

इस्सा अमरिस चतव्वो, अविज्जमाया अहीरिय । गेही पओसे य सढे, पमत्ते रसलोलुए ॥ २३ ॥

सायगवेसए य आरम्भाओ अविरओ, खुड्डो साहसिओ नरो । एयजोगसमाउत्तो, नीललेसं तु परिणमे ॥ २४ ॥

वंके वंकसमायारे, नियड्डिछे अणुज्जुए । पलिउंचगओवहिए, मिच्छदिट्ठी अणारिए ॥ २५ ॥

उप्फासगदुट्ठवाई य, तेणे यावि य मच्छरी । एयजोगसमाउत्तो, काऊलेसं तु परिणमे ॥ २६ ॥

नीयावत्ती अचबले, अमाई अकुऊहले । विणीयविणए दन्ते, जोगवं उवहाणवं ॥ २७ ॥
 पियधम्मे दढधम्मेऽवज्जभीरू हिएसए । एयजोगसमाउत्तो, तेउलेसं तु परिणमे ॥ २८ ॥
 पयणुकोहमाणे य, मायालोभे य पयणुए । पसन्तचित्ते दन्तप्पा, जोगवं उवहाणवं ॥ २९ ॥
 तहा पयणुवाई य, उवसन्ते जिइन्दिए । एयजोगसमाउत्तो, पम्हलेसं तु परिणमे ॥ ३० ॥
 अट्ठरुहाणि वज्जित्ता, धम्मसुक्काणि ज्ञायए । पसन्तचित्ते दन्तप्पा, समिए गुत्ते य गुत्तिसु ॥ ३१ ॥
 सरागे वीयरगे वा, उवसन्ते जिइन्दिए । एयजोगसमाउत्तो, सुकलेसं तु परिणमे ॥ ३२ ॥
 असंखिज्जाणोसप्पिणीण, उस्सप्पिणीण जे समया । संखाईया लोगा, लेसाण हवन्ति ठाणाइं ॥ ३३ ॥
 मुहुत्तद्धं तु जहन्ना, तेत्तीसा सागरा मुहुत्तहिया । उक्कोसा होइ ठिई, नायवा किण्हलेसाए ॥ ३४ ॥
 मुहुत्तद्धं तु जहन्ना, दस उदही पलियमसंखभागम्भहिया । उक्कोसा होइ ठिई, नायवा नीललेसाए ॥ ३५ ॥
 मुहुत्तद्धं तु जहन्ना, तिण्णुदही पलियमसंखभागम्भहिया । उक्कोसा होइ ठिई, नायवा काउलेसाए ॥ ३६ ॥
 मुहुत्तद्धं तु जहन्ना, दोण्णुदही पलियमसंखभागम्भहिया । उक्कोसा होइ ठिई, नायवा तेउलेसाए ॥ ३७ ॥
 मुहुत्तद्धं तु जहन्ना, दस होन्ति य सागरा मुहुत्तहिय । उक्कोसा होइ ठिई, नायवा पम्हलेसाए ॥ ३८ ॥
 मुहुत्तद्धं तु जहन्ना, तेत्तीसं सागरा मुहुत्तहिया । उक्कोसा होइ ठिई, नायवा सुकलेसाए ॥ ३९ ॥
 एसा खलु लेसाणं, ओहेण ठिई वणिण्या होइ । चउसु वि गईसु एत्तो, लेसाण ठिई तु वोच्छामि ॥ ४० ॥
 दस वाससहस्साइं, काऊए ठिई जहन्निया होइ । तिण्णुदही पलिओवम, असंखभागं च उक्कोसा ॥ ४१ ॥
 तिण्णुदही पलिओवमसंखभागो जहन्नेण नीलठिई । दस उदही पलिओवम असंखभागं च उक्कोसा ॥ ४२ ॥
 दस उदही पलिओवम असंखभागं जहन्निया होइ । तेत्तीससागरां उक्कोसा, होइ किण्हाए लेसाए ॥ ४३ ॥
 एसा नेरइयाणं, लेसाण ठिई उ वणिणा होइ । तेण परं वोच्छामि, तिरियमणुस्साण देवाणं ॥ ४४ ॥
 अन्तोमुहुत्तमद्धं, लेलाण जहिं जहिं जाउ । तिरियाण नराणं वा, वज्जित्ता केवलं लेसं ॥ ४५ ॥
 मुहुत्तद्धं तु जहन्ना उक्कोसा होइ पुव्वकोडीओ । नवहि वरिसेहि ऊणा, नायवा कसुलेसाए ॥ ४६ ॥

एसा तिरियनराणं, लेसाण ठिई उ वणिण्या होइ ।

तेण परं वोच्छामि, लेसाण ठिई उ देवाणं ॥ ४७ ॥

दस वाससहस्साइं, किण्हाए ठिई जहन्निया होइ ।

पलियमसंखिज्ज इमो, उक्कोसो होइ किण्हाए ॥ ४८ ॥

जा किण्हाए ठिई खलु, उक्कोसा सा उ समयमम्भहिया ।

जहन्नेणं नीलाए, पलियमसंखं च उक्कोसो ॥ ४९ ॥

जा नीसाए ठिई खलु, उक्कोसा सा उ समयमम्भहिया ।

जहन्नेणं काऊए, पलियमसंखं च उक्कोसा ॥ ५० ॥

तेण परं वोच्छामि, तेउलेसा जहा सुरगाणं । भवणवइवाणमन्तरजोइसवेमाणियाणं च ॥ ५१ ॥

पलिओवमं जहन्नं, उक्कोसा सागरा उ दुन्नंहिआ । पलियमसंखेज्जेणं, होइ भारेण तेऊए ॥ ५२ ॥

दस वाससहस्साइं, तेऊए ठिई जहन्निया होइ । दुन्नुदही पलिओवम असंखभागं च उक्कोसा ॥ ५३ ॥

जा तैऊण ठिई खलु, उक्कोसा सा उ समयमम्भहिया ।

जहन्नेणं पम्हाए, दस उ मुहुत्ताहियाइ उक्कोसा ॥ ५४ ॥

जा पम्हाए ठिई खलु, उक्कोसा सा उ समयमम्भहिया । जहन्नेण सुक्काए, तेत्तीस मुहुत्तमम्भहिया ॥ ५५ ॥
 किण्हा नीला काऊ, तिन्नि वि एयाओ अहंमलेसाओ । एयाहि तिहिवि जीवो, दुग्गइ उववज्जई ॥ ५६ ॥
 तेऊ पम्हा सुक्का, तिन्निवि एयाओ धम्मलेसाओ । एयाहि तिहिवि जीवो, सुग्गइ उववज्जई ॥ ५७ ॥
 लेसाहिं सव्वाहिं, पढमे समयमिं परिणयाहिं तु । न हु कस्सइ उववाओ, परे भवे अत्थि जीवस्स ॥ ५८ ॥
 लेसाहिं सव्वाहिं, चरिमे समयमिं परिणयाहिं तु । न हु कस्सइ उववाओ, परे भवे होइ जीवस्स ॥ ५९ ॥
 अन्तमुहुत्तम्मि गए अन्तमुहुत्तम्मि सेसए चेव । लेसाहि परिणयाहिं, जीवा गच्छन्ति परलोयं ॥ ६० ॥
 तम्हा एयासि लेसाणं, आणुभावे वियाणिया । अप्पसत्थाओ वज्जित्ता, पसत्थाओऽहिट्ठिए मुणि ॥ ६१ ॥

त्ति बेमि ॥ इअ लेसज्झयणं समत्तं ॥ ३४ ॥

॥ अह अणगारज्झयणं णाम पंचत्तीसइमं अज्झयणं ॥

सुहेण मे एगग्गमणा, मग्गं बुद्धेहि देसियं । जमायरन्तो भिक्खू, दुक्खाणन्त करे भवे ॥ १ ॥
 गिहवासं परिच्चज्ज, पवज्जामस्सिए मुणी । इमे संगे वियाणिज्ज, जेहिं सज्जन्ति माणवा ॥ २ ॥
 तहेव हिंसं अलियं, चोज्जं अबम्भसेवणं । इच्छाकामं च लोभं च, सज्जओ परिवज्जए ॥ ३ ॥
 मणोहरं चित्तधरं, मल्लधूवेण वासियं । सकवाडं पण्डुरुल्लोचं, मणसावि न पत्थए ॥ ४ ॥
 इन्दियाणि उ भिक्खुस्स, तारिसम्मि उवस्सए । दुक्कराई निवारेउं, कामरागविवट्ठणे ॥ ५ ॥
 सुसाणे सुन्नगारे वा, रुक्खमूले व इक्कओ । पइरिक्के परकडे वा, वासं तत्थाभिरोयए ॥ ६ ॥
 फासुयम्मि अणावाहे, इत्थीहिं अणभिद्दुए । तत्थ संकप्पए वासं, भिक्खू परमसंजए ॥ ७ ॥
 न सयं गिहाइं कुब्बिज्जा, णेव अन्नेहिं कारण । गिहकम्मसमारम्भे, भूयाणं दिस्सए वहो ॥ ८ ॥
 तसाणं थावराणं च, सुहुमाणं बादराण य । तम्हा गिहसमारम्भं, संजओ परिवज्जए ॥ ९ ॥
 तहेव भत्तपाणेसु, पयणे पयावणेसु य । पाणभूयदयट्ठाए, न पए न पयावए ॥ १० ॥
 जलधन्ननिसिसया जीवा, पुढवीकट्टनिसिसया । हमन्ति भत्तपाणेसु, तम्हा भिक्खू न पयावए ॥ ११ ॥
 विसप्पे सव्वओ धारे, बहुपाणिविणामणे । नत्थि जोइसमे सत्थे, तम्हा जोइं न दीवए ॥ १२ ॥
 हिरण्णं जायरूवं च, मणसा वि न पत्थए । समलेट्ठुकंचणे भिक्खू, विरए कयविकए ॥ १३ ॥
 किणन्तो कइओ होइ, विक्किणन्तो य वाणिणो । कयविकयम्मि वट्टन्तो, भिक्खू न भवइ तारिसो ॥ १४ ॥
 भिक्खिवय्वं न केयव्वं, भिक्खुणा भिक्खवत्तिणा । कयविकओ महादोसो, भिक्खवत्ती सुहावहा ॥ १५ ॥
 समुयाणं उंउमेसिज्जा, जहामुत्तमणिन्दियं । लाभालाभम्मि संतुट्ठे, पिण्डवायं चरे मुणी ॥ १६ ॥
 अलोले न रसे गिद्धे, जिम्भादन्ते अमुच्छिए । न रसट्ठाए भुंजिज्जा, जवणट्ठाए महामुणी ॥ १७ ॥
 अच्चणं रयणं चेव, वन्दणं पूयणं तहा । इड्डीसकारसम्माणं, मणसा वि न पत्थए ॥ १८ ॥
 सुक्कज्झाणं झियाएज्जा, अणियाणे अकिंचणे । वोसट्ठकाए विहरेज्जा, जाव कालस्स पज्जओ ॥ १९ ॥
 निज्जहिऊण आहारं, कालधम्मो उवट्ठिए । जहिऊण माणुसं बोन्दि, पहू दुक्खे विमुच्चई ॥ २० ॥
 निम्ममे निरहंकारे, वीयरानो अणासवो । संपत्तो केवलं नाणं, सासयं परिणिव्वुए ॥ २१ ॥

त्ति बेमि ॥ इअ अणगारज्झयणं समत्तं ॥ ३५ ॥

॥ अह जीवाजीवविभत्ती णाम छत्तीसइमं अज्झयणं ॥

जीवाजीवविभत्तिं, सुणेद मे एगमणा इओ । जं जाणिऊण भिक्खु, सम्मं जयइ संजमे ॥ १ ॥
 जीवा चेव अजीवा य, एस लोए वियाहिए । अजीवदेसमागासे, अलोणे से वियाहिए ॥ २ ॥
 दव्वओ खेत्तओ चेव, कालओ भावओ तहा । परूवणा तेसि भवे, जीवाणमजीवाण य ॥ ३ ॥
 रूविणो चेवरूवी य, अजीवा दुविहा भवे । अरूवी दसहा वुत्ता, रूविणो य चउव्विहा ॥ ४ ॥
 धम्मत्थिकाए तद्देसे, तप्पएसे य आहिए । अहम्मे तस्स देसे य तप्पएसे य आहिए ॥ ५ ॥
 आगासे तस्स देसे य, तप्पएसे य आहिए । अद्वासमए चेव, अरूवी दसहा भवे ॥ ६ ॥
 धम्माधम्मे य दो चेव, लोगमित्ता वियाहिया । लोगालोणे य आगासे, समए समयखेत्तिए ॥ ७ ॥
 धम्माधम्मागासा, तिन्निवि एए अणाइया । अपज्जवसिया चेव, सव्वद्धं तु वियाहिया ॥ ८ ॥
 समएवि सन्तइं पप्प, एवमेव वियाहिए । आएसं पप्प साईए, सप्पज्जवसिएवि य ॥ ९ ॥
 खन्धा य खन्धदेसा य, तप्पएसा तद्देव य । परमाणुणो य बोधवा, रूविणो य चउव्विहा ॥ १० ॥
 एगत्तेण पुद्गत्तेण, खन्धा य परमाणुणो । लोएगदेसे लोए य, भइयवा ते उ खेत्तओ ॥ ११ ॥
 इत्तो कालविभागं तु, तेसिं वुच्छं चउव्विहं ॥ १२ ॥

संतइं पप्प तेऽणार्ह, अप्पज्जवसियावि य । ठिइं पडुच्च साईया, सपज्जवसिया वि य ॥ १३ ॥
 असंखकालमुक्कोसं, एक्को समओ जहन्नयं । अजीवाण य रूवीण, ठिई एमा वियाहिया ॥ १४ ॥
 अणन्तकालमुक्कोसमेक्को, समओ जहन्नयं । अजीवाण य रूवीण, अन्तरेयं वियाहियं ॥ १५ ॥
 वण्णओ गन्धओ चेव, रसओ फासओ तहा । संठाणओ य विन्नेओ, परिणामो तेसि पंचहा ॥ १६ ॥
 वण्णओ परिणया जे उ, पञ्चहा ते पकित्तिया । किण्हा नीलाय लोहिया, ढलिहा सुक्किला तहा ॥ १७ ॥
 गन्धओ परिणया जे उ, दुविहा ते वियाहिया । सुब्भिगन्धपरिणामा, दुब्भिगन्धा तद्देव य ॥ १८ ॥
 रसओ परिणया जे उ, पञ्चहा ते पकित्तिया । तित्थकडुयकसाया, अम्बिला महुरा तहा ॥ १९ ॥
 फासओ परिणया जे उ, अट्ठहा ते पकित्तिया । कक्खडा मउआ चेव, गरुया लहुवा तहा ॥ २० ॥
 सोया उण्हा य निद्धा य, तहा लुक्खा य आहिया । इय फासपरिणया एए, पुग्गला समुदाहिया ॥ २१ ॥
 संठाणओ परिणया जे उ, पञ्चहा ते पकित्तिया । परिमएडला य वट्ठा य, तंसा चउरंसमायया ॥ २२ ॥
 वण्णओ जे भवे किण्हे, भइए से उ गन्धओ । रसओ फासओ चेव, भइए संठाणओवि य ॥ २३ ॥
 वण्णओ जे भवे नीले, भइए से उ गन्धओ । रसओ फासओ चेव, भइए संठाणओवि य ॥ २४ ॥
 वण्णओ लोहिए जे उ, भइए से उ गन्धओ । रसओ फासओ चेव, भइए संठाणओवि य ॥ २५ ॥
 वण्णओ पीयए जे उ, भइए से उ गन्धओ । रसओ फासओ चेव, भइए संठाणओवि य ॥ २६ ॥
 वण्णओ सुक्किले जे उ, भइए से उ अन्धओ । रसओ फासओ चेव, भइए संठाणओवि य ॥ २७ ॥
 गन्धओ जे भवे सुब्भी, भइए से उ वण्णओ । रसओ फासओ चेव, भइए संठाणओवि य ॥ २८ ॥
 गन्धओ जे भवे दुब्भी, भइए से उ वण्णओ । रसओ फासओ चेव, भइए संठाणओवि य ॥ २९ ॥
 रसओ तित्थए जे उ, भइए से उ वण्णओ । गन्धओ रसओ चेव, भइए संठाणओवि य ॥ ३० ॥

रसओ कडुए जे उ, भइए से उ वण्णओ । गन्धओ फासओ चेव, भइए संठाणओवि य ॥ ३१ ॥
 रसओ कसाए जे उ, भइए से उ वण्णओ । गंधओ फासओ चेव, भइए संठाणओवि य ॥ ३२ ॥
 रसओ अम्बिछे जे उ, भइए से उ वण्णओ । गन्धओ फासओ चेव, भइए संठाणओवि य ॥ ३३ ॥
 रसओ महुरए जे उ, भइए से उ वण्णओ । गन्धओ फासओ चेव, भइए संठाणओवि य ॥ ३४ ॥
 फासओ कक्खडे जे उ, भइए से उ वण्णओ । गन्धओ रसओ चेव, भइए संठाणओवि य ॥ ३५ ॥
 फासओ भइए जे उ, भइए से उ वण्णओ । गन्धओ रसओ चेव, भइए संठाणओवि य ॥ ३६ ॥
 फासए गुरुए जे उ, भइए से उ वण्णओ । गन्धओ रसओ चेव, भइए संठाणओवि य ॥ ३७ ॥
 फासओ लहुए जे उ, भइए से उ वण्णओ । गन्धओ रसओ चेव, भइए संठाणओवि य ॥ ३८ ॥
 फासए सीयए जे उ, भइए से उ वण्णओ । गन्धओ रसओ चेव, भइए संठाणओवि य ॥ ३९ ॥
 फासओ उण्हए जे उ, भइए से उ वण्णओ । गन्धओ रसओ चेव, भइए संठाणओवि य ॥ ४० ॥
 फासओ निद्रए जे उ, भइए से उ वण्णओ । गन्धओ रसओ चेव, भइए संठाणओवि य ॥ ४१ ॥
 फासओ लुक्खए जे उ, भइए से उ वण्णओ । गन्धओ रसओ चेव, भइए संठाणओवि य ॥ ४२ ॥
 परिमण्डलसंठाणे, भइए से उ वण्णओ । गन्धओ रसओ चेव, भइए से फासओवि य ॥ ४३ ॥
 संठाणओ भवे वट्ठे, भइए से उ वण्णओ । गन्धओ रसओ चेव, भइए से फासओवि य ॥ ४४ ॥
 संठाणओ भवे तंसे, भइए से उ वण्णओ । गन्धओ रसओ चेव, भइए से फासओवि य ॥ ४५ ॥
 संठाणओ जे चउरंसे, भइए से उ वण्णओ । गन्धओ रसओ चेव, भइए से फासओवि य ॥ ४६ ॥
 जे आययसंठाणे, भइए से वण्णओ । गन्धओ रसओ चेव, भइए से फासओवि य ॥ ४७ ॥
 एसा अजीवविभत्ती, समासेण वियाहिया । इत्तो जीवविभत्तिं, वुच्छामि अणुपुव्वसो । ४८ ॥
 संसारत्था य सिद्धा य, दुविहा जीवा वियाहिया । सिद्धाणेगविहा वुत्ता, तं मे कियतओ सुण ॥ ४९ ॥
 इत्थो पुरिससद्धा य, तहेव य नपुंसगा । सल्लिगे अन्नल्लिगे य, गिहिल्लिगे तहेव य ॥ ५० ॥
 उक्कोसोगाहणाए य, जहन्नमज्झिमाइ य । उट्ठं अहे तिरियं च, समुद्धम्मि जलम्मि य ॥ ५१ ॥
 दस य नपुंसएसु, वीसं इत्थियासु य । पुरिसेसु य अट्ठसयं, समण्णेगेण सिज्झई ॥ ५२ ॥
 चत्तारि य गिहिल्लिगे, अन्नल्लिगे दसेव य । सल्लिगेण अट्ठसयं, समण्णेगेण सिज्झई ॥ ५३ ॥
 उक्कोसोगाहणाए य, सिज्झन्ते जुगवं दुवे । चत्तारि जहन्नाए, मज्झे अट्ठुत्तरं सयं ॥ ५४ ॥

चउरुट्ठलोए य दुवे समुदे, तओ जळे वीसमडे तहेव य ।

सयं च अट्ठुत्तरं तिरियलोए, समण्णेगेण सिज्झई धुवं ॥

॥ ५५ ॥

कहिं पडिहया सिद्धा, कहिं सिद्धा पइट्ठिया । कहिं बोन्दि, चइत्ताणं, कत्थ मन्तूण सिज्झई ॥ ५६ ॥
 आलोए पडिहया सिद्धा, लोयग्गे य पइट्ठिया । इहं बोन्दि चइत्ताणं, तत्थ मन्तूण सिज्झई ॥ ५७ ॥
 बारसहिं जोयणेहिं, सब्बुस्सुवरिं भवे । ईसिपब्भारनामा, पुट्ठवी छत्तसंठिया ॥ ५८ ॥
 पणयालसयसहस्सा, जोयणाणं तु आयया । तावइयं चेव वित्थिण्णा, तिग्गुणो तस्सेव परिसणो ॥ ५९ ॥
 अट्ठजोयणबाहुला, सा मज्झम्मि वियाहिया । परिहायन्ती चरिमन्ते, मच्छिपत्ताउ तण्णुयरी ॥ ६० ॥

अज्जुणमुवण्णगमई, सा पुट्ठवी निम्मला सहावेण ।

उत्ताणगच्छत्तमसंठिया य, भणिया जिणवरेहिं ॥ ६१ ॥

संखंककुंदसंकासा, पण्डुरा निम्मला सुहा । सीयाणे जोयणे तत्तो, लोयन्तो उ वियाहिओ ॥ ६२ ॥
 जोयणस्स उ जो तत्थ, कोसो उवरिमो भवे । तस्स कोसस्स सव्भाए, सिद्धाणोगाहणा भवे ॥ ६३ ॥
 तत्थ सिद्धा महाभागा, लोगगम्मि पड्डिया । भवपंपंचओ मुक्का, सिद्धिं वरगइं गया ॥ ६४ ॥
 उस्सेहो जेसिं जो होइ, भवम्मि चरिमम्मि उ । तिभागहीणो तत्तो य, सिद्धाणोगाहणा भवे ॥ ६५ ॥
 एगत्तेण साईया, अपज्जवसियावि य । पुहत्तेण अणाइया, अपज्जवसियावि य ॥ ६६ ॥
 अरुविणो जीवघणा, नाणदंसणसन्निया । अउलं सुहं संपन्ना, उवमा जस्स नत्थि उ ॥ ६७ ॥
 लोगेगदेसे ते सवे, नाणदंसणसन्निया । संसारपारनित्थिण्णा, सिद्धिं वरगइं गया ॥ ६८ ॥
 संसारत्था उ जे जीवा, दुविहा ते वियाहिया । तसा य थावरा चेव, थावरा ति विहा तहिं ॥ ६९ ॥
 पुढवी आउजीवा य, तहेव य वणस्सई । इच्चेए थावरा ति विहा, तेसिं भेए सुणेह मे ॥ ७० ॥
 दुविह पुढवीजीवा य, सुहुमा बायरा तहा । पज्जत्तमपज्जत्ता, एवमेए दुहा पुणो ॥ ७१ ॥
 बायरा जे उ पन्नत्ता, दुविहा ते वियाहिया । सण्हा खरा य बोधवा, सण्हा सत्तविहा तहिं ॥ ७२ ॥
 किण्हा नीला य रुहिरा य, हलिदा सुकिला तहा । पण्णुपणगमट्टिया, खरा छत्तीसईविहा ॥ ७३ ॥
 पुढवी य सकरा बालुया य, उवले सिला य लोणूसे ।

अय-तम्ब तउय-सीसग-रुप्प-सुवण्णे य वइरे य ॥

॥ ७४ ॥

हरियाले हिंगुलुए, मणोसिला सासगंजण-पवाले ।

अव्वपडलव्वमवालुय, बायरकाए मणिविहाले ॥

॥ ७५ ॥

गोमेज्जए य रुयगे, अंके फलिहे य लोहियक्खे य । मरगय-मसारगल्ले, भुयमोयग-इन्दनीले य ॥ ७६ ॥
 चन्दण-गेरुय-हंसगव्वे, पुलए सोगन्धिए य बोधवे । चन्दप्पहवरुल्लिए, जलकन्ते सूरकन्ते य ॥ ७७ ॥
 एए खरपुढवीए, भेया छत्तीसमाहीया । एगविहमणाणत्ता, सुहुमा तत्थ वियाहिया ॥ ७८ ॥
 सुहुमा सबलोगम्मि, लोगदेसे य बायरा । इत्तो कालविभागं तु, वुच्छं तेसिं चउव्विहं ॥ ७९ ॥
 संतइं पण्णाईया, अपज्जवसियावि य । ठिइं पडुच्च साईया, सपज्जवसियावि य ॥ ८० ॥
 बावीससहस्साइं, वासाणुकोसिया भवे । आउठिई पुढवीणं, अन्तोमुहुत्तं जहन्नयं ॥ ८१ ॥
 असंखकालमुक्कोसं, अन्तोमुहुत्तं जहन्नयं । कायठिई पुढवीणं, तं कायं तु अमुंचओ ॥ ८२ ॥
 अणन्तकालमुक्कोसं, अन्तोमुहुत्तं जहन्नयं । विजट्ठम्मि सए काए, पुढविजीवाण अन्तरं ॥ ८३ ॥
 एएसिं वण्णओ चेव, गन्धओ रसफसओ । संठाणदेसओ वावि, विहाणाइं सहस्ससो ॥ ८४ ॥
 दुविहा आउजीवा उ, सुहुमा बायरा तहा । पज्जत्तमपज्जत्ता, एवमेए दुहा पुणो ॥ ८५ ॥
 बायरा जे उ पज्जत्ता, पंचहा ते पक्कित्तिया । सुद्धोदए य उस्से, हरतणू महिया हिमे ॥ ८६ ॥
 एगविहमणाणत्ता, सुहुमा तत्थ वियाहिया । सुहुमा सबलोगम्मि, लोगदेसे य बायरा ॥ ८७ ॥
 सन्तइं पण्णआईया, अपज्जवसियावि । ठिइं पडुच्च साईया, सपज्जवसियावि य ॥ ८८ ॥
 सत्तेव सहस्साइं, वासाणुकोसिया भवे । आइठिई आऊणं, अन्तोमुहुत्तं जहन्निया ॥ ८९ ॥
 असंखकालमुक्कोसं, अन्तोमुहुत्तं जहन्नयं । कायठिई आऊणं, तं कायं तु अमुंचओ ॥ ९० ॥
 अणन्तकालमुक्कोसं, अन्तोमुहुत्तं जहन्नयं । विजट्ठम्मि सए काए, आऊजीवाण अन्तरं ॥ ९१ ॥
 एएसिं वण्णओ चेव, गन्धओ रसफासओ । संठाणदेसओ वावि, विहाणाइं सहस्ससो ॥ ९२ ॥

दुविहा वणस्सईजीवा, सुहुमा बायरा तहा । पज्जत्तमपज्जत्ता, एवमेव दुहा पुणो ॥ ९३ ॥
 बायरा जे उ पज्जत्ता, दुविहा ते वियाहिया । साहारणसरीरा य, पत्तेगा य तहेव य ॥ ९४ ॥
 पत्तेगसरीराओऽणेगहा ते पकित्तिया । रुक्खा गुच्छा य गुम्मा य, लया वल्ली तणा तहा ॥ ९५ ॥
 चलया पव्वगा कुहुणा, जलरुहा ओसही तहा । हरियकाया बोधवा, पत्तेगाइ वियाहिया ॥ ९६ ॥
 साहारणसरीराओऽणेगहा ते पकित्तिया । आलुए मूलए चेव, सिंगवेरे तहेव य ॥ ९७ ॥
 हरिली सिरिली सस्सिरिली, जावई केयकन्दली । पलण्डुलसणकन्दे य, कन्दली य कुडुवण ॥ ९८ ॥
 लोहिणीहू य थीहू य, कुहगा य तहेव य । कन्दे य वज्जकन्दे य, कन्दे स्सरणए तहा ॥ ९९ ॥
 सस्सकणी य बोधवा, सीहकणी तहेव य । मुसुण्ठी य हलिदा, य णेगहा एवमायओ ॥ १०० ॥
 एगविहमणाणत्ता, सुहुमा तत्थ वियाहिया सुहुमा सबलोगम्मि, लोगदेसे य बायरा ॥ १०१ ॥
 संतइं पप्पणाईया, अपज्जवसियावि य । ठिइं पडुच्च साईया, सपज्जवसियावि य ॥ १०२ ॥
 दस चेव सहस्साइं, वासाणुकोसिया पणगाणं । वणप्फईण आउं, अन्तोमुहुत्तं जहन्निया ॥ १०३ ॥
 अणन्तकालमुकोसं, अन्तोमुहुत्तं जहन्नयं । कायठिई पणगाणं, तं कायं तु अमुंचओ ॥ १०४ ॥
 असंखकालमुकोसं, अन्तोमुहुत्तं जहन्नयं । विजढम्मि सए काए, पणगजीवाण अन्तरं ॥ १०५ ॥
 एएसिं वण्णओ चेव, गन्धओ रसफासओ । संठाणदेसओ वावि, विहाणाइं सहस्ससो ॥ १०६ ॥
 इच्चेए थावरा ति विहा, समासेण वियाहिया । इत्तो उ तसे ति विहे, वुच्छामि अणुपुव्वसो ॥ १०७ ॥
 तेऊ वाऊ य बोधवा, उराला य तसा तहा । इच्चेए तसा ति विहा, तेसिं भेए सुणेह मे ॥ १०८ ॥
 दुविहा तेऊजीवा उ, सुहुमा बायरा तहा । पज्जत्तमपज्जत्ता, एवमेए दुहा पुणो ॥ १०९ ॥
 बायरा जे उ पज्जत्ताणेगहा ते वियाहिया । इंगाले मुम्मुरे अगणी, अच्चिजाला तहेव य ॥ ११० ॥
 उक्का विज्जू य बोधवा णेगहा एवमायओ । एगविहमणाणत्ता, सुहुमा ते वियाहिया ॥ १११ ॥
 सुहुमा सबलोगम्मि, लोगदेसे य बायरा । इत्तो कालविभागं तु, तेसिं वुच्छं चउव्विहं ॥ ११२ ॥
 संतइं पप्पणाईया, अपज्जवसियावि य । ठिई पडुच्च साईया, सपज्जवसियावि य ॥ ११३ ॥
 तिण्णेव अहोरत्ता, उकोसेण वियाहिया । आउठिई तेऊणं, अन्तोमुहुत्तं जहन्निया ॥ ११४ ॥
 असंखकालमुकोसं, अन्तोमुहुत्तं जहन्नयं । कायठिई तेऊणं, तं कायं तु अमुंचओ ॥ ११५ ॥
 अणन्तकालमुकोसं, अन्तोमुहुत्तं जहन्नयं । विजढम्मि सए काए, तेऊजीवाण अन्तरं ॥ ११६ ॥
 एएसिं वण्णओ चेव, गन्धओ रसफासओ । संठाणदेसओ वावि, विहाणाइं सहस्ससो ॥ ११७ ॥
 दुविहा वाऊजीवा उ, सुहुमा बायरा तहा । पज्जत्तमपज्जत्ता, एवमेए दुहा पुणो ॥ ११८ ॥
 बायरा जे उ पज्जत्ता, पञ्चहा ते पकित्तिया । उकलिया मण्डलिया, घणगुज्जा सुद्धवाया य ॥ ११९ ॥
 संवट्टगवाया यणेगहा एवमायओ । एगविहमणाणत्ता, सुहुमा तत्थ वियाहिया ॥ १२० ॥
 सुहुमा सबलोगम्मि, एगदेसे य बायरा । इत्तो कालविभागं तु, तेसिं वुच्छं चउव्विहं ॥ १२१ ॥
 सन्तइं पप्पणाईया, अपज्जवसियावि य । ठिइं पडुच्च साईया, सपज्जवसियावि य ॥ १२२ ॥
 तिण्णेव सहस्साइं, वासाणुकोसिया भवे । आउठिई काऊणं, अन्तोमुहुत्तं जहन्निया ॥ १२३ ॥
 असंखकालमुकोसं, अन्तोमुहुत्तं जहन्नयं । कायठिई वाऊणं, तं कायं तु अमुंचओ ॥ १२४ ॥
 अणन्तकालमुकोसं, अन्तोमुहुत्तं जहन्नयं । विजढम्मि सए काए, काऊजीवाण अन्तरं ॥ १२५ ॥

एएसिं वण्णओ चेव, गन्धओ रसफासओ । संठाणदेसओ वावि, विहाणाइं सहस्ससो ॥ १२६ ॥
 उराला तसा जे उ, चउहा ते पकित्तिया । बेइन्दिय-तेइन्दिय-चउरो पंचिन्दिया चेव ॥ १२७ ॥
 बेइन्दिया उ जे जीवा, दुविहा ते पकित्तिया । पज्जत्तमपज्जत्ता, तेसिं मेए सुणेह मे ॥ १२८ ॥
 किमिणो सोमंगला चेव, अलसा माइवाहया । वासीमुहा य सिप्पिया, संख संखणगा तहा ॥ १२९ ॥
 घळोयाणुल्लया चेव, तहेव य वराडगा । जलुगा जालगा चेव, चन्दणा य तहेव य ॥ १३० ॥
 इइ बेइन्दिया एएऽणेगहा एवमायओ । लोगेगदेसे ते सबे, न सबत्थ वियाहिया ॥ १३१ ॥
 संतइं पप्पणाईया, अपज्जवसियावि य । ठिइं पडुच्च साईया, सपज्जवसियावि य ॥ १३२ ॥
 वासाइं बारसा चेव, उक्कोसेण वियाहिया । बेइन्दियआउठिई अन्तोमुहुत्तं जहन्निया ॥ १३३ ॥
 संखिज्जकालमुक्कोसं, अन्तोमुहुत्तं जहन्नयं । बेइन्दियकायठिई, तं कायं तु अमुंचओ ॥ १३४ ॥
 अणन्तकालमुक्कोसं, अन्तोमुहुत्तं जहन्नयं । बेइन्दियजीवाणं, अन्तरं च वियाहियं ॥ १३५ ॥
 एएसिं वण्णओ चेव, गन्धओ रसफासओ । संठाणदेसओ वावि, विहाणाइं सहस्ससो ॥ १३६ ॥
 तेइन्दिया उ जे जीवा, दुविहा ते पकित्तिया । पज्जत्तमपज्जत्ता, तेसिं मेए सुणेह मे ॥ १३७ ॥
 कुन्थुपिणीलिउडुंसा, उकलेहेहिया तहा । तणहारकडुहारा य, मालुरा पत्तहारगा ॥ १३८ ॥
 कप्पासट्ठिम्मि जायन्ति, दुगा तउसमिंजगा । सदावरी य गुम्भी य, बोधवा इन्दगाइया ॥ १३९ ॥
 इन्दगोवगमाईयाणेगहा एवमायओ । लोगेगदेसे ते सबे, न सबत्थ वियाहिया ॥ १४० ॥
 संतइं पप्पणाईया, अपज्जवसियावि य । ठिइं पडुच्च साईया, सपज्जवसियावि य ॥ १४१ ॥
 एगूणपण्होरत्ता, उक्कोसेण वियाहिया । तेइन्दियआउठिई, अन्तोमुहुत्तं जहन्निया ॥ १४२ ॥
 संखिज्जकालमुक्कोसं, अन्तोमुहुत्तं जहन्नयं । तेइन्दियकायठिई, तं कायं तु अमुंचओ ॥ १४३ ॥
 अणन्तकालमुक्कोसं, अन्तोमुहुत्तं जहन्नयं । तेइन्दियजीवाणं, अन्तोमुहुत्तं जहन्निया ॥ १४४ ॥
 एएसिं वण्णओ चेव, गन्धओ रसफासओ । संठाणदेसओ वावि, विहाणाइं सहस्सजो ॥ १४५ ॥
 चउरिन्दिया उ जे जीवा, दुविहा ते पकित्तिया । पज्जत्तमपज्जत्ता, तेसिं मेए सुणेह मे ॥ १४६ ॥
 अन्धिया पोत्तिया चेव, मच्छिया मसगा तहा । भमरे कीडपयंगे य, ठिंकुणे कंकणे तहा ॥ १४७ ॥
 कुक्कुडे भिरीडी य, नन्दावत्ते य विच्छुए । टोले भिंगारी य, वियडी अच्छिवेयए ॥ १४८ ॥

अच्छिले माहए अच्छिरोडए, विचित्ते चित्तपत्तए ।

उहिंजलिया जलकारी य, नीया तन्तवयाइया ॥ १४९ ॥

इय चउरिन्दिया, एएऽणेगहा एवमायओ । लोगेगदेसे ते सबे, न सबत्थ वियाहिया ॥ १५० ॥
 संतइं पप्पणाईया, अपज्जवसिया वि य । ठिइं पडुच्च साईया, सपज्जवसिया वि य ॥ १५१ ॥
 छचेव मासाऊ, उक्कोसेण वियाहिया । चउरिन्दियआउठिई, अन्तोमुहुत्तं जहन्निया ॥ १५२ ॥
 संखिज्जकालमुक्कोसं, अन्तोमुहुत्तं जहन्नयं । चउरिन्दियकायठिई, तं कायं तु अमुंचओ ॥ १५३ ॥
 अणन्तकालमुक्कोसं, अन्तोमुहुत्तं जहन्नयं । चउरिन्दियजीवाणं, अन्तरं च वियाहियं ॥ १५४ ॥
 एएसिं वण्णओ चेव, गन्धओ रसफासओ । संठाणदेसओ वावि, विहाणाइं सहस्ससो ॥ १५५ ॥
 पंचिन्दिया उ जे जीवा, चउविहा ते वियाहिया । नेरइयतिरिक्खा य, मणुया देवा य आहिया ॥ १५६ ॥
 नेरइया सत्तविहा, पुढवीसु सतसू भवे । रयणाभसकराभा, वालुयाभा य आहिया ॥ १५७ ॥

पंकाभा धूमाभा, तमा तमतमा तहा । इइ नेरइया एए, सत्तहा परिकित्तिया ॥ १५८ ॥
लोमस्स एगदेसम्मि, ते सब्बे उ वियाहिया । एत्तो कालविभागं तु, वोच्चं तेसिं चउव्विहं ॥ १५९ ॥
संतइं पप्पणाईया, अपज्जवसियावि य । ठिइं पडुच्च साईया, सपज्जवसियावि य ॥ १६० ॥
सागरोवममेगं तु, उक्कोसेण वियाहिया । पढमाए जहन्नेणं, दसवाससहस्सिया ॥ १६१ ॥
तिण्णेव सागरा ऊ, उक्कोसेण वियाहिया । दोच्चाणं जहन्नेणं, एगं तु सागरोवमं ॥ १६२ ॥
सत्तेव सागरा ऊ, उक्कोसेण विगाहिया । चउत्थीए जहन्नेणं, तिण्णेव सागरोवमा ॥ १६३ ॥
दस सागरोवमा ऊ, उक्कोसेण वियाहिया । चउत्थीए जहन्नेणं, सत्तेव सागरोवमा ॥ १६४ ॥
सत्तरस सागरा ऊ, उक्कोसेण वियाहिया । चउत्थीए जहन्नेणं, सत्तेव नागरोवमा ॥ १६५ ॥
बावीस सागरा ऊ, उक्कोसेण वियाहिया । छट्ठीए जहन्नेणं, सत्तरस सागरोवमा ॥ १६६ ॥
तेत्तीस सागरा ऊ, उक्कोसेण वियाहिया । सत्तमाए जहन्नेणं, बावीसं सागरोवमा ॥ १६७ ॥
जा चेव य आयठिई, नेरइयाणं वियाहिया । सा तेसिं कायठिई, जहन्नुक्कोसिया भवे ॥ १६८ ॥
अणन्तकालमुक्कोसं, अन्तोमुहुत्तं जहन्नयं । विजढम्मि सए काए, नेरइयाणं अन्तरं ॥ १६९ ॥
एएसिं वण्णओ चेव, गन्धओ रसफासओ । संठाणदेसओ बावि, विहाणाइं सहस्ससो ॥ १७० ॥

पंचिन्दियतिरिक्खाओ, दुविहा ते वियाहिया ।

समुच्छिमतिरिक्खाओ, गम्भवकन्तिया तहा ॥

॥ १७१ ॥

दुविहा ते भवे तिविहा, जलयरा थलयरा तहा । नदयरा य बोधवा, तेसिं भेए सुणेह मे ॥ १७२ ॥
मच्छा य कच्छभा य, गाहा य मगरा तहा । सुंसुमाराय बोधवा, पंचहा जलहराहिया ॥ १७३ ॥
लोएगदेसे ते सब्बे, न सब्बत्थ वियाहिया । एत्तो कालविभागं तु, वोच्चं तेसिं चउव्विहं ॥ १७४ ॥
संतइं पप्पणाईया, अपज्जवसिया वि य । ठिइं पडुच्च साईया, सपज्जवसिया वि य ॥ १७५ ॥
एगा य पुव्वकोडी, उक्कोसेण वियाहिया । आउठिई जलयराणं, अन्तोमुहुत्तं जहन्निया ॥ १७६ ॥
पुव्वकोडिपुहत्तं तु, उक्कोसेण वियाहिया । कायट्ठिई जलयराणं, अन्तोमुहुत्तं जहन्नयं ॥ १७७ ॥
अणन्तकालमुक्कोसं, अन्तोमुहुत्तं जहन्नयं । विजढम्मि सए काए, जसयराणं अन्तरं ॥ १७८ ॥
चउप्पया य परिसप्पा, दुविहा थलयरा भवे । चउप्पया चउविहा, ते मे क्रियनओ सुण ॥ १७९ ॥
एगखुरा दुखुरा चेव, गण्डीपयसणहप्पया । हयमाइगोणमाइगयमाइसीहमाइणो ॥ १८० ॥
भुओरगपरिसप्पा य, परिसप्पा दुविहा भवे । गोहाई गहिमाई य, एक्केकाणेगहा भवे ॥ १८१ ॥
लोएगदेसे ते सब्बे, न सब्बत्थ वियाहिया । एत्तो कालविभागं तु, वोच्चं तेसिं चउव्विहं ॥ १८२ ॥
संतइं पप्पणाईया, अपज्जवसियावि य । ठिई पडुच्च साईया, सपज्जवसियावि य ॥ १८३ ॥
पलिओवमाइं तिणिण उ, उक्कोसेण वियाहिया । आउठिई थलयराणं, अन्तोमुहुत्तं जहन्निया ॥ १८४ ॥
पुव्वकोडिपुहत्तेणं, अन्तोमुहुत्तं जहन्निया । कायट्ठिई थलयराणं, अन्तरं तेसिमं भवे ॥ १८५ ॥
कालमणन्तमुक्कोसं, अन्तोमुहुत्तं जहन्नयं । विजढम्मि सए काए, थलयराणं तु अन्तरं ॥ १८६ ॥

चम्मे उ लोमपक्खी य, तइया समुग्गपक्खिया ।

विययपक्खी य बोधवा, पक्खिणो य चउव्विहा ॥

॥ १८७ ॥

लोगेगदेसे ते सब्बे, न सब्बत्थ वियाहिया । इत्तो कालविभागं तु, वोच्चं तेसिं चउव्विहं ॥ १८८ ॥

संतइं पप्पणाईया, अपज्जवसियावि य । ठिई पडुच्च साईया, सपज्जवसियावि य ॥ १८९ ॥
 पलिओवमस्स भागो, असंखेज्जइमो भवे । आउठिई खहयराणं, अन्तोमुहुत्तं जहन्निया ॥ १९० ॥
 असंखभाग पलियस्स, उक्कोसेण उ साहिया । पुव्वकोडीपुहत्तेणं, अन्तोमुहुत्तं जहन्निया ॥ १९१ ॥
 ठिई खहयराणं, अन्तरे तेसिमे भवे । कालं अणन्तकोसं, मुक्कोसं, अन्तोमुहुत्तं, जहन्नयं ॥ १९२ ॥
 एएसिं वण्णओ चेव, गन्धओ रसफासओ । संठाणदेसओ वावि, विहाणाइं सहस्ससो ॥ १९३ ॥
 मणुया दुविहमेया उ, ते मे कित्तयओ सुण । संमुच्छिमा य मणुया, गम्भकन्तिया तहा ॥ १९४ ॥
 गम्भवकन्तिया जे उ, तिविहा ते वियाहिया । कम्मअकम्मभूमा य, अन्तरदीवया तहा ॥ १९५ ॥
 पन्नरस तीसविहा, मेया अट्ठवीसइं । संखा उ कम्मसो तेसिं, इइ एसा वियहिया ॥ १९६ ॥
 संमुच्छिमाण एसेव, मेओ होइ वियाहियो । लोगस्स पगदेसम्मि, ते सब्बे वि वियाहिया ॥ १९७ ॥
 संतइं पप्पणाईया, अपज्जवसियावि य । ठिइं पडुच्च साईया, सपज्जवसियावि य ॥ १९८ ॥
 पलिओवमाउ तिण्णवि, असंखेज्जइमो भवे । आउठिई मणुयणं, अन्तोमुहुत्तं जहन्निया ॥ १९९ ॥
 पलिओवमाइं तिण्णि उ, उक्कोसेण उ साहिया । पुव्वकोडिपुहत्तेणं, अन्तोमुहुत्तं जहन्निया ॥ २०० ॥
 कायठिई मणुयाणं, अन्तरं तेसिमं भवे । अणन्तकालमुक्कोसं, अन्तोमुहुत्तं जहन्नयं ॥ २०१ ॥
 एएसिं, वण्णओ चेव, गन्धओ रसफासओ । संठाणदेमओ वावि, विहाणाइं सहस्ससो ॥ २०२ ॥
 देवा चउव्विहा वुत्ता, तै मे कित्तयओ सुण । भोमिज्जवाणमन्तरजोइसवेमाणिया तहा ॥ २०३ ॥
 दसहा उ भवणवासी, अट्ठहा वणचारिणो । पंचविहा जोइसिया, दुविहा वेमाणिया तहा ॥ २०४ ॥

असुरा नागसुवण्णा, विज्जू अग्गी वियाहिया ।

दीवोदहिदिसा वाया, धणिया भवणवासिणो ॥ २०५ ॥

पिसायभूया जक्खा य, रवरूसा किन्नरा किंपुरिसा ।

महोरगा य गन्धवा, अट्ठविहा वाणमन्तरा ॥ २०६ ॥

चन्दा स्ररा य नक्खत्ता, गहा तारागणा तहा ।

ठिया विचारिणो चेव, पंचहा जोइसालया ॥ २०७ ॥

वेमाणिया उ जे देवा, दुविहा ते वियाहिया । कप्पोवगा य बोधव्वा, कप्पाईया तहेव य ॥ २०८ ॥

कप्पोवग्गा बारसहा, सोइम्मीसाणगा तहा । सणकुमारमाहिन्दबम्भलोगा य सन्तगा ॥ २०९ ॥

महासुक्का सहस्सारा, आणया पाणया तहा । आरणा अच्चुया चेव, इइ कप्पोवगा सुरा ॥ २१० ॥

कप्पाईया उ जे देवा, दुविहा ते वियाहिया । गेविज्जाणुत्तरा चेव, गेविज्जा नवविहा तहिं ॥ २११ ॥

हेट्ठिमा हेट्ठिमा चेव, हेट्ठिमा मज्झिमा तहा । हेट्ठिमा उवरिमा चेव, मज्झिमा हेट्ठिमा तहा ॥ २१२ ॥

मज्झिमा मज्झिमा चेव, मज्झिमा उवरिमा तहा ।

उवरिमा हेट्ठिमा चेव, उवरिमा मज्झिमा तहा ॥ २१३ ॥

उवरिमा उवरिमा चेव, इय गेविज्जगा सुरा । विजया वेजयन्ता य, जयन्ता अपराजिया ॥ २१४ ॥

सवत्थसिद्धगा चेव, पंचहाणुत्तरा सुरा । इय वेमाणिया एएऽणेगहा एवमायओ ॥ २१५ ॥

लोगस्स एगदेसम्मि, ते सब्बे वि वियाहिया । इत्तो कालविभागं तु, वुच्छं तेसिं चउव्विहं ॥ २१६ ॥

संतइं पप्पणाईया, अपज्जवसियावि य । ठिइं पडुच्च साईया, सपज्जवसियावि य ॥ २१७ ॥

साहीयं सागरं एकं, उक्कोसेण ठिई भवे । भोमेज्जाणं जहन्नेणं, दसवाससहस्सिया ॥ २१८ ॥
 पलिओवममेगं तु, उक्कोसेण ठिई भवे । वन्तराणं जहन्नेणं, दसवाससहस्सिया ॥ २१९ ॥
 पलिओवममेगं तु, वासलक्खेण साहीयं । पलिओवमट्ठभागो, जोइसेसु जहन्निया ॥ २२० ॥
 दो चेव सागराई, उक्कोसेण वियाहिया । सोहम्मम्मि जहन्नेणं, एगं च पलिओवमं ॥ २२१ ॥
 सागरा साहिया दुन्नि, उक्कोसेण वियाहिया । ईसाणम्मि जहन्नेणं, साहियं पलिओवमं ॥ २२२ ॥
 सागराणि य सत्तेव, उक्कोसेण ठिई भवे । सणंकुमारे जहन्नेणं, दुन्नि उ सागरोवमा ॥ २२३ ॥
 साहिया सागरा मत्त, उक्कोसेणं ठिई भवे । माहिन्दम्मि जहन्नेणं, साहिया दुन्नि सागरा ॥ २२४ ॥
 दस चेव सागराई, उक्कोसेण ठिई भवे । बम्भलोए जहन्नेणं, सत्त ऊ सागरोवमा ॥ २२५ ॥
 चउदस सागराई, उक्कोसेण ठिई भवे । लन्तगम्मि जहन्नेणं, दस उ सागरोवमा ॥ २२६ ॥
 सत्तरस सागराई, उक्कोसेण ठिई भवे । महासुक्के जहन्नेणं, चोदस सागरोवमा ॥ २२७ ॥
 अट्ठारस सागराई, उक्कोसेण ठिई भवे । सहस्सारम्मि जहन्नेणं, सत्तरस सागरोवमा ॥ २२८ ॥
 सागरा अउणवीसं तु, उक्कोसेण ठिई भवे । आणयम्मि जहन्नेणं, अट्ठारस सागरोवमा ॥ २२९ ॥
 वीसं तु सागराई, उक्कोसेण ठिई भवे । पाणयम्मि जहन्नेणं, सागरा अणवीसई ॥ २३० ॥
 सागरा इक्कीसं तु, उक्कोसेण ठिई भवे । आरणम्मि जहन्नेणं, वीसई सागरोवमा ॥ २३१ ॥
 बावीसं सागराई, उक्कोसेण ठिई भवे । अच्चुयम्मि जहन्नेणं, सागरा इक्कीसई ॥ २३२ ॥
 तेवीस सागराई, उक्कोसेण ठिई भवे । पढमम्मि जहन्नेणं, बावीसं सागरोवमा ॥ २३३ ॥
 चउवीस सागराई, उक्कोसेण ठिई भवे । बिइयम्मि जहन्नेणं, तेवीसं सागरोवमा ॥ २३४ ॥
 पणवीस सागराई, उक्कोसेण ठिई भवे । तइय जहन्नेणं, चउवीसं सागरोवमा ॥ २३५ ॥
 छवीस सागराई, उक्कोसेण ठिई भवे । चउत्थम्मि जहन्नेणं, सागरा पणुवीसई ॥ २३६ ॥
 सागरा सत्तवीसं तु, उक्कोसेण ठिई भवे । पञ्चमम्मि जहन्नेणं, सागरा उ छवीसई ॥ २३७ ॥
 सागरा अट्ठवीसं तु, उक्कोसेण ठिई भवे । छट्ठम्मि जहन्नेणं, सागरा सत्तवीसई ॥ २३८ ॥
 सागरा अउणतीसं तु, उक्कोसेण ठिई भवे । सत्तमम्मि जहन्नेणं, सागरा अट्ठवीसई ॥ २३९ ॥
 तीसं तु सागराई, उक्कोसेण ठिई भवे । अट्ठमम्मि जहन्नेणं, सागरा अउणतीसई ॥ २४० ॥
 सागरा इक्कीतीसं तु, उक्कोसेण ठिई भवे । नवमम्मि जहन्नेणं, तीसई सागरोवमा ॥ २४१ ॥
 तेत्तीसा सागराई, उक्कोसेण ठिई भवे । चउसुं पि विजयईसु, जहन्नेणेक्कीतीसई ॥ २४२ ॥
 अजहन्नमणुक्कोसा, तेत्तीसं सागरोवमा । महाविमाणे संबट्टे, ठिई एसा वियाहिया ॥ २४३ ॥
 जा चेव उ आउठिई, देवाणं तु वियाहिया । सा तेसिं कायठिई, जहन्नमुक्कोसिया भवे ॥ २४४ ॥
 अणन्तकालमुक्कोसं, अन्तोमुहुत्तं जहन्नयं । विजट्ठम्मि सए काए, देवाणं हुज्ज अन्तरं ॥ २४५ ॥
 एएसिं वण्णओ चेव, गन्धओ रसफासओ । संठाणदेसओ वावि, विहाणाई सहस्ससो ॥ २४६ ॥
 संसारत्थाय सिद्धा य, इय जीवा वियाहिया । रूविणो चेवरूवी य, अजीवा दुहिहावि य ॥ २४७ ॥
 इय जीवमजीवे य, सोच्चा सदहिऊण य । सबनयाणमणुमए, रमेज्ज संजमे मुणी ॥ २४८ ॥
 तओ बहूणि वासाणि, सामणमणुपालिय । इमेण कम्मजोगेण, अप्पाणं संलिडे मुणी ॥ २४९ ॥
 बारसेव उ वासाई, संलेहुक्कोसिया भवे । संवरच्छरमज्झमिया, छम्मासा य जहन्निया ॥ २५० ॥

पदमे वासचउक्कम्मि, विगई-निज्जूहणं करे । विईए वासचउक्कम्मि, विविचं तु तवं चरे ॥ २५१ ॥
 एगन्तरमायामं, कद्दु संवच्छरे दुवे । तओ संवच्छरद्धं तु, नाइविगद्धं तवं चरे ॥ २५२ ॥
 तओ संवच्छरद्धं तु, विगिद्धं तु तवं चरे । परिमियं चैव आयामं, तम्मि संवच्छरे करे ॥ २५३ ॥
 कोडी सहियमायामं, कद्दु, संवच्छरे मुणी । मासद्धमासिएणं तु, आहारेण तवं चरे ॥ २५४ ॥
 कन्दप्पमाभिओगं च, किच्चिसियं मोहमासुरुत्तं च ।

एयाउ दुग्गईओ, मरणम्मि विराहिया होन्ति ॥ २५५ ॥
 मिच्छादंसणरत्ता, सनियाणा उ हिंसगा । इय जे मरन्ति जीवा, तेसिं पुण दुल्लहा बोही ॥ २५६ ॥
 सम्महंसणरत्ता, अनियाणा सुकलेसमोगाढा । इय जे मरन्ति जीवा, तेसिं सुल्लहा भवे बोही ॥ २५७ ॥
 मिच्छादंसणरत्ता, सनियाणाकण्हलेसमोगाढा ।
 इय जे मरन्ति जीवा, तेसिं पुण दुल्लहा बोही ॥ २५८ ॥

जिणवयणे अणुरत्ता, जिणवयणं करेन्ति भावेण । अमला असङ्गिलिद्धा, ते होन्ति परिचसंसारी ॥ २५९ ॥
 बालमरणाणि बहुसो, अकाममरणाणि चैव य बहूणि ।
 मरिहन्ति ते वराया, जिणवयणं जे न जाणन्ति ॥ २६० ॥

बहुआगमविन्नाणा, समाहिउप्पायगा य गुणगाही । एएणं कारणेणं, अरिदा आलोयणं सोउं ॥ २६१ ॥
 कन्दप्पकुक्कुयाइं, तह सीलसहावहसणविगहाइं । विम्हावेन्तोवि परं, कन्दप्पं भावणं कुणइ ॥ २६२ ॥
 मन्ताजोगं काउं, भूईकम्मं च जे पउंजन्ति । साय-रस-इद्धिहेउं, अभिओगं भावणं कुणइ ॥ २६३ ॥
 नाणस्स केवलीणं, धम्मायरियस्स सङ्गसाहूणं । माई अवण्णवाई, किच्चिसियं भावणं कुणइ ॥ २६४ ॥
 अणुबद्धरोसपसरो, तह य निमित्तम्मि होइ पडिसेवी । एएहि कारणेहिं, आसुरियं भावणं कुणइ ॥ २६५ ॥
 सत्थगहणं विसभक्कवणं च जलणं च जलपवेसो य ।

अणायारभण्डसेवा, जम्मणमरणाणि बंधन्ति ॥ २६६ ॥
 इय पाउकरे बुद्धे, नायए परिनिब्बुए । छत्तीसं उत्तरज्झाए, भवसिद्धीयसंबुडे ॥ २६७ ॥
 त्ति वेमि ॥ जीवाजीवविभत्ती समत्ता ॥ ३६ ॥

॥ इअ उत्तरज्झयण सुत्तं समत्तं ॥



